

**EKALESIA FAAPOTOPOTOGA KERISIANO SAMOA**

**TUSI MO FAIA'OGA  
A'OGA ASO SA  
2015**

*(Fa'ava'a)  
(Pine Aoga Aso Sa)*

**VASEGA MATUTUA  
(14 – 16 tausaga)**

**2 0 1 5**

**MATAGALUEGA O A'OA'OGA KERISIANO**

**EKALESIA FAAPOTOPOTOGA KERISIANO SAMOA**

**TUSI MO FAIA'OGA  
A'OGA ASO SA  
2015**

*(Itulau o le Ulutala)  
(Pine Aoga Aso Sa)*

**VASEGA MATUTUA  
(14 – 16 tausaga)**

**2 0 1 5**

**MATAGALUEGA O A'OA'OGA KERISIANO**

## UPU TOMUA.

I le suafa mamalu o Iesu Keriso le Ao o le Ekalesia, e faatalofa atu ai i le paia o le Ekalesia Faapotopotoga Kerisiano Samoa i ona tulaga faalupeina. E faafeiloa'i faapitoa i le mamalu o Faiaoga Aoga Aso Sa; e maualuga le manatu ua maua se faasiliga malosi e ala i faiga tuuaga ma malologa. O lea ua toe amata galuega - ua saunia foi Tusi mo Faiaoga o Aoga Aso Sa mo lenei tausaga 2015. Ina ia silafia ai:

1. O lenei Tusi mo Faia'oga o A'oga Aso Sa, o le meatotino a le Ekalesia Faapotopotoga Kerisiano Samoa ua saunia faapitoa mo ana A'oga Aso Sa. E avanoa foi mo le fa'aaogāina e soo se tagata e tusa o lea faamoemoe. Peita'i e faasāina faaletulafono ona toe lomía e se tasi, o se vaega po o le tusi atoa, mo le faamoemoe e maua ai ni ana faamanuiaga ma ni tamaoa'iga faaletino, e aunoa ma le faatagaga a le EFKS.

2. Ua maua ata o Tusi Aoga Aso Sa & Autalavou 2015 i le Upega Tafailagi (website) a le EFKS: [www.cccs.org.ws](http://www.cccs.org.ws). Ua faapea foi ona maua ai fati o nisi Pese Aoga Aso Sa.

3. E leai se suiga i Auala ma Metotia e a'oa'oina ai mataupu mai tausaga talu ai. E tāua ai le teu faalelei pea o Tusi Aoga Aso Sa 2009 - 2014 e silasila i ai pe a mana'omia. E maualuga le manatu o le Matagaluega i le tofa saili ma le tofa taulagalaga ma faama'ite o susuga i Faiaoga Aoga Aso Sa, e fa'aaogā ai taleni ma agavaa o meaalofa a le Atua ua ia i latou, i le faatinoga o le faiva faa-faiaoga.

4. O vaega masani o le Faatinoga o Mataupu e pei o Tatalo Amata, Faafeiloa'i le Vasega, Faamanatu Mataupu talu ai, Tatalo faapa'ia le foa'i, Tatalo Faai'u ma isi, ua lē o tusia i le faasologa o mataupu i Aso

Sa taitasi. Peitai o vaega masani nei o le faatinoga o mataupu e **tatau lava ona faatino i Mataupu ma Aso Sa taitasi.**

5. Afai e fia maua se fesoasoani, faamolemole faafeso'ota'i mai lo tatou Ofisa i Mulinuu, telefoni 24340, poo le e-meli: [xtneduc@cccs.org.ws](mailto:xtneduc@cccs.org.ws)

6. Afai ua lape le faatinoga o lenei galuega, e matua atu i la outou tofā faaleAtua e magalo ai le afaigaluega vaivai. Pe afai foi e i ai ni fautuaga mo le faaleleia atili o lenei galuega, faamolemole faafesoota'i mai lo tatou Ofisa i tuatusi o i luga, pe lafo mai i le Pusa Meli 163, Apia.

7. O lenei Tusi A'oga mo Faia'oga Aso Sa Vasega Matutua 2015, na saunia e susuga Faifeau ma A'oa'o I'u mai Malua o loo galulue i le Ofisa A'oa'oga Kerisiano.

8. Ia faamanuia le Atua i le alo atu i galuega o lenei tausaga, auā le a'oa'oina o alo ma fanau i Aoga Aso Sa ina ia **TUTUPU A'E IA KERISO.**

Soifua ma ia manuia.

O la outou auauna,

*Faitoaga Telua*

(Faatonu A'oa'oga Kerisiano)

## FAASOLOGA O MATAUPU VASEGA MATUTUA 2015

### FEPUARI: 2015

- 8: **(Aso Sa o Tupulaga) Lamatia lē ua filifilia** (The chosen one under threat). 2Samuelu 15:1-14
- 15: **Apisaloma, Apisaloma e!** (Absalom, O Absalom!). 2Samuelu 18:31-19:8
- 22: **Faafetai i le Atua mo le meaalofa o le fanau** (Thanking God for the gift of children). 1Samuelu 1:20-28; 2:18-20.

### MATI: 2015

- 1: **O le valaau ia lē usitai i se mea sese** (The call to civil disobedience). Esoto 1:15-22.
- 8: **O le tagi a le tagata ua leai se malosi** (The cry of the powerless). Kenese 21:14-19
- 15: **Finau ma le Atua: o se lē onosa'i tonu** (Arguing with God: A righteous impatience). Salamo 6:1-10
- 22: **Ua silasila atu i ai le Atua ua lelei** (God saw that it was good). Kenese 1:9-12
- 29: **(Aso Sa o le Laupama) Tapua'i i le Tupu** (Worship the King) Ioane 12:12-18

### APERILA: 2015

- 5: **(Aso Sa o le Eseta/Toetu) O le tuugamau tuufua o le Eseta** (The empty tomb of Easter). Ioane 20:1-9
- 12: **O le nofoaga mo faamafanafanaga** (The place of counseling) Ioane 14:1-4
- 19: **O ā ni taunuuga e mulimuli mai?** (What appears on the bottom line?) Isaia 5:1-7
- 26: **Itagia Iesu ma lona au soo** (Hatred for Jesus and his disciples) Ioane 15:18-21.

### ME: 2015

- 3: **Mai i le oti i le ola** (From death to life) Ioane 16:16-18.
- 10: **(Aso Sa o Tinā) Vivii i le Tamā, e auala atu i le Atalii** (Glory to the father, through the Son) Ioane 17:1-5.
- 17: **Fono tele Malua**
- 24: **(Aso Sa Penetekoso)** Lagona le faatauva. Galuega 1:1-14
- 31: **Ua faafetaia'i e Iesu le malosi o le tiapolo.** Mareko 5: 1 - 13

### IUNI: 2015

- 7: **Loto tetele, o a'u lava lenei, 'aua tou te matata'u** (Take courage, it is I, don't be afraid) Mareko 6:45-56
- 14: **Tala o le ola mai se olaga maualalo** (Big stories in small lives) Kenese 41:25-36
- 21: **Teena fautuaga atamai** (Rejecting wise advice) 1Tupu 12:1-15
- 28: **Savali i le ala o le filemu** (Walking in the way of peace) Isaia 2:2-5

### IULAI: 2015

- 5: **O ē faatupuina le filemu** (Peacemakers) Mataio 5:9
- 12: **Feiloā'iga pupu'u, faailoga o le Atua paia** Mareko 9:2-13
- 19: **O ala e mafai ai ona ulufale i le malo o le Atua** (The possibility of entering the kingdom of God) Mareko 10:23-31
- 26: **Fausiaina, faatumauina, faafouina** (Creating, sustaining, renewing) Salamo 104:19-30

### AOKUSO: 2015

- 2: **Filemu i le natura o mea** (Paying attention to nature) Salamo 104:5-18
- 9: **(Aso Sa o Tamā) Ia pese mai le laupepa o le pese** (Singing from the same hymn sheet) Salamo 136:1-9

- 16: **Ua sola 'ese** (The runaway) Iona 1:1-3  
23: **Pese o le alofa** (Song of Love) Pese a Solomona 1:12-14  
30: **Faamanatuina o le ulua'i fua** (An early harvest festival)  
Teuteronomie 26:1-15

**SETEMA: 2015**

- 6: **(Aso Sa o le Talalelei) Foafoaga a le Atua, o le tatou matāfaioi**  
(God's handiwork; our responsibility) Salamo 8  
13: **Iosefa, 'aua le tauimasui** (Hey Joe, don't make it bad) Kenese  
37:2-14a  
20: **Faavae i luga o le alofa** (On the basis of love) Filemoni 1-14  
27: **O le gagana o le malo** (The kingdom's speech) Iakopo 3:1-12

**OKETOPA: 2015**

- 4: Sauniga lotu tamaiti  
11: **Aso Sa o le Lotu Tamaiti**  
18: Malologa lotu tamaiti  
25: O valoaga a Iesu (Jesus' warning) Mareko 13:1 - 8

**NOVEMA: 2015**

- 1: **O le tagiauē ma le alaga fiafia - e ō faatasi** (Weeping and  
rejoicing belongs together) Salamo 30:1-12  
8: **Meaalofa o loimata** (Gift of tears) Mataio 5:1-6  
15: **Talia ma le loto faafetai** (Gratitude unto delight) Teuteronomie  
12:5-12.  
22: **Feiloā'iga** (Meeting) Luka 10:17-20  
29: **(Aso Sa o le Afio Mai/Ateveni)** Mafaufau fetāla'i (Enquiring  
mind) Luka 1:1-4

**TESEMA: 2015**

- 6: Ua faaigoaina ae lei faia sona igoa (Naming without being  
named) Luka 1:67-80  
13: O le papatisoina o Iesu (The baptism of Jesus) Luka 3:21-38  
**20, 27: Malologa Kirisimasi**

.....

**ASO SA:** (Aso Sa Tupulaga) 8 FEPUARI, 2015

**MATAUPU:** LAMATIA LĒ UA FILIFILA (The chosen one under threat).

**SINI:** Ia a'oa'o le vasega ina ia malamalama, e lamatia lo tatou Filifilia e le Alii mo lona finagalo, pe a tatou solia ana tulafono ma mea ua ia faasa ia 'aia tatou te faia ma faaofi mai i o tatou siosiomaga.

**TUSI FAITAU:** 2 Samuelu 15:1-14

### FESOASOANI MO FAIAOGA

O le mataupu, 'Lamatia lē ua filifilia'. O le upu 'lamatia' ua faamatala ai ni faaletonu ua aafia ai lē ua filifilia, ma e ono aafia ai lona saogalemu e oo lava i lona ola ma lona tulaga ua filifilia ai.

O le Tusi Faitau, o lo o faamatala ai Apisaloma, ma o se tagata o lo o ave i ai le faamamafa a le Tusitala i le 2Samuelu 13:1-18:33. Aisea ua faamatala ai e le Tusitala Apisaloma i nei mataupu e ono (6) o le Tusi? O le tina o Apisaloma o le afafine o Talemai le tupu o Kasuri. E lona tolu i atalii e toaono (6) na fanaua e Tavita mai fafine e toaono (6) a o nofo ai le tupu i Heperona. O Apisaloma la o le nuu 'ese lona tinā, ma tau tupu foi ai nuu ese. I lea tulaga, tatou te vaai ai i poloaiga a le Alii i le paia o Isaraelu o lē ua vavaeeseina e pei ona toe faamalosia e Neemia ina ua toe a'e le tafeaga. Auā o le toto lua ai o Apisaloma, ua lualuagia ai foi ma lona tagata i totonu i le faamaoni i faavae o Isaraelu mai le Alii. O le faataitaiga muamua – o lona siosiomaga faaleaiga. E ui i le matuiā o le agasala a lona uso o Amanono i lona toso o lona tuafafine o Tamara e tina faatasi ma Apisaloma, ae sa sili lona alofa i lona tuafafine nai lo lona uso e ala i lona fasioti ia Amanono. E faapena foi i le va nonofo ai o Apisaloma ma Tavita lona tamā. I lea va ma lona tamā, ua aliali mai ai amioga faa-nuu ese – o le ola fouvale i matua ma o latou tofiga ma valaauina mai le Alii.

I ff.1-6 i le Tusi Faitau, o lo o fa'aalia ai le agavaa o Apisaloma i le tulaga o faatosina e tusa ma lona mana'o. I le f.25 o le mataupu 14, o lo

o tā'ua ai le aulelei tasi o Apisaloma i Isaraelu uma. Ma faatasi ma lona tulaga aloalii o le atalii o le tupu aemaise o lona iloa lelei o vaega o le olaga o aso uma e mafai ai ona tino mai lona mana'o, na afua ai ona ia maua loto o tagata. Ua ia faapei o le tupu i le fealua'i i le nofoa faatavalevale. O solofanua foi ma tagata e lima sefulu e tamomoe i ona luma. Ua usuusu i le faitotoa o le aai ina ia ia maua tagata e o mai i le tupu e faamasino i o latou faaaitauli. Ua ia faailoa atu i tagata o lo o o i le tupu o ia na te faamasino tonu ia i latou. O ē o mai ma ifo mai ia te ia, na te tuu atu lona lima e taofi ai, ma ia sogi atu ia te ia. Sa ia faapea ona fai i Isaraelu uma na o ane i le faamasinoga a le tupu, ma ia faaliliu lea ia te ia o loto o Isaraelu uma.

I le f.9, o lo o talia ai e Tavita le mana'o o Apisaloma e pei ona tā'ua i ff.7-8. O lona mana'o ia tuu atu o ia e alu i Heperona e faataunuu ai lona mana'o na ia tauto ai i le Alii a o nofo ai i le nuu o lona tina i Suria. Pe a ia toe foi i Ierusalem, ona ia auuina lea i le Alii. Peitai i le f.10, o lo o iloa ai le mea moni oi lona loto. Ina ua tuu atu o ia e Tavita e alu, sa ia tuu atu le savali i itu aiga uma o Isaraelu ina ia o latou iloa – pe a latou faalogo i le leo o le pu, ona latou logo atu lea, o lo o ua tupu Apisaloma i Heperona. O nisi sa o ma ia mai Ierusalem sa latou le iloa le mea o le a tupu. Sa lagolago e Aitofele o le tulafale a Tavita le manao o Apisaloma. I ff.12-14, ua tā'ua ai le toatele o tagata ua lagolago ia Apisaloma, faapea le ta'u atu e le tasi tagata ia Tavita o le mea ua tupu. E le i toe faatali Tavita, 'a ua sosola 'ese loa ma ona tagata sa ia te ia i Ierusalem.

Ioe, na vaai tino Tavita i aafiaga o lona fesootea atu i nuu ese ma ia fai āva ai i o latou afafine. E le faapea e le alofa le Atua i tagata o nuu 'ese, a o le vavaeeseina o Isaraelu e le Alii ia tumau lona paia e tusa ma lona finagalo. O le tasi lea pa'u o le nuu o le Alii i le vaai a le Tusitala faa-Teuteronomi o le Tusi. Auā o le toto lua o le nuu e faalotoloto lua ai foi ma le ola faamaoni i faavae o le nuu mai le Alii.

Peitai e ui i nei faaletonu o Tavita ma Isaraelu seia oo lava i le toe a'e o le tafaega, ma lamatia ai lona filifilia faapitoa e fai ma tupu ma nuu paia mo le Alii, a o Tavita ma Isaraelu lava o lē ua filifilia e le Alii. E lamatia ae laveaiina, e tulieseae ae toe foi i Ierusalem, e peiseai ua leai se faamoemoe ae tumau pea le faamoemoe. Aiseā? Auā foi e leai se isi

malosi e oo lava i le oti na te mafai ona faaumatia lē ua filifilia e le Atua mo ana fuafuaga faaola mo tagata uma.

E faapefea la ona faasaoina i tatou mai faufauga a nisi ia suia o tatou tulaga ua tofia ai e le Alii? I le tala, o Apisaloma o se tagata e toto lua. E ui o le atalii o Tavita ae amio faanuu 'ese foi. E ita faamoemoe ma fasioti tagata. Sa ita Tavita i mea leaga na ia fai, ma ia sola ese ai ma nofo i Suria i le nuu o lona tina. E fai togafiti atamai na le iloa ai e Tavita le mea ua mana'o i ai lona loto. E ola le ava ma fouvale i matua. O nei amioga uma e fesootai ma le solia e Tavita ma Isaraelu o le faasa – ia le fesootai atu i nuu ese ina ia tumau pea le paia ma lo latou vavaeeseina mo le Alii.

Ui i lea, na lamatia Tavita ma Isaraelu i lea agasala, ae le i faaumatia ai, auā o ia o lē ua filifilia e le Atua. I le satauro o Keriso – ua lavea'i ai i tatou mai lo tatou lamatia pea e le pule a le agasala ma le tiapolo. O ā tatou mea sese ma agasala sa fai sa tatou pologa ai, a o le satauro o Keriso ma lona toetu, ua tatou toe maua ai lo tatou filifilia o fanau a le Atua na ia faia i lona faatusa ia paia ma lē pona ma ia foliga ia Keriso lo tatou Alii ma le Faaola.

### **GALUEGA FAATINO: Fetufaā'iga**

Ia fetufaa'i ma le vasega i mea o lo o lamatia ai lo latou ola faapaiaina ma vavaeeseina mo le Alii. *Faataitaiga:* (i). o le tekonolosi, (ii). tu ma aganuu mai fafo, (iii). o tuinanau ma manaoga ua ave i ai le faamamafa ma le tele o taimi o le olaga, ma nisi mafuaaga o silafia

**PESE:** Ia susulu atu o i tatou (363, Pese & Viiga EFKS).

### **A'OA'OGA**

1. E lamatia lo tatou ola faapaiaina pe a tatou le tumau i le Alii ma lona finagalo paia
2. Ia mataala i tu ma aganuu a le lalolagi e ofi mai ai tu ma aga faanuupo i mafaufau o ā tatou fanau
3. Faapalepale i vaivaiga o ē pele ia i tatou pei o Tavita.

**ASO SA: 15 FEPUARI, 2015**

**MATAUPU: APISALOMA, APISALOMA E!** (Absalom, O Absalom!).

**SINI:** Ia a'oa'o le vasega ina ia malamalama i le uiga o le tagi ma le auē o Tavita i lona atalii o Apisaloma – e ui ina leaga le mea ua fai e Apisaloma, ae sa mutimuti pea lona alofa ia te ia

**TUSI FAITAU:** 2Samuelu 18:31-19:8

### **FESOASOANI MO FAIAOGA**

O le mataupu o le igoa o le tagata o lo o ta'u faalua ma faaupu ofo (!). O le igoa o le tagata o lo o alaga ai se isi tagata i le tulaga ua i ai se faaletonu ua oo i lea tagata. Ma o le tagata o lo o alaga e foliga mai e latalata lona sootaga ma lē ua oo i ai se mea leaga. O le mataupu la – o le faaleoina o le faanoanoa loloto, ma loimata maligi. O upu ua faatino mai i fafo i aga ma loimata le alofa e le uma. Faataitaiga, o le alofa o matua i fanau. Pe leaga pe lelei ae 'a oo se mea leaga i le fanau, e tagi le fatu ma le eleele. E faanoanoa loloto ma aafia ai le tagata atoa. Ma e faagalogata auā o le fanau o le tofi, e ivi ma aano faatasi. O taimi e le gata o le loto faanoanoa ma faavauvau, a o le taimi foi o le toe tepa i le tiute faatamā ma faatinā i fanau pe na faatino pe leai. O taimi foi e pei ai o se ata faasolo i le mafaufau uiga ma amio o lē pele ua tuua le mafutaga.

O le Tusi Faitau o lo o faamatala ai e le Tusitala le oo atu o le tasi avefeau a Ioapo le taitai'au a Tavita e logo atu Tavita i le mea ua tupu ia Apisaloma lona atalii. Ina ua fai atu Kusi le avefeau a Ioapo ia Tavita o le tala ua ia aumai o le tala lelei, auā ua laveaiina o ia e le Alii i le aso nei ai lima o ē na tutu mai e tau ma ia, o le fesili muamua lava a Tavita, 'O saogalemu ea le taulealea o Apisaloma?' Na tali Kusi i le f.5e i le tulaga ua iloa ai e Tavita ua oo se mea leaga ia Apisaloma lona atalii. E ui na sauni Tavita e tau le taua ma Apisaloma ma Isaraelu, ae sa ia poloa'i i ana taitai au ma lana itu taua ina ia latou agamalu i le taulealea o Apisaloma (2Samuelu18:5e). O le atalii sa ia fai o ia ma tupu i Heperona

ma ituaiga e sefulu o Isaraelu. O le tala ua aumai e Kusi ua mutimuti vale ai le loto o Tavita le tupu. O le upu 'mutimuti vale' o le loto o le tupu – ua na o le pau lea o le natura o le alofa o le Atua e mafai ai ona alofagia ma ola lona atalii. Peitai ua leai se uiga faapea i ana taitai'au sa ia auuina atu e tau ma Apisaloma ma Isaraelu. Ua leai se agamalu o ona tagata i lona atalii. E ui na lavea Apisaloma i le tapeneto ma tautau mai ai, ae sa ola pea o ia. Atonu foi o lona manu'a lava lea e maluu ai peitai ua faaoo lava e Aapo ma ona tagata le oti ia te ia.

I le f.33 ua alu a'e ai le tupu i le afeafe o lona maota ua tagi ai, ma puaina mai ai i fafo i ona loimata ma ana upu faamomoloto lona alofa e le uma mo lona atalii. O upu iloga o le auega a le tupu, 'ta fia oti e sui ai oe'. O upu o le alofa moni ma faamaoni maumau pe ana fai lona ola e sui ai le ola o lona atalii. Ua tagi le tupu ma ua faanoanoa ina ua le pa'i atu lona alofa fua ma mutimutivale i lona atalii. Ae aisea ua le faapea ai ana taitaiu ma ona tagata?

I ff.1-6 o le mataupu 19 ua faamatala ai le uiga o le tagi a Tavita ia Ioapo le taitaiu, ma aafiaga o lea tagi i tagata o Tavita na o i le taua. E manatu Ioapo, ua fai lo latou manumalo ma mea ua faanoanoa ai le nuu uma. Ua o faagaoi le nuu i le aai pei ona o faagaoi le nuu ua maasiasi ina ua sosola i le taua. O aafiaga ia ua afua ai ona ulufale Ioapo i le tupu, ma fai atu ia Tavita ua ia faamaina i latou ina ua latou lavea'i ia te ia nai ona fili. O lona alofa ia Apisaloma o lona inoino lea ia i latou. 'Ana oti i latou po o ua lelei lea ia te ia.

Ua mae'a ona fai atu Aapo ia Tavita i a'afiaga o lona tagi ma ana auega i lona atalii i ona tagata, ona ta'u atu lea e Aapo o le mea o le a tupu ia te ia pe a le ia faailoa atu o ia i ona tagata (ff.7-8). Afai e le alu atu le tupu i ona tagata, e leai se tasi e nonofo ma ia pe a oo mai le pogisa. Ma e sili lea ona leaga i mea leaga uma na oo ia te ia talu lona taulealea. I le f.8 ua faailoa mai ai le lagona e le tupu o le fautuaga a Aapo lana taitai'au. Ua ia alu i le faitotoa ma nofo ai, ua o mai foi ona tagata i ona luma ina ua logo atu o lo o nofo Tavita i le faitotoa.

O le a se feau o lenei tala mo tatou i nei aso? Ioe, ua toatele fanau ua le iloa tulaga o matua i aiga. E le faaaloalo ma le ava. O nisi ua manatu ua le toe aoga se upu mai matua mo o latou lumanai. E fai lava le mea e loto i ai. O nisi matua ua manatu mamā iō latou tiute i fanau. O nisi ua sauā i

fanau. A leaga fanau ona tuli 'ese lea ma aiga. A o ai 'a maua i ai se mapusaga ma se lavea'i e mafai ona toe fuata'i ai olaga o fanau? Auā e fesili lava - o ai sona tinā ma sona tamā, o fea sona aiga, ma sona nuu? Ioe, fai Tavita ma faataitaiga lelei i matua ma tatou le fanau. Po o le a le leaga o fanau ma nisi tagata, ia tatou onosa'i pea e ala i le agamalu ma le mutimuti o le alofa. Faapei o Keriso, na matuā vaai tino i le leaga o ona tagata e oo lava i le fia fasioti ia te ia e ui ina leai sana agasala. Na oo lava le ita faamoemoe o ona tagata ma le lalolagi agasala ia te ia i lo latou faasatauro ia te ia, ae o ana upu mulimuli to ai lana manava, 'Lo'u Tama e, ia faamagalo atu .. auā ua latou le iloa le mea ua latou faia'. O le alofa e le uma o le Atua ma lona agamalu tainane lona alofa mutimuti ina ia ofo atu le ola paia o Iesu e sui ai le ola o ona tagata ua feagai ma le toasa atali ona o le pule a le agasala ma le tiapolo iō latou olaga. Le alofa mutimuti ma le agamalu lea o Tavita i lona atalii e ui i lona leaga na iloa i ana upu, 'ta fia oti e sui ai oe'.

**GALUEGA FAATINO:** Faatalanoaga

Ia fetufaa'i ma le vasega i le tūa o le agamalu ma le alofa mutimuti o Keriso, ma Tavita foi ina ia fai ma fu'a taualuga o lo latou ola ia Keriso. E tūa tele le fa'aali mai iō latou olaga ma ola ai. O a foi ni tulaga lelei o le a o latou mauaina.

**PESE:** Soma e, ia loto tele (169, Pese & Viiga EFKS).

### **A'OA'OGA**

1. Ia le uma le alofa i tagata ua fai fili mai ia i tatou
2. Ia agalelei ma agamalu pei o Tavita ma Iesu le Alii Faaola
3. 'Aua le agaleaga ma faasauā i fanau a isi tagata
4. Ave lou alofa fua ma mutimuti e ola ai nisi

**ASO SA: 22 FEPUARI, 2015**

**MATAUPU: FAAFETAI I LE ATUA MO LE MEAALOFA O LE FANAU** (Thanking God for the gift of children).

**SINI:** Ia a'oa'o le vasega ina ia malamalama - o i latou le fanau o le tofi o matua mai le Atua, ma ia faapea ona atoatoa ona lelei o la latou amio pei o le Alii na foa'iina mai i latou

**TUSI FAITAU:** 1Samuelu 1:20-28; 2:18-20

### **FESOASOANI MO FAIAOGA**

O le mataupu o lo o faamamafa ai le 'faafetai i le Atua mo le meaalofo o le fanau'. Aisea e tãua ai le faafetai, ma o le ā se sootaga o le faafetai ma le ola vivii i le Atua o Isaraelu? I le aganuu a Samoa o le faafetai o le tasi lea vaega tãua o le tu a ō tatou tagata i le va fesootai ai ma isi. E faaleoina le faafetai i upu, ae pogai mai i le loto ma le agaga ua lagona le pa'i mai o le alofa ma le agalelei e tusa ma le mea na naunautai i ai ia maua. E lagona le loto faafetai ina ua faamalieina le loto ina ua talia ma faamalieina le mana'o. O se manaoga sa fau po fau ao, sa taumate i le ete pe tua ma ni ā sona taunuuga, ae ina ua tau lau o le faamoemoe, e puaina mai i fafo le loto faafetai ma le ola vivii.

O Isaraelu e tafatasi i le Atua lona faamoemoe. O se mafutaga e faatotogaina e le Atua mea uma auā lona ola manuia ma saogalemu, tainane lona fa'aaogaina ma mea na te faia i aso uma i le feagai ai ma isi tagata, faapea lona Atua. O ā la valaauina taitasi, ma meaalofo ua atofaina mo ia valaauina, o le aga ma le tu a le Isaraelu o le faafetai i lona Atua. E pei ona i ai taulaga faafetai, e ese mai i taulaga mu ma taulaga togiola ma isi taulaga eseese. Ioe, ua le gata i upu le loto faafetai, 'a ua faatino i meaalofo sili ona lelei lo ola faafetai o Isaraelu i le Atua.

O meaalofo a le Alii mo ona tagata ua le gata i le manuia o lona siosiomaga i ana faatoaga, a o le ola maloloina i le tino, le mafaufau, ma le agaga. O le tagata atoa (tino, mafaufau, agaga) ua fai ma taulaga ola e fa'aaogaina i soo se tafa auā le finagalo paia o le Atua. O le Isaraelu ua

vavaeeseina ma ua faapaiaina e feagai ma le Atua paia i lona fa'aaogaina faapitoa o le malamalama e faamalamalama ai mea; o le aao faaola o le Atua mo mea na ia faia, tainane le tagata na ia faia i lona faatusa ia foliga ia te ia. O le lautele lea o le meaalofo. Ua oo lava lona faamatalaina i le tagata. Pei o le fanau, o le tofi (heritage) mai le Atua.

I Isaraelu, o le tofi e faasino i le fanua. 'A leai sou fanua ua leai sou lumanai ma sou faasinomaga. I la tatou aganuu e tãua fanua auā foi o le tofi mai le Atua. E te malu ai ma fai ma mitamitaga i le tagata. Na te teuteu, fa'aaoga, tiu ai ma ma malu ai. Ioe, o le fanua o le faailoga ua i ai lou faamoemoe. O le tofi e te tiu ai. E faselau (400) tausaga faato'a ave ivi o Iosefa i lo latou fanua i Kanana ma tanu ai i le mea o lo o lagomau ai ona tamā. Aisea? Auā foi o le fanua i Kanana o le tofi mai le Alii o ona tagata. Leitioa foi Napota a musu e ave lona fanua ia Aapo le tupu.

I le Tusi Faitau ua siitia ai e le Tusitala faa-Teuteronome le tofi o le fanua i le fanau. O le fanau foi o le tofi mai le Atua. Aisea? Ioe pei ā o le aogā o le fanua pei ona tã'ua, ae o lo o taatia ai i le fanau le faamoemoe sili atu o le mafutaga latalata a le Atua ma Isaraelu. Lea e saafi ai le fai-Salamo 127 ma faapea ana upu, 'o le fanau o le tofi lea mai le Alii'. Ioe, a leai se fanua e faasinomia se tagata Isaraelu. E maasiasi ma ulagia. Pei ā o Sarai i le ulagia o ia e le fafine pologa o Akara ma lana tama. Pei foi o Hana i le ulagia o ia e Penina ma lana fanau. Ui i lea ua manatu le Alii i le mana'o o Hana. E ui ina sa leai sana tama ma ulagia o ia e le isi fafine ma lana fanau, a o se tina e fiafia i le Alii ma ia tuuina atu lona mana'o i le Alii mo se tama. O lona mana'o ua tuufaafegai ma fuafuaga paia a le Atua, auā o le pule a le Alii na le fanau ai o ia. Ua tusa le mana'o o Hana ma le mauuluga o lona faamoemoe i le Atua. E ui i le tiga o lona loto i le ulagia ma peiseai ua tuulafoaiina, ae o se tina e faamoemoe pea i le Alii. Ioe, ua manatu le Alii ia Hana i le taimi tataua ma le taimi sa'o. Ua tali lona mana'o na tuu atu i le Alii. Ua alofa mai le Alii ma foai le tama mo Hana auā ua tusa le tele o lona mana'o ma le tele o lona faatuatua i le Atua. Ioe, e leai se mea e faigata i le Atua pe a tatou faatuatua ia te ia.



Ua fanau mai le tama tane ma ua faaigoa e Hana ia Samuelu o lona uiga, ‘ua faafogaina e le Atua’. Ioe, o ai se tagata ’a le fia fai tofi e tiu ai ma aliita’i ai? Ina ua te’a Samuelu ma le susu ona o a’e lea ma Elekana o Hana ma momoli atu le tama i le fale o le Alii pei ona sa tauto ai Hana i le Alii. O povi po’a taanoa e tolu, ma le efa e tasi o falaoa, ma le fagu pa’u o falaoa ua momoli atu ai Samuelu i le Alii – o le fua vaaia o le loto faafetai i le Atua. O le tasi o manu ua fasia, ma ua ofo atu ai le tama ia Eli le ositaulaga. Ua tuu atu foi e Hana Samuelu i le Alii i aso uma e ola ai. Se tinā alofa a o se tama foi ua fai lona ola ma taulaga ola e malie ma paia i le Atua. Ua ia auuuna i le Alii i aso uma; ua saunia foi e lona tina se ofu itiiti mona i tausaga uma e ̄ a’e ai e ave le taulaga i le Alii. O le meaalofoa e itiiti e le pei o le efota ie lino ua laei ai le tama. Tau o se mea e iloga ai lona loto faafetai i le Atua e tusa ma lona alofa mai.

Ioe, e leai se tasi e le faamemelo i sana fanau. Na te teuteu ma faapelepele ma tausii ma atiina a’e i faasinomaga auā le lumanai. O ai se ‘a le faafetai ma vivii, siva ma mimita ma faaneene auā o le tofi mai le Atua. I le satauro o Keriso ma lona toetu ua fai ai le tagata agasala ma fanau a le Atua pei o Keriso e ala i le loto salamō ma le faatuatua. Le fanua i Kanana sa fai ma tofi o Isaraelu lea ua siitia i le Kanana faalelagi le Ierusalema fou ua fai ma tofi o ē ua ta’ua o fanau a le Atua po o le Ekalesia. Ioe, o le Ekalesia o le tofi o le Atua ma Keriso lona Alo pele – o lana fanau faatuatua. Tatou faafetai ma vivii i le Atua e le aunoa i lona fai o i tatou ma ana fanau e ala iā Keriso lona Alo pele e toatasi.

#### **GALUEGA FAATINO:** Faatalanoaga

Fetufaa’i ma le vasega i le tāua o le fai oi latou ma meaalofoa i matua. Ia alolofa i matua ma ia matata’u i le Atua. O le fai oi latou ma meaalofoa i matua ma aiga mai le Atua ia faapena ona lelei o la latou amio i le itu faaleagaga, ina ia le uma le loto faafetai o matua i le Atua auā ua fai o latou ola ma faamoemoe ma lavea’i i aiga, a o se aiga ua fai ma aiga o Iesu e afio tumau ai.

**PESE:** Ia fai ma sulu e mumu (380, Pese & Viiga EFKS).

#### **A’OA’OGA**

1. Ia faafetai i le Atua mo le meaalofoa o le fanau
2. Ia mata’u i le Atua auā o oe o le tofi o matua mai le Atua
3. Ia ‘aua le sauaina fanau a nisi
4. Ia alofa faamaoni i fanau a isi tagata pei o lau fanau
5. E fai i tatou ma fanau a le Atua e ala i le loto salamō ma le faatuatua

**ASO SA:** 1 MATI, 2015

**MATAUPU:** O LE VALAAU IA LĒ USITAI I SE MEA SESE (The call to civil disobedience).

**SINI:** Ia a’oa’o le vasega ina ia malamalama, o le ola mata’u i le Atua e tāua lea, na i lo le usitai i se poloaiga lē tonu mai tagata.

**TUSI FAITAU:** Esoto 1: 15 – 22

#### **FESOASOANI MO FAIAOGA:**

O le nonofo ai o le fanauga a Isaraelu i Aikupito, sa molimauina ai e le tupu o Farao le sili ona toatele o tagata Isaraelu nai lo tagata o lona malo. A faatusa foi i le malosii, e sili atu lo latou malolosii i lo latou. O le afuaga lea o le ola pologa o le nuu o le Atua, ma ua faia ai e le tupu togafiti poto, e tuutiitia ai le faatupulaia o tagata Isaraelu i totonu o Aikupito.

O le tatou mataupu la o lenei Aso Sa, o lo o faatatau i se tasi o togafiti amioletonu, na poloa’iina ai e Farao ē na faatosaga i fanauga o fafine Epelu. O se poloā’iga sesē tele lea, auā e solia ai le tulafono mai le Atua Soifua, o le fasioti tagata.

O le faamatalaina o lenei poloā’iga lē alofa, pe afai e fanau mai se fafine Eperu (Isaraelu) o se tama, ona fasioti lea o lana pepe, ae afai o se teine,

ia faaola ia te ia. O le poloaiga lenei na taulamua ai fafine e toalua, o Sepela ma Pu'a. O le t'aua faapitoa o nei tin'ā i le tala, au'ā o i laua o ni tin'ā ola matata'u i le Atua, aemaise lo la loto tetele e liliuina le mea sesē, i le faasinoga tonu mai le Atua, ua la faatuatua i ai. O le galuega faa-fafine faatosaga, e le gata ina faa-fānau le fafine, ae tausia foi le pepe fou se ia malosi atoatoa lona tin'ā. O le tuuina atu atoatoa o ō la ola i lo la valaauina, o le tiute lea mai le Atua e ao ona la tausisi faamaoni i ai.

O le mea moni, e faateia Sepela ma Pu'a i le ave'a'i ua aumai i le tupu, i le suiga e ao ina aga'i i ai le faatinoga o le la galuega. Peitai, o lo la faatuatua i le Atua, na aumaia ai le malosi e teena ai le poloā'iga a Farao, ae faataunuu le mea sa'o ua la iloa.

E faapea lava vaaiga pi'opi'o o tatou molimau i ai i le olaga. Ua tele ina lolo'u ese e satani le mea moni i ala sesē, sei tino mai lona mana'o. Ua atili foi ona iloa e le pule le mea sa'o e fai, ae una'i pea le mana'o lasi ia tini taunuu le mea amioletonu.

O le usita'i i le pule, o se mea tataua lea. Peitai, e lē finagalo le Atua ia tatou usita'ia i latou ua i ai le pule, pe afai latou te faatonu i tatou ia faataunuu se amioletonu, ae lē o le upu a le Alii.

O le poto ma le fai mea tonu ua faatino ai le feau a nei tin'ā Epelu e to'alua, o lo la valaauina lava lea mai le Atua. O lona uiga, ia le faamalosi i la'ua ia faia i ni ala piopio le valaauina, ae ia faia ma le faautauta lelei e tusa ma le upu a le Alii.

E tele faataitaiga faapea o lo o molimau mai ai le Tusi Paia, ia i latou ua ofoina atu atoatoa ō latou ola ia ola ai isi tagata, ona o le ususita'i i le Atua Soifua. Fai ma faataitaiga:- (1) O Eseta ma Moretekai i le faasaoina o lo latou nuu o sa Iuta (Eseta 3: 2; 4: 13-16). (2) Sataraka, Mesako ma Apeteniko (Tanielu 3: 16 – 18), o ē na tutumau maua'a i le mea moni mai le Atua. A vaai ifo i pulega faa-le malo i le lalolagi, ua mafatia tagata lautele i le faailoga-lanu; ua vaaia pea faiga faa-pologa i tagata matitiva ma lē taualoa, aemaise foi sauaga i pagota i totonu o falepuipui. O nisi foi vaaiga ua iloa lautele i nei aso, o le sauaina lea o fanau ma tamaitai i totonu o aiga, nuu ma le lalolagi. Ua matuā matilatila lava pulega lē tonu au'ā ua anaana i pulega a tagata ae lafoa'i le Atua.

O le teena e fafine Eperu o le poloā'iga mai le malo, o lo la faatonutonuina lea o faasinoga lē tonu, mo ē fa'aauau lo la faiva i le

lumanai, aemaise o se fatu ia tupu ma ola ai se sa'olotoga mo Isaraelu e maua ai faamanuiaga mai lo latou Atua i le lumanai. O le suia o le fasiotia o pepe-tama, i le lafoina i le vaitafe, o se faasinoga lea ia Isaraelu, e tulimataia ai Mose i lona faiva faa-taitai malaga, e pei ona faailoa mulimuli ane ai e le Atua, a o lumanai le Esoto (Esoto 4).

Sa faamanuia le Atua ia Sepela ma Pu'a, e lē ona o lo la pepelo ma lē usita'ia le poloā'iga a Farao. Peitai, ona ua la faasaoina ola o fanau ola mamā. O le tulafono a Mose, e s'ā le pepelo. Ma e lē o t'ā'ua le pepelo i le tala, ae o le faamalosi o ō tatou loto, e taofia ai ma faasā ona fasiotia tagata lē sala ma agasala.

O le a'oa'o mai o lenei tala i'ā i tatou le fanau, o lo tatou vaai lelei lea i le t'aua o tin'ā i ō tatou aiga, nuu ma le atunuu foi. O ō latou faiva alofilima ma nafa tauave i so o se faalapotopotoga ua latou i ai, e mautū ma malosi, au'ā e ola tauivi mo mea lelei, sa'olotoga ma le fai mea tonu. A aunoa se tin'ā i se aiga e le maua se maopoopoga i ona itu uma. Ia a'oa'oina i tatou i le mea na faia e Sepela ma Pu'a aemaise o nisi tin'ā i totonu o le Tusi Paia.

#### **Uiga o Upu ma Fuaitau:**

- (i) faatosaga - O le fafine po o se foma'i na te faia le tiute o le faa-fanauina o se fafine.
- (ii) Eperu - Isaraelu

#### **GALUEGA FAATINO: Tali pupu'u**

Tali mai fesili o i lalo i ni fuaiupu se lua pe tolu.

1. O le ā le poloā'iga a Farao na tuuina atu ia Sepela ma Pu'a, e faafoe ai le galuega faatosaga?
2. Aiseā lava na lē usita'ia ai e nei fafine Epelu le poloā'iga a le tupu?
3. O le ā sou iloa, o le ā le tulafono se manū e soli e nei tin'ā pe ana usita'ia e faataunuu le poloaiga a le tupu?
4. E te manatua nisi tagata faapea i le Tusi Paia, faapei o Sepela ma Pu'a, o ē tutumau le faatuatua i le Atua Soifua?

5. O i ai ni mea tutupu faapea i le lalolagi, i ni poloā'iga lē tonu ua poloa'iina ai tagata mai taitai faa-le-malo?

\*\* (Tuu atu pea i lau susuga, tou te fefaasoa'i ai ma tamaiti i tali o fesili)

**PESE:** Pese ma Viiga 139

**A'OA'OGA:**

1. Usita'i i le Atua ae lē o tagata leaga.
2. Faamaoni i ou tiute.
3. Ia ola mata'u i le Atua.

**TATALO:**

Le Alii e, faafetai i le matou mataupu o lenei Aso Sa, auā ua a'oa'oina ai i matou, ina ia matou ola matata'u i lau afio i taimi uma. Ia e fesoasoani mai i lo matou vaivai, ina nei o matou taliaina faatonuga sese mai isi tagata, ona aveā lea ma ala o le malaia i o matou tagata talavou. Faamagalo i matou i lo matou lē mafaufau totoa i faatonuga mai tagata, ae ua faia lava i lo matou poto. O le matou tatalo lea, e ala atu ia Iesu Keriso lo matou Faaola. Amene.

.....

**ASO SA:** 8 MATI, 2015

**MATAUPU:** O LE TAGI A LE TAGATA UA LEAI SE MALOSI (The cry of the powerless).

**SINI:** Ia malamalama tamaiti, e faafofoga ma pa'i mai aao alofa o le Atua, i le tagata ua moomia se fesoasoani.

**TUSI FAITAU:** Kenese 21: 14 – 19

**FESOASOANI MO FAIAOGA:**

Ua molimauina e le tatou faalogo ma le maimoa i le TV, le loimata maligi ma le fetagisi āuēuē o nai tinā, ona o ā latou fanau pele ua pagatia i aafiaga o faama'i ogaoga, e pei o le HIV-AIDS ma le EBOLA ma isi. E lē gata i faama'i, ae ua faapea foi i fanau o lo o tauivi pea mo so latou saolotoga, mai saisaitiaga o le ola, e pei o le ola puleesea, le fia aai ma le fia maua o se vai taumafa. E faamomoi loto ia vaaiga faanoanoa, auā ua na ona latou faafeiloa'i atu ma loimata i nai a latou fanau, ae ua leai lava so latou faamoemoe, e toe maua mai lo latou ola maloloina. O ā latou lagona mafatia, o le faailoga ua lē toe aogā le ola mo ā latou fanau, aemaise foi i latou, auā ua o'oo'o tiga e lē gata i le tino, mafaufau, ae ua pā'ia foi le agaga. Afai sa puapuagatia Iesu ona o i tatou tagata leaga ma le agasala, o lona uiga, e sisila mai pea foi ona fofoga iō tatou mafatiaga, ma tutulu faatasi ma i tatou, a o tatou feagai ma puapuaga o lenei ola.

O le tuua e Akara ma Isamaeli o le aiga o Aperaaamo ma Sara, o le afuaga lea o le tatavale o le fatu o Akara, auā o le malaga fese'ai i le vao, ona o le lē iloa tonu po o fea 'a ā i ai. Ua uma meaa ma le vai, ona tuu lea o Akara o le tama i lalo ifo o le laau. Ua lafoa'i aupega, ua siilima ma savali ese, musu e vaai atu i le oti o le tama. O lana tagi leo tele, o le tagata lava ua leai se malosi. O loimata o le fafine ua na lē toe mafaia lava se isi sailiga e ola ai le tama. E oo lava foi i lona tiute faa-tausi fanau, ua pogisa i lona mafaufau, auā ua oona ma inu gatā le ipu o tiga.

Peita'i, e faafofoga lava le Atua iō tatou puapuaga ma tiga. O le tagi āuēuē a le fafine faatasi ma lana tama, na silasila lava i ai le Atua. E ui lava o i laua o tagata pologa, ae o loimata lava ua fesoatai atu i le lumanai manuia o Isamaeli, pei ona faataoto e le Atua i ana fuafuaga poto (Kenese 16: 10 – 16).

O le ola vavaeeseina o se tagata mai lona aiga, nuu po o se Ekalesia foi, e foliga i le poto faa-le-tagata, ua lē o toe i ai se aogā i lea tagata. E manatu foi, po o fea lava e alu i ai, e lē toe fia vaai i ai. Ua leai se alofa faamagalo, auā ua punitia le iloa loloto o mafatia ai le uso.

Peita'i, e lē faapena le fesoatai mai o le Atua, i le tagata ua leai se malosi, i le tino, loto ma le agaga. E tāua i le Alii tagata uma i lana silasila. Pe ma'i pe maloloina, pe agasala pe amiotonu, pe taualoa foi pe tuulafoa'iina ma faatauvaa, e faafofoga mai lava i so o se tagata.

O le tagi a Isamaeli, o loimata o le tuulafoa'iina ma le faagaloina. O loimata o le tagata ua muta le aogā, ua faasolo atu i le oti. O le alaga a le tagata leaga ua galala mo se amiotonu e ola ai. O le tagi auē a le tagata ua galala i le fia vaai atu i ni aao fesoasoani mai. E lē gata foi i lea, ae o le tagi e ta'utino i le Atua mafatiaga ua oo mai.

O le silasila faafofoga a le Atua i le tagata ua tagi ona ua leai lava se malosi o toe ia te ia, na te fesiligia ma toe avatu le tali moni, ina ia tupu ai le faatuatua ma le faamoemoe ola mai tiga ma faanoanoaga o le ola – “Akara e, ua faapefea ea oe? ‘Aua e te fefe, auā ua faafofogaina e le Atua le leo o le tama, i le mea o i ai o ia ....” So o se vaipanoa lava o lenei ola e fetiia'i ai le tagata ma mafatiaga ogaoga, o lo o i ai lava foi lo tatou Atua e lavea'i mai ma aumai le malosi. Le malosi foi lea na tula'i ai Akara ma toe siitia lana tama, o lona tofi mai le Atua faapei o se ū fanafana i le lima o le toa Isaraelu (Salamo 127:3 – 4). E faapena le pa'i mai o le Alii i le tagi a le tagata ua leai se malosi. E lē gata o faamanuiaga e maua (tupuga o nuu e tele), ae o le a faapupulaina foi e le Atua o tatou mata, tatou te iloa ai, ua na o Ia lava ma lana amiotonu tatou te mapu i ai i lo tatou galala i le fia maua o se malosi fou. Le amiotonu lea a le Atua ua tatau i le Ekalesia ona matuā folafola atu, i so o se vaipanoa e sauāina ai tinā ma fanau, ina ia malamalama tagata, e i ai le aiā tatau a tagata uma i le fuafuaga paia a le Atua, mo se lalolagi manuia. O le a'oa'o mai o lenei tala mo i tatou le fanau, e saga faamalositia ai lo tatou ola talitonu i lo tatou Atua, a o feagai i tatou ma le loimata maligi, ona o sauaga ma pulega faa-pologa i nisi o aiga aemaise lo tatou atunuu ma le lalolagi vevesi. E lē gata i lena, ae o le saisaitia ma le mamafatu o tauiviga o outou feagai ai i a'oa'oga. Peita'i a tatou tagi ma faamoemoe i le Alii, e faamanuia mai lava o Ia iā tatou taumafaiga.

O le tala i le manumalo o Iesu Keriso i le satauro ma le tuugamau avanoa, o le faamanatu lea ia le galo ia i tatou, auā sa avea o Ia ma tagata faapei ua leai se malosi. Peita'i o lona toetu, o le tino lea o lo tatou saolotoga mai le agasala ma tiga. O lona uiga e silafia e le Alii o tatou mafatiaga ma le loimata maligi, ma e tutulu foi o Ia faatasi ma tatou i ia taimi faigata o le ola.

### Uiga o Upu & fuaitau:

- i) faataua - taua'u
- ii) āueseina - tuuina atu e alu (ō)
- iii) talitali - sii a'e

### GALUEGA FAATINO: Tusiga Tala

Tusi mai sau molimau puupuu (tasi pe afa itulau le umi) e fa'aalia ai sou lagona, i sauaga o feagai ma tamaitai ma fanau, pei ona tatou maitauina i o tatou aiga ma nuu, tainane foi le lalolagi. Ia faasolo manatu fa'aalia i le faasinoga lea:-

- O le ā le sauaga o faataunuuina?
- O ai o faia nei faiga lē alofa?
- Aisea ua sauaina ai?
- O le ā se fofo e te silafia, e taofia ai nei sauaga?

**PESE:** Afio mai ia, Iesu e, (77, Pese ma Viiga EFKS).

### A'OA'OGA:

1. Ia tatou tatalo mo tinā, tamaitai ma fanau ua sauaina.
2. Faaloto tele i ou uso ma tuagane ua matua oti.
3. E silafia e le Alii o tatou puapuaga.

### TATALO:

Le Alii e, tatala o matou loto, ina ia matou lagona ai le tagi a nai o matou uso ua puapuagatia ua leai se malosi ia i latou. Fesoasoani ia i matou, ina ia tuuina atu o matou lima lavea'i, e faamafanafana ai ia i latou ua pagatia ma paū i le matuitui o sauaga. Ona o lou Suafa Iesu, Amene.

.....

**ASO SA: 15 MATI, 2015**

**MATAUPU: FINAU MA LE ATUA: O SE LĒ - ONOSA'I TONU**  
(Arguing with God: A Righteous Impatience) puapuagatia

**SINI:** Ia aoao le vasega ina ia malamalama i le uiga o lenei mataupu, o se lē onosa'i tonu (a righteous impatience). O lona uiga e lē o se lē migao ma se lē fa'aaloalo i le paia o le Atua, a o lona manatu o le taimi sa'o lea ua tatau ai ona aapa mai le aao o le Alii ia te ia lē ua ia filifilia auā o ia o le Atua osifeagaiga ma faavavau lona faamaoni ma lona alofa. Aapa mai la e faamagalō ana agasala ina ia lavea'iina o ia mai ona fili, le tagata amioleaga, le malaia ma le puapuaga, le oti ma seoli

**TUSI FAITAU:** Salamo 6:1 - 10

**FESOASOANI MO FAIAOGA:**

O le mataupu, 'Finau ma le Atua: o se lē onosa'i tonu'. O le fesili, E faapefea ona finau ma le Atua, a o ai e finau ma le Atua? Aisea ua avea ai le finau ma le Atua, o se lē onosa'i tonu pe tatau? Manatua o le onosa'i o le amio tatau a ē ua faatuatua i le Alii, ma o le fua foi o le Agaga. O le lē onosa'i – o le lē fa'aalia o lea fua o le Agaga po o lea 'amio tatau' (positive attitude) i ola o tagata o le Alii. Peitai o le mataupu ua fai ai le lē onosa'i ma mea tonu ma tatau pe a finau ma le Atua. O lona uiga, ua na o lē e finau ma le Atua e tā'ua o le lē onosa'i tonu pe tatau. Aisea? Auā foi ua na o ē faatuatua i le Atua ma amiotonu e finau ma le Atua.

Finau faapefea? Finau i le tatalo ma pese (salamo) po o auega (laments) foi e faailoa atu ai puapuaga ma le oti o lo o siomia o ia, po o tagata amioleaga foi o lo o ola fiafia ae o lo o ia faanoanoa ma ma'i ma puapuagatia a o ia o le tagata amiotonu ma faatuatua i le Atua. O le finau la ma le Atua, o se lē onosa'i tonu i le tulaga o tagata amiotonu ma faatuatua o le Alii. Ua peiseai ai ā latou salamo ma tatalo ma auega – o lo o latou finau ma le Atua. Peitai o se finau ua faailoa atu ai e tagata amiotonu ma faatuatua o le Alii ia te ia – lo latou tulaga ma'ale'ale ma

mata'eta'e ua se efuefu ma lefulefu lava i latou, pe a aunoa ma lona alofa tunoa ma muitmutivale. Ua latou i le tulaga o le oti ma le pa'ū atu i le tuugamau, ae ua na o ia lo latou Atua e maua ai lo latou lavea'i. Ma o le uiga lea o la tatou mataupu.

**Vaaiga lautele:-** O le Salamo o lo o fa'aalia ai lagona salamō o lē o ia usuina le pese, ona o ona sesē; (penitential psalm) ma lana aioi ina ia alofagia o ia e le Atua. O lo o fa'aalia foi e le Fai-Salamo i le pese lona faatauavaa, pe a fua i le tulaga faigata ua ia i ai nei, e pei ona iloa i lona lagona faanoanoa ua oo i ai; I le ma lenei lona naunautaga, ia tumau pea lona latalata i le Atua. E lē o fa'aalia i le pese (salamo) le mafuaaga o puapuaga o le fatu pese; ae po o le ā lava le mafuaaga, o le a lē afaina lea; Ae o le fatu pese lava ia, e saili lava i le Atua sona malologa, ae lē o se isi lava malosī.

O ff1-3, o lo o fa'aalia ai le talia e le fatu pese (Tavita) o le aao toto'o mai o le Atua ia te ia. Ae e ui i ia faigata, ae sa ia faatoga pea ma le loto talitonu i le Atua, e 'aia na te faatonu mai o ia i lona toasa tele.

O le f.6 ..., o lo o faailoa atu ai mea uma o i le loto o Tavita, faatasi ma le maligi o ona loimata; ma o le faailoga lea o lona faamaoni atoatoa i le Atua, tainane o le loimata maligi po o le tagi, o le faailoga foi o le lē onosai ma le loto tigā i nisi taimi. E faapea foi tatou, e mafai ona tatou faamaoni i le Atua, tusa lava po o ita ma lē mautonu o tatou loto, ona o le Atua e ati lana silafaga ia i tatou uma lava, ma o lona lea finagalō mo tatou, ia tatou oo i le mea e aupito silisili ona lelei.

O le Fai-Salamo e talitonu atoatoa i le malosī o lona Atua, o le ala lea e le mafai ai ona avea ia ma tagata ua taotaomia i ia tulaga po ua fuatia foi ma toilalo i le sesē o ana agasala. Ae ua ia faamaoni pea i le Atua, auā o le Atua na te liliuina lona loto, ae usiusita'i loa i le Atua ma lona agalelei.

O ff.2-5 o lo o atagia ai le faamamafa o tuliloa i le mataupu. Auā o foliga mai iinei, ua sa'i ma finau le Fai-Salamo i le Atua, - O le ā se lelei o i ai pe a a'u oti? O le ā? Auā e leai se tagata e mafai ona toe vivii ia te oe pe a oti! E leai sou viiga mai le tu'ugamau na o tagata oti o i ai!

Pei ua aumai e le pese lenei se faatagana mo tatou e finau atu ai i le Atua, auā o lona lava e sa'o pe a fua i puapuaga o tatou fetaia'i. A o le ala foi tatou te saga mautinoa ai, le alofa ma le agalelei o le Atua ia i tatou, ma lo tatou tulaga le tusa ma lona paia silisili ese.

I le satauro o Keriso ma lona toetu – ua mafai ai ona tatou finau ma le Alii e ala i le suafa o Iesu Keriso. Ua tatou toe lelei ai ma le Atua le Tamā e ala i le loto salamō ma le faatuatua i le suafa o Iesu. Po o ā la faigata ma puapuaga o le ola faatuatua i le Atua, e tā'ua a tatou tatalo ma valaau atu ia te ia mo se fesoasoani, o le lē onosa'i tonu (righteous impatience). Aisea? Auā e ui ina le tusa la tatou tali atu, ma lona alofa tunoa ua faaolaina ma valaauina ai i tatou, 'a ua tatou iloa lona alofa faamagalō ma faafou e ala i le loto salamō ma nutimomoia. Tatou te valaau atu la i le Atua le Tamā e ala i lo tatou Alii Faaola – ina ia faamagalō tatou sese ma faafou lo tatou ola faatuatua ia te ia, pei foi ona fai e le fai-Salamo.

**GALUEGA FAATINO: Taliga Fesili:** (Fa'aaogā lau Tusi Paia)

1. Ta'u mai ni fuaiupu se 2 o le tusi sa faitau nei (Salamo 6: 1 – 10), e te iloa ai le lē onosai tonu o le Fai-Salamo?

Tali: O le f (9) ma le (f.10) – aua ua faafofoga e le Alii le Atua lana tagi

2. Faamatala mai le mafuaaga o lau tali i le fesili muamua

Tali: O le (f.9), ua faafofoga le Alii i le finau a le faiSalamo. O le (f.10), ua tauia ē sa fai le faisalamo ma o latou fili.

3. O fea e puna mai ai le vaitafe o lofia ai le moega o le fai-Salamo?

Tali: O ona loimata, ma lona popole ma atuatuvaile.

4. O le ā le mea lea e atugalū ma popole i ai le fai-Salamo, nei oti ona lē toe mafai lea ona fai?

Tali: O le ola vivii i le Atua.

5. E faapefea ona e iloa, e le i oti le fai-Salamo i ona puapuaga sa fetaia'i ma ia?

Tali: O lo o iloa i le (f.9) – Ua talia e le Atua le tatalo a le fai-Salamo, ma na faafofogaina lana aioi, ma ua lē fano ai lona ola, ae ua saga faamausali ai lona faatuatua.

**PESE:** Tatou finau atu ia (176, Pese & Viiga EFKS).

**A'OA'OGA:**

1. Fiafia e vivii i le Atua e le aunoa
2. O le Alofa o le Atua e sili atu nai lo faigata o le ola.
3. O le finau ma le Atua i ou mana'o e ala i tagi (petitions), tatalo (prayers), auega (laments) - o le lē onosa'i tonu, pe afai o oe o se tagata mata'u ma amiotonu, ma tumau le faatuatua i le Atua
4. Ia faamaoni i le Atua i aso uma, ae le seiloga e oo mai puapuaga ona 'e faato'ā tapa lea i le Atua e lavea'i mai  
.....

**ASO SA:**

**22 MATI, 2015**

**MATAUPU:**        **UA SILASILA ATU I AI LE ATUA UA LELEI** (God saw that it was good).

**SINI:**                A’oa’o tamaiti ina ia latou iloa, o le lelei na faia ai e le Atua le sami ma le eleele matutū e tusa o lana silasila e le gata ona o se vaega o lana foafoaga, ae o lo o taoto ai ma le faamoemoe o le Atua, ina ia tumau ma fa’aauau pea lea lelei.

**TUSI FAITAU:**        Kenese 1: 9 – 12

### **FESOASOANI MO FAIAOGA:**

Vaai lautele:- O le tala atoa o le Foafoaga a le Atua, e pei ona faamauina i le tusi o Kenese, o lo’o atagia ai le potu ma le mataisau lēmafuaatia o le Atua; Aua e le gata ina faia e le Atua mea ia i ai i le lelei e tusa o lana silasila, ae o taoto ai foi ma lona faamoemoe, ia tumau ma fa’aauau pea lea lelei. Sa faia e le Atua mea taitasi uma lava i lea aso ma lea aso, sa ia faatulagaina foi mea taitasi uma i le mea e tatau ona i ai lea mea ma lea mea, e pei ona sa ia faia ai le sami ma le eleele matutu. O le māea foafoaina e le Atua o mea taitasi uma lava i aso e ono, na taatia mai ai loa le Foafoaga atoa, i se ata o se faatoaga matagofie, e fua mai i le fesootaiga faatasi o mea uma na faia.

O le foafoaga atoa foi, sa mamanu lava e le Atua na o Ia, i lana upu fetalai ma lana silasila atu. Sa fetalai atu, Ia i ai lea mea ma lea mea, ona i ai lava lea. Ua silasila atu i ai le Atua ua lelei, ona faapena lava lea. Ua ia fetalai atu foi, ia faapea ona fai ma fua mai o lea mea ma lea mea, ona taunuu lava lea.

I ff. 9 – 11 o faasino tonu i ai le mataupu o lenei Aso Sa, na fetalai atu le Atua i lana upu foafoa - Ia i ai le eleele matutū, ona i ai lava lea. Na silasila atu i ai le Atua ua lelei. Ua ia toe faatonu atu foi e faapea..., ia tupu le vao mu’a mai le eleele.... o ona fatu i luga o le eleele, i le ua faapea lava. O le foafoaga, o le ata o le Faatoaga matagofie, sa faato’a ma galueaina e le Atua le Faifaatoaga ia lelei, ma lona faamoemoe ia fua tele mai ma tumau le lelei. O le Atua silasila mamao, ua le na o le taimi nei ua faia ma foafoa ai, ae ia fa’aauau pea ma fua lelei mai i le lumanai.

Faamoemoe tāua:- ‘Ua silasila atu i ai le Atua, ua lelei’. O le atoatoa lea o le lelei e tusa o le silasila a le Atua, o lo o aafia ai ma le tupu mai o le vao-mua, le laau-afu, ma le laau e aina, ma le lelei tumau uma lava e fua mai i le eleele matutu. Faapefea? O le valaauina lena o le tagata. O le tiute lena o oe ma a’u, ma tatou uma. Tausi ma faapelepele ia tumau le lelei, ma fua mai pea i le matagofie i le laueleele, e pei ona faia ai ma foafoa e le Atua i le amataga.

O le valaau mo tagata uma e aafia ai ma tatou, ia tatou o faatasi ma le Atua i lea faamoemoe lelei, ina ia tumau pea le lelei o fua o le laueleele. E ono lepetia ma lamatia lea lelei o le foafoaga e le valea o le tagata ua lē pipii i le Atua e pei ona sa i ai le ulua’i tagata i le foafoaga i le amataga; peitai o i ai pea le alofa ma le potu o le Atua, e ala i le tagata talitonu ma faatuatua ia te Ia, e tausia ai pea le laueleele ia lelei ma matagofie.

O le faamoemoe lea o lenei meleniuma ua tatou i ai. O le sini autu foi o tulimatai, e pei ona sa faatāua e le fonu a le SIDS sa usuia i Samoa nei i le tausaga ua mavae 2014; auā o le a’afiaga o atunuu laiti ona o le suiga o le tau, e mafua uma mai i le faaeteete ma le faatamala o le tausiga lelei o le laueleele ma le siosiomaga o i ai. Ae o le finagalo lea o le Atua, Le na silasila i le lelei, ma e finagalo foi ia tumau lea lelei.

Na iloatino le lelei atoatoa o mea na faia e le Atua i le satauro o Keriso ma lona toetu. Ua tatou toe foliga ai i le faatusa o le Atua na ia faia ai i tatou e ala i le loto salamō ma le faatuatua i lona suafa. Ma o Keriso la ma lo tatou fai o ia ma o tatou Alii ma Faaola – ua silasila mai ai le Atua iō tatou tagata faatauvaa ua lelei. Ua suia e Keriso ua tatou faatuatua i ai lo tatou leaga sa i ai i le foliga ia te ia. O lo tatou toe lelei ma le Atua ia Keriso ua lelei ai foi ma mea uma na faia e le Atua ma lelei i le amataga. Auā o lo tatou leaga ma le lē lelei, ua tatou faaleaga ai le siosiomaga lelei ma aogā mo tagata uma. O ā tatou agasala foi e malaia ai foi ma le eleele ma le siosiomaga atoa ma ē ‘e fesootai ma i tatou. Ioe, tatou talia i le loto salamō ma le faatuatua le leleiga ua faia e Keriso e ala i lona soifua paia. Talia faapefea? E ala i le ola ia Keriso ma savavali i la le Agaga.

### Uiga o Upu ma Fuaitau:

1. laau afu - o laau e iloga vaitaimi e totogo ma lauusi mai e iloga foi taimi e toulou ai lau ma foliga ua mamate.

### GALUEGA FAATINO:

Ua tu'uina atu i lalo fesili ma tali tou te fetufaa'i faatasi ai ma le vasega, e te silafia ai ua malamalama i le mataupu, ma ua fai se aogā mo latou silasila i le faamamafa (\*\*\*) o i lalo mo le faiga o le galuega faatino.

1. O ai na fetalai i ai le Atua, e alu e fai mea ia o faatonu mai i le f.9 e fai?

Tali: E leai se isi! (O le tali sao lava lea, auā e le'i tau atu se isi e faatino le faatonuga a le Atua, auā o le Upu fetalai a le Atua, o i ai le mana ma le malosi e tino ai lava so o se mea o finagalo ai, e aunoa ma le tau alu o se isi e fai)

2. O mea na faia i le aso tolu o le Foafoaga, o ni vaega tāua tele mo lo tatou ola faa-le-tagata. Afai sa lelei i le amataga ina ua faato'ā faia e le Atua; o le ā sou iloa i aso nei, o tumau lea lelei pe leai?

Tali: E leai, e le o tumau le lelei e pei ona sa i ai i le amataga.

3. Faamatala mai le mafuaaga o lau tali.

Tali: (E lē o toe lelei e pei ona sa i ai i le amataga. Ua lē o toe mamā, auā ua faaotaota tagata i le sami, ua le o toe tamaoiga auā ua lepetia e tagata lona matagofie, ma le oa e maua mai ai, e ala i vailaau oona, mana'o le fuafuaina, ma nisi. O le laueleele foi ua tele lona lepetia ma laau o le vao o i ai, lea ua fua mai aafiaga matuiā o le tau ua i ai nei, ua a'afia ai le tagata)

\*\*\* E faamoemoe lau susuga i le Faiaoga, e te le lauina tali o puipui atu i tamaiti, ae e te ave le fesili i ai, ma tu'u i ai le avanoa e tali mai, ma e faatusatusaina i tali o avatu. Afai e tali mai se isi i le fesili 2, o lo o tumau lava lea lelei, ona e ave foi lea i ai le avanoa e faamatala mai le mafuaaga po o le faamaoniga o lana tali. E te faia foi nisi fesili ma tali mai latou. 'A fesili mai foi latou, o oe e te talia. O le agaga lea o le

fetufaa'iga o manatu ai, e te silafia ai ua aogā lou tautigā ina ua latou malamalama.

**PESE:** O oe o lē Atua (246, Pese & Viiga EFKS).

### A'OA'OGA:

1. E lelei mea e fai e le Atua.
2. O tatou o tausi-mea a le Atua.
3. E leaga le paiē ma le faatamala.  
.....

**ASO SA:** (Aso Sa Laupama) 29 MATI, 2015

**MATAUPU:** TAPUA'I I LE TUPU (Worship the King).

**SINI:** A'oa'o tamaiti ina ia latou iloa, o le faafeiloā'iga o Iesu e tagata e ala i lo latou alalaga faapea; Osana! Ia manuia lē afio mai i le suafa o le Alii, ma lo latou aumai o laupama iō latou lima o le tapuaiga lava lena ma le faaeaea ia te Ia. Peitai, ia faamalamalama lelei i tamaiti le uiga loloto ma le moni o le tapua'i. O le ō mai lea ma ō latou loto faamaoni e talia ai le tupu.

**TUSI FAITAU:** Ioane 12: 12 – 18

### FESOASOANI MO FAIAOGA:

Vaaiga lautele:- O le Aso Sa lenei tatou te tā'ua i tausaga taitasi o le Aso Sa o le Laupama, po o le Aso o le Malaga Faatupu a Iesu i Ierusalem. E ala ona tā'ua o le Aso Sa o le laupama, ona o le pama le laau e ola tele i ia nuu, lea sa fati e tagata ō latou lau e fola ai le ala, o isi e umia ma talotalo ai ia Iesu a o afio atu o Ia. O le malaga lenei a Iesu, o lo o



molimauina ma faamauina foi e le au fai-Evageia uma e toa fa; (Mataio 21: 1 – 11; Mareko 11: 1 – 11; Luka 19: 28-44)

O le molimau a Ioane e pei ona sa tatou faitauina nei; (Ioane 12: 12-18). O lo o tumutumu Ierusalemā i le vaiaso tonu lea, auā o lo o gasolo uma i ai tagata, o iina e fai ai le sauniga ma le aiga faapitoa e faamanatuina ai le Faaolataga na faia e le Atua. (Paseka-Pastoral lamb). Ua leva ona faatali tagata e fia vaai i lo latou tupu o Iesu pe a afio atu, auā o ia o lo o manatu le toatele na te faaolaina le nuu. O le mafaufauga foi lea o mafua ai ona faatali ma le manatu, e afio atu Iesu i se kariota malosi, ae ua faateia i le afio atu, o tietie atu i le tama'i asini. Ina ua faalogo la tagata sa tumutumu i Ierusalemā, o Iesu lea ua afio atu, na latou fati loa lau o pama, ua umia ifo iō latou lima, ua talotalo e faafeiloa'i ai le afio atu o Iesu, ma alalaga faapea – "Osana! Ia manuia le o afio mai i le suafa o le Alii." O le iuleo o alalaga ai tagata, ma laupama ua latou umia ma talotalo ai e faafeiloai le afio atu o Iesu. O le fa'aaliga lava lea o lo latou loto faafetai ma le agaga tapua'i i le tupu ua afio atu.

Itu faamamafa:- O le itu tāua e fia faaamamafaina, ma tuliloa i lenei Aso Sa o le laupama. "O le agaga e faafeiloai ma tapuai ai tagata i le tupu ua afio atu..." Ua manatua vave iinei le tala i le fetalaiga a Iesu ma le fafine Samaria i luga o le vaieli (Ioane 4: 20 – 23). Ua alu atu le talanoaga, ua le maua lava e le tinā Samaria lea se vaipanoa e sao ma manumalo ai ia Iesu, ona nofo lea ma mimilo le talanoaga i lona fesili atu ia Iesu e faapea; "O fea le mauga tou te tapuai ai?" O la Iesu i le fafine; "Funa e, talitonu mai ia te a'u, e o'o mai ona aso, tou te tapuai i le Tamā e le gata i lenei mauga, po o Ierusalemā .... O ē tapuai faamaoni, latou te tapuai i le Tamā i le agaga ma le faamaoni. Auā o lo o saili le Tamā i ē tapua'i faapena ia te Ia." (4: 21 - 23)

O le tapua'i i le Tupu, o le tapuaiga e fai i le agaga ma le faamaoni. (To worship the King Jesus is to worship Him in spirit and in truth)

Le fanau ma tatou uma, e tele lava mea eseese tatou te tapenaina ma faatino e faailoa ai lo tatou ola vivii ma tapuai i le Atua. O le vaiaso Paia lenei, o lenei Aso Sa, sa potopoto le au-tapua'i i Ierusalemā, ma sauni e faafeiloa'i le afio atu o le Tupu o Iesu i le tama'i asini, e pei ona tā'ua e le perofeta o Sakaria (Sakaria 9:9). O le tapua'i moni lava, o le tapua'i i

le loto faamaoni, auā o lo o saili le Tamā iē tapua'i faapena ia te Ia. E pei ona aumai ā outou laupama, e faafeiloa'i ai le afio atu o Iesu, ae ia silisili lava i le loto faamaoni.

'A le salamō le loto ma faatuatua i le suafa o Iesu na maliu i le satauro ma toetu – e maumau le taimi e alu ai i le lotu. E leai foi se loto fuatiaifo lelei e foa'i ai se mea lelei ma sili atu mo le Alii e viia ai lona alofa. Ua na o le ola sisi'o ma le faaulumalo e ola le popole ma lē kea.

#### **GALUEGA FAATINO:**

1. Faatino sina vaaiga pu'upu'u (skit) le vaaiga masani lava o le malaga a Iesu. (Taumafai e faatino le faamamafa o lenei aso e pei ona aumai e Ioane. (sua laupama i loto ua salamō faamaoni).
2. Fai lava e lau susuga ni nai fesili tou te fetufaa'i ai ma tamaiti, e te silafia ai ua malamalama.

**PESE:** Ia 'e afio mai (147, Pese & Viiga EFKS).

#### **A'OA'OGA:**

1. Ia tapua'i faamaoni i le Alii.
2. O le tapuaiga e tāua le vaiaga i fafo, ae sili atu le fia silasila o le Alii i totonu i le loto faamaoni
4. Faailoa atu le loto faamaoni i sau meaalofa lelei e ave mo Iesu ma lana Ekalesia, ae le na o upu ma tala

#### **TATALO:**

Sauni ane e lau susuga se tatalo e faaiu ai lenei taeao. E le faatonuina le tofā, ae na ona faamanatu - Faamamafa le tapuaiga i le agaga ma le faamaoni; ma aioi foi e faamagalō le ola ua na o le faafoliga, ae leai se moni o i ai i loto.

.....

**ASO SA:**

**(Aso Sa Eseta/Toetu) 5 APERILA, 2015**

**MATAUPU:**        **O LE TUUGAMAU TUUFUA O LE ESETA**  
(The empty tomb of Easter).

**SINI:**            Ia a'oa'o le vasega ia malamalama, ua avanoa le tuugamau ua le o i ai Iesu i le taeao o le Eseta, ona ua toe tu o Ia mai le oti ma le tuugamau.

**TUSI FAITAU:**    Ioane 20: 1 – 9

### **FESOASOANI MO FAIAOGA:**

I le tatou aganuu Samoa, a oo ina mananao aiga e toe lalaga tuugamau o latou alii tāua po o matua foi ua leva ona maliliu mo le tuuina i ni loa o aiga po o ni tuugamau fou faanei ona po. E lalaga atu lava o i ai lava ponaivi o ia tagata maliliu.

Peita'i, o le taeao o le Eseta le lona tolu o aso talu ona maliu ma tanumia Iesu i le tuugamau, e oo atu Maria le Makatala i le tuugamau, ua vaai atu i le maa ua aveeseina i le tuugamau. Ona momoe lea o ia, ua alu ia Simona Peteru ma le tasi so'o sa alofaina e Iesu, ua fai atu ia te i laua, 'Ua latou aveeseina le Alii i le tuugamau, matou te le iloa foi le mea ua latou tuuina ai o ia'.

E matuā le talitonuina lava se tuugamau ua tuufua ua le o i ai le tino oti na tanumia ai, aemaise faato'ā tolu aso talu ona tuuina i ai. I le manatu faaletagata, afai ua leai le tino maliu o Iesu i le tuugamau, o lona uiga e i ai le mea ua tupu. Ua ave'esea faalilolilo e ni tagata le tino maliu, ma tuuina i se isi nofoaga. A o le talitonuga lava lea, na puna ae i loto o tagata Iutaia, latou te le talia ai Iesu o le Mesia na valoia, o le Alo o le Atua. O Iesu e le i toe tu mai, na gaoia e ona so'o i le po, a o leoleoina e fitafita Roma le tuugamau. E le mafai foi ona talia e le lalolagi o tagata, se manumalo e faatinoina mai le lagi. Auā foi, e mana'o lava tagata e vaai atu, ua matuā masofasofa isi tagata i auupega mata'utia, ma matuā faatoilaloina ai, ma maua ai le manumalo.

O le tuufua o le tuugamau, ua le o i ai Iesu, o se folafolaga ua faafia ona tautala atu ai Iesu i ona so'o. A folafola mai e le Atua ana fuafuaga e faatinoina e mautinoa lava lona faataunuina.

A lea ua tino mai i le vaveao o le vaisapati. Ua tuufua le tuugamau, ua le o i ai Iesu, 'a ua toe tu mai o Ia. Auā o Iesu o le Atua lava ia, ua liutino tagata. O le Atua o le ola uma lava. E le o se Atua mo ē oti, a o ē ola. Fetalai le Atua ia Mose, (Esoto 3: 14) O A'U O LĒ OLA, O LO O OLA LAVA. (Ioane 8: 58) O A'U O LĒ OLA, A O LEI OLA MAI APERAAMO.

O le faatuai ona talitonu o le au so'o ma fafine na o e asi le tuugamau ua toe tu Iesu, ona o lo latou manatu i fetalaiiga fai so'o atu a Iesu e uiga i lona maliu ma lona toe tu mai, o ni tala faataoto ma ni tala faatusa. O fafine na o e ave mea manogi i le tuugamau, e le i o e vaai Iesu po o ua toe tu, ae na o e ave mea manogi, auā o lo latou manatu e tumau ona i ai pea Iesu i le tuugamau, e pei o le toatele o tagata ua tanumia i tuugamau.

O le taunuu atu o Peteru ma le tasi so'o na alofaina e Iesu i le tuugamau, ua talitonu ai ua le o i ai Iesu i le tuugamau. Ua su'esu'e ma vaili i ie na tanuma'i ai Iesu, ma le solosolo sa i lona ao, ua ta'ata'ai ma tu'u i le isi mea. O le faailoga lea e le i gaoia e ni tagata le Alii. 'A ua toe tu mai o ia.

O le taimi lea na amata mapuna lemu a'e ai i le manatu o Peteru i fetalaiiga a Iesu, e faatautu i lona maliu ma lona toe tu mai, a o latou i ai ma Ia i Kalilaia. A o le so'o na alofaina e Iesu, ua ulufale i le tuugamau ua tuufua, ua na o ie na tanumai ai, ua ta'ata'ai, talitonu loa. E le i toe fesiligia e lea so'o le vaaiga ua ia molimauina. Ua ia mautinoa i le faatuatua ma le talitonu ua toe tu Iesu.

Ua tuufua le tuugamau, o le faamaoniga ua toe tu Iesu. O le taunuuga o mea ua tusia i le Mesia i tusi uma, amata mai ia Mose ma le au Perofeta uma. O le tuugamau tuufua, ua faailoa mai le manumalo a'ia'i o le Atua e ala ia Iesu Keriso i mea uma i le lagi i luga, ma le lalolagi i lalo nei. E le mafai e le oti ona manumalo i le Atua e ala ia Iesu Keriso, auā o le puna ma le pogai o le ola. O lona suafa, O LĒ O LO O PEA, E OO MAI NEI O LO O OLA LAVA.

O le uiga lea o le tuugamau tuufua, e le sailia i ai le ola pea nai ē ua oti. O le nofoaga e le toe maua i ai le oti, a o le ala e ulufale atu ai i le malo o le Atua e ala ai pea e faavavau.

### **Uiga o Upu**

- i) vaisapati - aso e va ai le isi sapati ma le isi sapati
- ii) tanuma'i - faapulou
- iii) ta'atā'ai - gaugau

**GALUEGA FAATINO:** Faatino le tala

**PESE:** Sauni ia le pese fou (51, Pese & Viiga EFKS)

**A'OA'OGA:**

1. E toe faaola mai le tuugamau tagata faatuatua.
  2. Ia talitonu ma le faatuatua, ua toe tu Iesu.
- .....

**ASO SA: 12 APERILA, 2015**

**MATAUPU: O LE NOFOAGA MO FAAMAFANAFANAGA**  
(The place of counseling).

**SINI:** Ia a'oa'o le vasega ia malamalama, o le maota o le Atua o le nofoaga mo faamafanafanaga.

**TUSI FAITAU:** Ioane 14: 1 – 4

**FESOASOANI MO FAIAOGA:**

Ua tatou iloa ma mautinoa, e le faia faalua e le Atua se mea. E le toe faia foi e le Atua se mea ua uma ona fai. O le Atua e mae'ae'a ma atoatoa mea uma na Ia faia i le matuā lelei mai lava i le amataga o le foafoaga o mea uma. E le fa'aafaafaina ona fai e le Atua se mea. Ua saunia ma atoatoa tapena ana faatinoga uma.

O le vaega o le tusi faitau o le tusi a Ioane 14 na tatou faitauina sona vaega, o nisi o upu taumavae a Iesu i ona so'o. O fetalaiga a Iesu e faalototele, ma faamafanafana atu ai. Auā ua tumu i latou i loto faanoanoa, ina ua faailoa atu i ai e Iesu, ua oo mai le taimi e tuuina atu ai

le Atalii o le tagata, i tagata agasala ia fasiotia, 'a oo i lona aso tolu, ona toe tu mai lea o Ia.

E ui lava ina atu ma mafatia Iesu, i ona puapuaga ua aga'i mai ae sili ona mafatia alofa o ia, i lona alofa i ona so'o, ona o le faanoanoa mafatia o ō latou loto, i le taunuuga o le a oo i ai lo latou Alii. Ua silafia lelei e Iesu le mafuaaga ua faanoanoa ma mafatia ai ona so'o. Auā, o lo o faatalitali pea le 'au so'o i le taimi e tula'i mai ai Iesu o le Mesia na valoia, na te matuā faatoilaloina ai filii uma o Isaraelu. Peita'i, o lea ua fetalai tu'usa'o atu lava le Alii o Iesu e ao ona tu'uina atu le Keriso i lima o tagata agasala e tiga ai ma faasatauroina, ona oo ai lea i lona mamalu.

O le uiga ma le aano moni lea o fetalaiga a Iesu i ona so'o, e pei ona tatou faitauina. 'Aua le atuatuvaale ō outou loto, ia outou faatuatua i le Atua, ia faatuatua mai foi ia te a'u. E tele mea e nonofo ai i le maota o lo'u Tamā, ana leai, po ua ou fai atu ia te outou, ou te alu e sauni se mea e nonofo ai outou?

O lea lava fetalaiga a Iesu, ua matuā faailoa manino atu ai i le au so'o, o le malo o Iesu, e le o se malo faalelalolagi. O le malo o Iesu, o le malo o le Atua. O le malo o le lagi lava lea. Ua faatatauina le malo o le Atua, i le maota po o le fale o lona Tamā. Ia faigofie ona malamalama i ai le au so'o, o le fale e mapu i ai tagata uma o le aiga. E maua ai i le ola faasaoina mai matagi ma timuga. O le nofoaga e maua ai le filemu, ma so o se mea, meaai ma vaiinu mo le faafouina o le malosi. O le nofoaga o faamafanafanaga, aemaise o le malologa lelei mai tiga o feau na feagai ai.

O le nofoaga mo i latou, ua sāuaina ma faapologaina e le lalolagi, ona o lo latou faia o le amiotonu a le Atua. O le nofoaga foi lea, po o le maota o lona Tamā, mo ia pe a mae'a ona Ia faatinoina le finagalo alofa o le Atua mo le faaolataga o le lalolagi.

E ui i le mamafa ma le ogaoga o puapuaga o Iesu, o lo o agai mai, 'a ua le tuua lava e ia lona au so'o i lo latou fememea'i. Ua ia avatu ia te i latou le faamalosi ma faamafanafanaga o le mautinoa, e le lafoa'iina i latou e le Atua. E i ai pea o Ia faatasi ma i latou, o le ala ua uma ona Ia uia, ma o le a fa'aauiu atu i ona puapuaga, o le ala lava lea e tau atu i le maota o lona Tamā, o le malo o le Atua faavavau.

E le mafai e tagata o le lalolagi ona ui ai. Ua na o tagata ua faafitia e i latou, latou lava ma mulimuli ia Iesu ma 'ave o latou satauro, e ulufale i le maota po o le fale o le Atua, o lona malo faavavau. O le faamalosi ma le faamafanafana lea a Iesu i ona so'o. A o le faalaeiau foi lea mo tatou uma. Ia punonou ma auauna i mea lelei uma mo le Atua ma ona tagata puapuagatia uma, auā tatou te ulufale i lona maota i le lagi, o lona malo lava faavavau.

**GALUEGA FAATINO:** Saunia ni fesili e fetufaa'i ai i le mataupu

**PESE:** Come & Go With Me To My Father's house

**A'OA'OGA:**

1. Afio mai Iesu ina ia tatou ulufale i totonu o le maota o lona Tamā.
2. 'Aua le masalosalo i le galuega faaola a Iesu.
3. Maota o le Atua e maua ai faamafanafanaga.

.....

**ASO SA:** 19 APERILA, 2015

**MATAUPU:** O Ā NI TAUNUUGA E MULIMULI MAI?  
(What appears on the bottom line?).

**SINI:** Ia a'oa'o le vasega ia malamalama o le valaauina i so o se galuega, o lona taunuuga e mulimuli mai, e tāua tele lea.

**TUSI FAITAU:** Isaia 5: 1 – 7

**FESOASOANI MO FAIAOGA:**

Fai mai le Salamo 127: 3, "Faauta, o le fanau o le tofi lea mai le Alii, o ē ua fanau mai, o le tau lea mai ia te ia. O le valaauina lea o matua mai le Atua, ina ia opoopo lelei fanau, faafai lele, faatonu, faasino ma a'oa'o lelei i amio e ola ai. Auā afai e alolofa faamaoni matua i fanau, e manuia foi i latou i le lumanai. O fanau o le tofi mai le Alii. O lona uiga

e galue punoua'i matua i lona tiute o le tausī faamaoni i fanau. O ē ua fanau mai, o le tau lea mai ia te ia. O lona uiga, afai e manuia fanau ona o le tausī faamaoni a matua, e na te inu malie, ma 'ai maona i faamanuiaga mai le Atua ona o fanau. O matua ma fanau, o le tovine lava lea, a le Atua o au.

E foliga faapea le uiga o le pese a le perofeta o Isaia e pei ona tatou faitauina. O le tovine a le Atua o 'au, o lo o faatatauina ia Isaraelu ma Iutaia. O le nuu na filifilia e le Atua mo Ia, ae o Ia e fai mo latou Atua. Sa tausī ma vaai faalelei e le Atua, e pei o se faifaatoaga vine lelei. Ua ia le mapu ona teuteua ma faasūsū ma auau ese ma'a ma mea e lamatia ai le ola lelei o laau o vine. A o le taunuuga ua mulimuli mai, ua na o vine ua fua mai i fua leaga.

E faapena le tausiga e le Atua o lona nuu. Sa ia fafaga i ana Afioaga paia. Na ia faatonu i ala o tulafono e maua ai le ola. A fia feinu, e na te faatafe mai le vai i papa e feinu ai. A fia aai na te auina mai le manai mai le lagi e aai ai. E na te leoleo ia i latou mai mea leaga uma e fano ai latou.

O le finagalo maualuga o le Atua, ia fai lona nuu ma ona malamalama, e susulu atu i le lalolagi uma, ina ia tosina mai nuu uma ia Isaraelu, ina ia mafai ona o mai ia avea ma nuu e tasi ma aiga e tasi, ae fai le Atua o au ma Atua e toatasi.

Peitai, ua 'ese mamao le taunuuga ua mulimuli mai i le olaga o Isaraelu ma Iutaia. Na fia silasila mai le Atua, i faamasinoga tonu, 'a ua leai, ua na o le faasauā, ma le faapologaina o tagata lautele o le nuu. Ua saili a latou mea i le afu ma le malosi o tagata. Ua fia silasila mai le Atua i le amiotonu o faatinoina i totonu o lona nuu, 'a ua leai. Ua na o le oi ma le uiō ua vaai, auā ua pulea i le lē alofa le nuu e ona taitai.

O le uiga lea o le pese i le tovine a le Atua, ua pese mai ai le perofeta o Isaia ia Isaraelu ma Iutaia. O le taunuuga, ua mulimuli mai, o le faatafe lea i Asuria ma Papelonia. E faatafunaina foi le nuu atoa.

Ioe, e faapenā foi matua le taunuuga e mulimuli mai, pe afai tatou te lē faamaoni i le tausiga o fanau. Fai mai le Teuteranome 28: 4, E manuia oe i lau fanau, ma le fua o lou laueleele, pe afai e te tausī faamaoni i fanau. Ia a'oa'o le tama e tusa ma ona ala a matua e lē toe te'a ese ai lava. Fanau, ia outou fiafia ia Iesu lo tatou Faaola, auā o Ia lava na te aumaia

manuia mo i tatou. O ia lava tatou te taunuu manuia ai i taimi e mulimuli mai.

**Uiga o Upu:**

1. tu'ugāuaina - o le mea e teu ai uaina.
2. āi - tatupu o le vine
3. uiō - o le oi.

**GALUEGA FAATINO:** Fetufaā'i ma le vasega i ni fesili i le Tusi Faitau

**PESE:** Iesu e, o lou tovine (324, Pese ma Viiga EFKS).

**A'OA'OGA:**

1. Ia faamaoni i so o se mea e fiafia le taunuuga mulimuli.
2. Ia fua mai le amio lelei.
3. Lulu ma le faamaoni, e selesele ma le fiafia.

.....

**ASO SA:** 26 APERILA, 2015

**MATAUPU:** ITAGIA IESU MA LONA AU SO'O  
(Hatred for Jesus and his disciples)

**SINI:** Ia a'oa'oina le vasega ina ia talitonu ma malamalama lelei, o le ola talitonu ma le avea ma tagata o le Alii, e inosia ma itagia e le to'atele.

**TUSI FAITAU:** Ioane 15:18-21.

**FESOASOANI I LE FAIAOGA:**

O le avea ma tagata Kerisiano faamaoni, e le o se mea sa faigofie lona faatinoina, mai lava i le tala faasolopito o le ulua'i Ekalesia, se ia oo mai lava i le taimi nei. I le ulua'i Ekalesia, sa tele le soifua ma le ola sa maumau ai, aemaise lava i le tagata ua tumau lona talitonu ma lona faamoemoe, i le avea ai ma tagata Kerisiano.

O le mataupu o lenei Aso Sa, o lo o apoapoa'i atu ai Iesu i lona au so'o, e uiga i le faafitauli o le a faafeagai i le lumana'i, ma le galuega tala'i o lo o fia ta'u atu i le lalolagi, e uiga i le talalelei ia Iesu le Alo o le Atua. O le faafitauli, o le le taliaina lea e tagata o le talalelei. O le faailoga lava lea o lo latou teena o le Alii Faaola o Iesu. O le faamalosiaua lea a Iesu i lona au so'o, ina ia mataala ma tapenapena i ai le loto onosa'i ma le faapalepale o le so'o.

O i latou o ē ua fai ma fili le faalogo i le talalelei ia Iesu, o tagata o lo o le talitonu, o Iesu o le Alo o le Atua. O Ia na auina mai e le Atua lona Tamā i le lalolagi, ina ia faaola le lalolagi, ua faapologaina e le agasala. O tagata ia ua fiafia e ola i le olaga faa-le-lalolagi. O le ā le uiga? O i latou ia e le fiafia i le lelei, ae ua faauō i le leaga, ma avea o se mea faafiafia iō latou olaga i taimi uma ma aso uma. O le ala lea o lo latou teena o le tala ia Iesu, ona latou te le fia amio faa-Iesu.

Ua a'oa'o mai le mataupu o lenei Aso Sa ia i tatou, ina ia ō tatou maupū, o le avea o i tatou ma tagata o le Alii, e le faigofie. E faaosoosoina i tatou e le tiapolo. E faaseseina foi i tatou i mea tatou te fiafia i ai.

I le satauro o Keriso, na matuā iloaitino ai le mua'i itagia o Iesu e ona lava tagata faapea le lalolagi le taupulea. Ma o sauaga ma le inosia o Iesu le Alii e faapena foi le mea e faia e tagata faapea i ona soo po o ana auauna. O lona uiga, 'a lē itagia le auauna ma le so'o, e lē o se so'o e lē o se auauna foi a Iesu. E le o le itagia i le amio faalelalolagi, a o le itagia – ona o le olaina o le uiga o le fai ma soo mulimuli ia Iesu. O nei aso ua faigata ona iloa po o fea tagata o le lalolagi a o fea soo o Iesu. Ua uiga faatasi ma amio faatasi. O nisi ua na o ofu ma upu e iloa ai, a o le amio e amio faatasi ma le lalolagi. E le manaomia e Iesu ni soo e 'alo i le paolo, ma ola faafoliga ma mata pulepule.

E faapefea ona maua e le soo le mafai e foliga ai i lona matai ma lona alii? E maua ina ua malamalama i le uiga o le vavaeeseina mo le Alii ma ana feau. O le tino, mafaufau, agaga – le tagata atoa ua tuu atu atoa e pule ai le Alii ma taitai ai le Alii ma lona Agaga.

**GALUEGA FAATINO: Tusigasolo**

1. Vaelua le vasega
2. Tusi se solo e fa’aoaga ai le ulutala o lenei Aso, ‘Itagia Iesu ma ona soo’.
3. Tasi le parakarafa, fa laina.
4. Tolu minute e tusi ai solo
5. Filifili ni sui o vaega e lua e tolaulau ā latou solo

**PESE:** E lelei mea uma ua ia Iesu (180, Pese & Viiga EFKS).

**A’OA’OGA:**

1. Ia avea i tatou ma tagata e faamaoni i le Alii i aso uma.
2. Ia itagia i tatou ona o le tumau i le amio paia, ae lē o le amio leaga ma le ola lē faamaoni.
3. E leaga le ola fe’alofa’i ma le ola faafoliga  
.....

**ASO SA:** 3 ME, 2015

**MATAUPU:** MAI LE OTI I LE OLA (From death to life).

**SINI:** Ia malamalama le vasega i le uiga loloto o le saunoaga a Iesu, e uiga i le taimi e mou ai ma toe sau. O le ‘ā i ai le taimi e oti ai, ae ua mautinoa le toe ola mai.

**TUSI FAITAU:** Ioane 16:16-18.

**FESOASOANI I LE FAIAOGA:**

O le mataupu, ‘Mai le oti i le ola’. Atonu o lona uiga, e oti ‘ae toe ola mai. O le oti lava ia e leai se isi e ‘alo ese ai. Auā o le tui o le agasala o

le oti, ma e oti la tagata uma. Ae ua tatou iloa i le Tusi Paia e le oti le tagata amiotonu ma faatuatua i le Atua. Pei o Enoka ma Elia na le oo i ai le oti e tusa ma le finagalo o le Atua mo i la’ua. O le tagata faatuatua ma amiotonu e oti, ae ola pea, pei o Aperaamo ma nisi o tā’ua e le Tusi o Eperu (Eperu 11:1-31).

O le mataupu la, e fesootai ma le faatuatua i le Atua. E oti le tagata faatuatua ae toe ola mai. E fesoota’i foi ma le Atua lava ia auā o ia o le Atua o le ola, e ola pea e faavavau. O lē faatuatua ia te ia e ui ina oti ae ola pea faatasi ma le Atua o le Ola - i lona faavavau. O lona uiga, ‘a le faatuatua i le Atua le tagata, ua maumau le ola a le Atua o lo o ola ai.

O le mataupu, o lo o faatatau e Iesu ia te ia lava. O se mataupu, o lo o fa’aoaga e Ioane le faiEvagelia e tali atu ai i aoaoga sese ma tagata o le ulua’i Ekalesia e le talitonu i le toetu, pe le talitonu foi i le liutino tagata o le Atua ia Iesu le Lokou po o le Upu. A o Iesu lava ia ia Ioane, o le Atua (Ioane 1:1i), ua liutino tagata.

A o ai e mafaia ona mua’i sosofa le malosi o le oti ma le tuugamau o le tui o le agasala? E faapefea ona suia lenei tino oti ma pala ona o le agasala - i le faavavau o le ola o lo o i le Atua? Ioe, ua na o le Atua e ala ia Iesu le Lokou po o le Upu. Ma na o le faatuatua i le Atua e ala ia Iesu le Lokou ma le Upu ua ia mua’i sosofa le malosi o le oti ma le tuugamau, e mafai ai ona tatou oti ae toe ola mai.

E toe ola mai faapefea? Ioe, e toe ola mai i le tino fou faaleagaga e faia e le Atua. E lē ola i le faavavau o le Atua o le Ola se tino faaletino, a o le tino fou faaleagaga e pei ona fetalai Iesu ia Maria le Makatala ia ‘aua nei pa’i atu ia te ia ina ua toetu (Ioane 20:17e). O lona uiga, e le fesootai le tino oti ma le tino faaleagaga.

I le Tusi Faitau, o lo o fesili ai le au soo po o o le ā le uiga o upu a Iesu i ff.16-18. Ma o le tali o ā latou fesili – o le tatou mataupu lea o lenei Aso Sa, ‘Mai le oti i le ola’. Ma o le tali ua tā’ua i le tuufesili o le ‘au soo e fesootai ma upu ia o lo o i le f.17, “.auā ou te alu atu i le Tamā”. Ma o le uiga lena o le tatou mataupu, o le tali foi o le tuufesili o le au soo. O le tali ua maua i le Atua o le Ola, ma ua fai lona Alo Pele e Toatasi o le Lokou po o le Upu o ia foi o le Atua i lona tulaga Alo o le Atua – o le Ulua’i ma le Ulumatua e savali muamua i le ala mai le oti i le ola. O ē la e faatuatua ia te ia e faapei foi o ia – Tatou te ui foi i le ala lea ‘mai le oti

i le ola'. O le tasi lea o aoaoga a Ioane, O Iesu, o le Ala, le Upu Moni, ma le Ola.

Ma o le aoaoga foi lea mo ona soo ma tatou foi i nei aso. Tatou te sao i le ola pe a tatou faatuatua ia Iesu o le Ala, ma le Upu Moni ma le Ola. E le faatali sei oti ae o le ola i le tino i lenei olaga e iloa ai lo tatou mafai ona ui i le ala 'mai le oti i le ola'. Ia ola la faatuatua ia Iesu, ma fai lelei ma atoatoa galuega o le faatuatua. Auā o le faavavau o le ola e iloa i le ola i le tino i lenei olaga. Ioe, 'mai le oti i le ola' – o lo tatou o atu lea i le Atua le Tamā pei o Iesu lo tatou Alii ma le Faaola. Na ia maliu tiga ai i le satauro, ma toetu manumalo nai le oti – ina ia mafai ona tatou o atu i le Tamā ma lona malo e faavavau ma ola ai i lona faavavau le faavavau o le Atua Moni e Toatasi ua liutino tagata ia Iesu Keriso lona Alo Pele.

#### **GALUEGA FAATINO: FA'AALIGA O MANATU**

1. Tu'u le avanoa i le vasega e fa'aali ai o latou manatu, e uiga i le mataupu o lenei Aso Sa.
2. Ia faamanino i le vasega, o le toe ola mai o le tagata mai le oti, o le mea e fai e le Atua o le ola ma lona faavavau, ma e le'i vaai muamua i ai se tasi, ua na o le Alii o Iesu Keriso, e pei ona talitonuina e le au faatuatua se ia oo mai i nei ona Aso.

**PESE:** Avatu i le Tupu, (82, Pese & Viiga)

#### **A'OA'OGA:**

1. O le ola ia Keriso i lenei olaga o lou ola lava lea i le ola ae le o le oti
2. O Iesu ua tatou sao ai i le malaga mai le oti i le ola faavavau
3. Ia fua mai ni fua e tatau ma le salamō ina ia tatou sao atu i le ola nai le oti
4. O le Iesu e toatasi – o le Ala i le Tamā ma lona malo e faavavau

**ASO SA:** (Aso Sa o Tinā), 10 ME, 2014.

#### **MATAUPU:**

**VIVII I LE TAMĀ, E AUALA ATU I LE ATALII.** (Glory to the father, through the Son)

#### **SINI:**

Ia a'oa'o le vasega ina ia malamalama, i le tulaga mamalu o Iesu sa Ia i ai i le lalolagi, mo le faataunuaina o le finagalo o lona Tamā, o le Atua lea. E tatau foi ona iloa, o le vivii i le Atua pe a ala atu ia Iesu, e le faigofie, e pei ona faafeagai ma le Alii o Iesu.

#### **TUSI FAITAU:**

Ioane 17:1-5.

#### **FESOASOANI I LE FAIAOGA:**

O le mataupu, 'Vivii i le Tamā, e ala atu i le Atalii'. E lua ni uiga o le mataupu. (i). 'A fia fesoota'i se tasi i le Atua le Tamā, e ui atu i le Atalii. (ii). O lou ola ia Keriso, o lou viia lava lena o le Atua le Tamā i lou olaga.

O le Tusi Faitau – o le vaega amata o le tatalo faa-Ositalaga Sili a Iesu. Ua tatalo Iesu auā ua lata mai le taimi e tuuina atu ai o ia ina ia faasatauroina e tagata agasala. A o lumana'i lona satauro, ua iloa i lenei tatalo a Iesu le tatau ona tuu mai e lona Tamā le mamalu ia te ia. Ua mua'i iloa ma le mautinoa e Iesu le tatau o lea mamalu mo ia e ui e le i oo i le satauro.

O le Iesu a Ioane o le Iesu ua savali ma faia ma le mautinoa lona aga atu i le satauro. E le o le lalolagi agasala, a o ia lava e toatasi ua savali ma faia ma le mautinoa lana galuega faaola. Ua ia te ia le pule ma le malosi mai lona Tamā. Ua atoatoa lona faatinoina o lona fai ma Lokou ma Upu faapea ma Alo ma Atalii o le Atua le Tamā. Ua saunia mo le satauro e le o le tagata agasala, a o le finagalo paia o le Atua le Tamā ia faaola le tagata agasala.

Ma o lona mamalu sa i ai i le amataga a o lei fai ma Lokou ma Upu, o lea foi ua tatau ona toe faafoi atu ia te ia. Ia tuu mai ina ia ia toe tuu atu. Aisea ua talafeagai ai ona tuu mai lea mamalu ia Iesu? (i). Auā ua ia faailoa atu lea mamalu o le Atua le Tamā i le lalolagi. (ii). Auā a o faatino lana galuega faaola, sa ia faia i le pule ua foa'i atu e le Atua le

Tamā ia te ia. Na te le i fa'aaoga sese lea pule, ae na ia avatu ai le ola faavavau ia i latou uma, na foa'i atu e le Tamā ia te ia. O le ola faavavau la e tusa ma upu a Iesu i le f.3, ia o latou faatuatua ma iloa le Atua moni e toatasi ma lona Alo na ia auina mai o Iesu Keriso lea. O le iloa la o le Atua Moni e Toatasi – o le ola faavavau lea. E faapefea ona iloa? E ala ia Iesu. 'A faatuatua i le Alo ua tatou iloa le Atua le Tamā, ma ua fai foi mo i tatou le mamalu o Iesu ma lona Tamā i le lagi.

O le mamalu o le manuia ma le ola. O le mamalu o le Atua le Tamā ma Iesu lona Alo - ua foa'i fua mai ina ia tatou ola. O lē faatuatua i le Alo, ua ia maua lea mamalu – o le ola e faavavau. E le faatali sei oti, ae ia faatuatua i le Alo a o ola ai i lenei olaga. O le faamamafa a Ioane – o le ola i le faatuatua ma galuega o le faatuatua i le Alo i le taimi nei. (John's theology – is realized eschatology, that is, eternal life is realized here and now, and only through faith in Jesus Christ).

Ua aoao mai lenei mataupu, 'a lē faatuatua se tasi i le Atalii, e leai se uiga o tatalo ma anapogi ma taulaga. Aisea? Auā o le faatuatua i le Atalii, ua saunia ai i tatou ma ua tatou ola ai ma le mautinoa e le o so tatou malosi ma se poto ma se oa e faavae ai ā tatou tatalo, ma anapogi, ma taulaga, a o le alofa o le Atua le Tama ua ala mai i le Atalii ua o tatou faatuatua i ai. Ma o le faatuatua i le Atalii tatou te faailoa atu ai i le Atua le Tamā lona mamalu ma lona manuia ma lona viiga. O Iesu la - o le faavae ma le ala i le Tamā. Tatou te viia le Tamā e ala ia te ia. E le o upu ma tala ma le ola lafilafi solo ma le ola sisi'o, faapea le fai togafiti, a o galuega o le faatuatua. Tatou te fiu e fia mamalu ma fai se mea lelei e viia ai le Atua, pe afai e mate lo tatou faatuatua. Lea e masani ona tā'ua o le faatuatua nofonofo. Auā e o faatasi le faatuatua mate ma le fai mea leaga, ma le ola manumanu ma le ola aiū, faapea le manatu – 'a ave uma ae faapefea ona ou ola. E le ola saunia ma savali ma le mautinoa pei o Iesu.

#### **GALUEGA FAATINO:**

1. Ia fefa'asoa'i le faiaoga ma le vasega i le uiga loloto o le ola vivii o le tagata i le Atua.

2. Ia malamalama le vasega ma ia iloa le galuega na faia e Iesu, mo le faataunuaina o le finagalo o lona Tamā, o le Atua lea, o le faitoto'a lea e ulufale atu ai le tagata faatuatua i le malo o le Atua.

**PESE:** Bless the Lord / Ia viia le Alii.

#### **A'OA'OGA:**

1. Ola i le olaga faa-Iesu, o le vivii lava lea i le Atua.
2. Tatou te o atu i le Tama e alai a Iesu
3. O Iesu, o le Ala, le Upu Moni ma le Ola

.....

**ASO SA:** (Aso Sa Penetekoso) 24 ME, 2015

**MATAUPU:** LAGONA LE FAATAUVAA

**SINI:** Ia a'oa'o le vasega ina ia malamalama, ia lagona e le tagata le faatauvaa i luma o le Atua.

**TUSI FAITAU:** Galuega 1: 1 – 14

#### **FESOASOANI MO FAIAOGA:**

O le lagona e le tagata o lona faatauvaa i luma o le Atua, o se lagona tāua ma lelei tele lea. Auā o le faailoa mai lava lea, o lona talitonu ma le faatuatua i le Atua, o lē na faia le lagi ma le lalolagi, ma mea uma o lo o i ai. Auā na o le tagata valea ma lē talitonu i le Atua e manatu, e leai se Atua. (Salamo 51: 1) “*Ua fai ifo le tagata valea i lona loto, E leai se Atua*” O lagona ua iloa ai le tete'e ma le faamaualuga o le tagata. O le afio a'e o Iesu i le lagi, a o molimauina e ona so'o ma i latou sa i ai, ua fa'aalia ai lona mamalu silisili ese ma le moni o ana fetalaiga, o ia na auina mai e le Tamā, ma e tasi lava i laua (Ioane 8: 16)

O le afio a'e o Iesu i le lagi, a o vaai tino i ai i latou, o le mea mautinoa, ua lagona le ofo atoa ai ma le faatauvaa. Sa latou mafuta ma faatasi ma Iesu, sa a'oa'o foi ma faamatala ia te i latou i mataupu e uiga i le malo o le lagi. E i ai taimi e masalosalo ai o latou loto ma lē talitonu. Peita'i o



lea ua faamaonia lava, e moni lava o Iesu o le Alo o le Atua. Ua tuua lona mamalu ae afio mai ma ola faatasi ma tagata agasala.

Peita'i o le lagonaina e le tagata o lona faatauvaa, o se avanoa tāua lea e mafai ai ona faalagolago i le galuega mana a le Agaga Paia, e fesoasoani e faamalosia ma faalototele i tatou auā le feau ma le galuega.

E lē o le tutu ma vaavaai i le lagi, le uiga o le ola auauna mo Iesu. Ae o le talitonu, lagona le faatauvaa, ma alu e talai atu le Tala Lelei.

#### **Uiga o Upu:**

- (i) Teofilo - o tagata ua mautu le faatuatua
- o le tagata o lo o tusi agai i ai le tusi
- upu Eleni o lona uiga, O lē ua alofa i le Atua.

#### **GALUEGA FAATINO: Fesili ma Tali**

1) O ai o lo o tusi agai i ai le tusi?

Tali: Teofilo.

2) E fia po na faailoa ai Iesu i ona so'o ina ua toe tu mai o ia?

Tali: E fagafulu po.

3) Aisea na manao ai Iesu ia lē tuua e ona so'o Ierusalema?

Tali: Ia faatali ai i le mea na folafolaina e le Tamā.

4) O le ā le mea na folafola?

Tali: O le Agaga Paia.

5) O ai e ona upu nei – “Outou tagata Kalilaia e, se ā le mea tou te tutū ai, ma vaavaai i le lagi?”

Tali: O tagata ofu sisina e toalua na tutu mai i ō latou luma.

**PESE:** 5 (Pese ma Viiga)

#### **A'OA'OGA:**

1. Ia lagona lo tatou faatauvaa i luma o le Atua.
2. Ia faalagolago i le Agaga paia e fesoasoani mai ia i tatou.

3. Ia galulue ma auauna i le Atua ma le loto maulalo.

#### **TATALO:**

Le Atua e, ia e a'oa'o mai pea ia te i matou, ina ia o matou lagonaina lo matou faatauvaa i luma o lau afio, ina ia mafai ona matou galulue ma le faamaoni ma le lotomaulalo i feau ua valaauina i ai lo matou ola. Amene.

.....

**ASO SA: 31 ME, 2015**

**MATAUPU: UA FAAFETAIA'I E IESU LE MALOSI O LE TI'ĀPOLO**

**SINI:** Ia a'oa'o le vasega ia malamalama ua faafetaia'i e Iesu le malosi o le tiapolo ma manumalo ai.

**TUSI FAITAU:** Mareko 5: 1 – 13

#### **FESOASOANI MO FAIAOGA:**

E faafeagai ma feteena'i le galuega a Iesu na afio mai ai i le lalolagi, ma le galuega a le tiapolo. O Iesu na te faaumatia galuega a le tiapolo (1 Ioane 3: 8) ae faasaoloto ma faaola le tagata. O le tiapolo, o le fasioti tagata ma le pepelo (Ioane 8: 44). O le alii o ia o temoni (Mataio 12: 24) e pule ai o ia. O ana au na te fa'aaogaina e faaleagaga ai tagata e ala i lo latou ulutinoina ma pule ai.

O le mataupu o lenei Aso Sa, **Ua faafetaia'i e Iesu le malosi o le tiapolo.** O le taunuu atu o Iesu ma ona so'o i Katara na fetaia'i ai o Ia ma le tagata ua i ai le agaga leaga. O lenei tagata, e nofo pe mau o ia i tuugamau. O le matautia o le tagata lea, ona e lē mafai ona taofi e se tagata po o ni tagata foi. Afai e noanoatia i maea uamea, e motumotusia e ia ma tuipalaina mea uma e noanoa ai o ia. Ae ua mafua lea malosi ona o le agaga leaga ua i ai i totonu ia te ia. O le isi tulaga leaga, o le lē mafai e se tagata ona faalata ia te ia. Ua lē fia mafuta i tagata ae ua nofo lava na o ia i tuugamau ma luga o mauga. E uiga 'ese le tiapolo ua pulea lenei

tagata, ua oo lava i lona tino ua ia faaleagaina. O uiga ia e oo i se tagata ae ulutinoina e temoni, e oo ia te ia se malosi uiga ese, ae o se malosi na te faia ai ni mea lē tatau ma leaga. E le gata i lea, e le fia mafuta i ni tagata.

Peitai, e tulaga ese le mea na tupu, ina ua taunuu atu Iesu, auā o le taimi lava na iloa mamao mai ai e le tagata o lo o i ai le agaga leaga iā Iesu, na momo'e mai ai ma ifo iā Iesu. A toe tepa i le lē mafai ona noanoatia ma faalata e se tasi lenei tagata ae o lea ua momo'e mai ma ifo iā Iesu ona iloa manino ai lea, o le tulaga ese o le malosi ma le pule o lo o iā Iesu, na te mafaia ai ona tuli ese le agaga leaga.

Ua iloa lelei e le agaga leaga, e na te lē mafai le mana ma le malosi o lo o iā Iesu. O le ala lea o lona ifo ma alaga "Se ā lau na ia te a'u nei Iesu e, le Alo o le Atua silisili ese? Ou te fai atu ia te oe i le suafa o le Atua, ia e le faatiga mai ia te a'u" (f.7). O upu o lo o fa'aalia ai le fefe ma le mata'u o le agaga leaga iā Iesu. Ae le gata i lea ua faailoa ai foi lona to'ilalo popo.

O le isi tulaga ofoofogia, e le toatasi se temoni. Ina ua fesiligia e Iesu po o ai lona igoa, sa faapea mai o Lekeono, auā e toatele i latou. O lona uiga, o le mafuaaga lea o le malosi o le tagata o lo o nonofo ai i latou. E ui i lea malosi ma le toatele, ae o lea ua aioi ia Iesu ina ia tuu atu i latou i puaa e ulutino ai ae 'aua nei aveeseina i latou i lea nuu.

O le fetalaiga a Iesu ma le tiapolo, o le faatoilaloina lava lea e Iesu o galuega leaga a le tiapolo ae faasaolotoina le tagata. O la Iesu "Alu ia i fafo i le tagata, o oe na le agaga leaga." Ua tuu atu e Iesu i latou, ua o i fafo ua ulutino i puaa, ona feosofi ifo lea o le lafu i le tofē i le vai ua malelemo ai.

#### **Uiga o Upu:**

- i) Lekeono - O le igoa o le au e tasi i le malo o Roma.
- E ono afe (6,000) tagata toatele e le faitaulia.

#### **GALUEGA FAATINO: Fesili & Tali**

- 1) O le ā le tiapolo lea o lo o i ai i le nuu o Katara?

Tali: O le tagata ua ulutinoina e le agaga leaga.

- 2) E faapefea ona iloa le malosi o lea tiapolo?

Tali: Auā sa mau i tuugamau ma luga o mauga. E le mafai e se tasi ona noanoatia pe faalata. Na te motusia maea uamea e noanoa ai o ia. E oo lava i lona tino na faaleagaina.

- 3) O le ā se mea ua e iloa i le temoni ina ua fetaia'i ma Iesu?

Tali: E malamalama lelei le temoni ia Iesu. E fefe ma mata'u iā Iesu, auā o lo o ia Iesu le pule ma le mana.

- 4) O ai le igoa o le temoni o lo o i totonu o le tagata? O le ā foi lona uiga?

Tali: O Lekeono, o lona uiga e toatele temoni.

- 5) O fea na tulia i ai e Iesu ia temoni?

Tali: Na tuli i le lafu puaa.

**PESE:** Jesus is a winner man.

#### **A'OA'OGA:**

- 1. E mafai e Iesu ona fetaia'i le tiapolo ma ana galuega.
- 2. E faasaoloto e Iesu i tatou mai galuega a le tiapolo.
- 3. E fefe le tiapolo i le tagata faatuatua ma talitonu i le Atua.

#### **TATALO:**

Le Atua e lo matou Tamā, auina mai lou Agaga ia te i matou, aua o lou mana lea e mafai ai, ona matou manumalo i faaososoga, ma maua ai e i matou le malosi e faafetaiai'i ai galuega pepelo ma le malosi a le tiapolo. Amene.

.....

**ASO SA:** 7 IUNI 2015

**MATAUPU:** **LOTO TETELE O A’U LAVA LENEI, ‘AUA TOU TE MATATA’U** (Take courage, it is I, don’t be afraid).

**SINI:** Ia malamalama tamaiti, po o le ā lava le tele o faafitauli ma faalavelave e tutupu i le ola nei, ia loto tetele auā o lo o soifua pea le Atua, o lē na te aumaia le toamalie i ō tatou loto.

**TUSI FAITAU:** Mareko 6: 45 – 56

#### **FESOASOANI MO FAIAOGA:**

O le vaega o le tusi a Mareko lenei, o lo o aumai ai le tala i le savali o Iesu i luga o le vai. Ua maea ona fafagaina e Iesu le motu o tagata e 5,000 ona ia auina atu lea o ona so’o, e muamua i le isi itu o le vai i Petesaita. Ua afatia le au so’o i matagi malolosi ma ua lagona ai le popole ma le lē mautonu. Ua silafia lelei e Iesu le mea ua tupu i ona so’o, ona ia agai atu ai lea i luga o le vai, e faafetaiai i latou. E oo lava i le vaai atu o le au so’o i le Alii ua savali i luga o le vai, ua atili ai ona maua i latou i le lagona fefe ma le popole. Ua manatu o se aitu. “Loto tetele, o a’u lenei, ‘aua tou te matata’u.”

E ese ona faigata ona talitonu o le au so’o, a fua i vavega ma faamalologa na latou vaai ai o faia e le Faaola, aisea lava la ua le mausali ai lo latou faatautua. O lea foi e lei leva ona mavae atu le fafagaina e Iesu le motu o tagata e 5,000, ae e lē o mautonu o latou lagona i le Alii. I le tala lava lenei e tasi, e pei ona faamauina e Ioane (6: 16 – 21) e faapea na taumafai ai Peteru e savali i luga o le vai ina ua ia vaai atu ia Iesu, ae na iu lava ina magoto ifo i le vai, o le fefe i le vaai atu i le sousou o le sami ma le matagi malosi ua tupu ai le fefe i lona loto.

Ua galo ia Peteru, o lo o tu mai le Alii na te leoleoina ma puipui i ona so’o. E faapena lo tatou ola, e ui ina avea i tatou ma tagata lotu, e vivii i le Atua e le aunoa, ae a oo mai tiga ma faafitauli i lo tatou olaga, ona manatu lea ua leai se Atua. Ia tatou manatua ma mautinoa o lo o fetalai

mai pea le Alii i aso uma ma taimi uma. “Loto tetele, o a’u lenei, ‘aua tou te matata’u.” (Ia e ala foi ona tutupu isi faafitauli i lo tatou ola ona o lo tatou faatamala).

#### **Uiga o upu ma fuaitau**

##### **1. Loto tele** (Take courage)

O se faaupuga e mafai ona iloa ai le tagata ua leai se fefe e faafesagai ma mea e tutupu mai i le olaga nei. A o se lagona foi e mafua ona tupu, ona ua talitonu ma mautinoa le tagata, o lo o i ai lona fesoasoani. (E masani lava, a tupu se vevesi, ia e ala ona toa, isi tamaiti ona e toatele ana uo, po o lona aiga). A o le loto tele o lo o fetalai ai le Alii, o le tagata ua atoatoa ma moni lona ola faalagolago i le Atua, o le maluapapa lea o lona ola.

##### **2. Fefe** (Afraid)

O se lagona e tupu mai ina ua leai se faamoemoe, ua fememeai ma le mautonu lea ola. A oo ina vevesi ma puapuaga o le ola, ona lagona lea o le popole i le loto o le tagata. (E masani ona tupu foi ia i tatou lea lagona, a oo mai suega ae le i saunia lelei, ona popole lea ma fefe).

**GALUEGA FAATINO:** Manaia pe a faatino le tala.

#### **A’OA’OGA:**

1. Po o ā lava mea e tutupu i le ola, ia manatua, e le tuulafoa’iina i tatou e le Atua.
2. ‘Aua tatou te faitauina le tele o faafitauli, ae ia vaai o lo o tu mai pea le Alii ma valaau mai ‘‘Aua tou te matata’u, o a’u lenei’.

.....

**ASO SA:** 14 IUNI, 2015

**MATAUPU:** TALA O LE OLA MAI SE OLAGA MAULALO (Big stories in small lives).

**SINI:** Ia aoao le vasega ina ia iloa faamatala le faatauavaa o le olaga o Iosefa, a o ia lava na i ai le faaolataga mo lona aiga, ma fofoa mai ai le gafa o Iesu le Faaola.

**TUSI FAITAU:** Kenese 41: 25 – 36

### **FESOASOANI MO FAIAOGA:**

E ta'u loa Iosefa, manatua loa ma le uso laititi lea na faatauina pe na agaleaga i ai ona uso matutua, lea na faatau atu i tagata Mitiana, ma oo atu ai loa i Aikupito. O iina na faapologaina ai Iosefa, tigaina ma saisaitia ai lona ola. Na pau lava le auupega na ia Iosefa a o i ai i lea pologa, o lona loto mafuta atu i le Atua i le ao atoa ma le po. O se olaga faatauavaa ma le maulalo na ola ai Iosefa i Aikupito, ae na lava lona onosai ma lona talitonuga e le tuulafoaina o ia e lona Atua. O le ala lea o le saogalemu o Iosefa, e ui i faaososoga na lamatia ai lona ola, ae na faamamalu pea aao o le Atua i ona luga ina ia 'aia nei faaseseina pe afaina o ia. Ua alu pea aso o Iosefa i Aikupito, ua amata ona talitonuina Iosefa i ana mea e fai, auā e galue faamaoni ma potu e tautua. Ona alofagia lea o ia e le auauna sili a Farao, e le gata o lona faamaoni ma le amio Atua, a o lona potu e fa'aali mea lilo.

Ua oo ina fai miti e lua a Farao le tupu o Aikupito, ua tigaina ma atuavale ai lava o ia, o povi lelei e fitu ma au saito tino lelei foi e fitu e tutusa lelei i latou, ua aina e povi pa'ee'e ma au saito pa'ee'e e ta'i fitu. Fai mai ua fiu taulaitu ma le au popoto uma a Aikupito e tau faamatala uiga o ia miti, e le mafai lava. Ona āmia lea e Farao o Iosefa ina ua maua tala i lona potu tele, ma na faamatalaina ai loa le a'ano moni o ia miti a Farao. O ni miti o i ai ni tala tetele ma le olataga e le gata mo Aikupito, aemaise ai lava Isaraelu, lea semanu e le malamalama lona uiga, pe ana

leai le potu o Iosefa. Ua fa'aali e Iosefa ia Farao le musumusuga a le Atua i le mea o le a tupu, o tausaga e fitu o le a mau ai ma tele meaai i le nuu uma o Aikupito, ona soso'o mai ai lea o tausaga o le a leai ai ni meaai e toe maua, po o le oge. Sa lelei tele Farao i lea taimi ma lona amana'ia o faamatalaga a Iosefa i lona loto maulalo ma le filemu, auā na tuualalo ai foi Iosefa e saili se tagata mafaufau ma le potu e pule i le nuu uma o Aikupito. O le miti na faia e le Atua, o ana auala e le iloa e le tagata, fa'aaogaina ai Iosefa e fai ma faaola i lona aiga ma ona tagata. Ua filifilia e Farao Iosefa e pule i le nuu uma o Aikupito, e na o le nofoalii lava e sili atu ai Farao ia te ia.

O le tofa pogisa o Farao na tata'e e le pologa o Iosefa lea ua vavala mai ai ataata o Ta'ulelei. O le fa'aauuina o le tala, o Iosefa na tu i le foe i le faaputuina o meaai mo tausaga o le oge, ua sulu atu foi lona aiga ma manuia ai. O le olataga leni na afua mai ia Iosefa i lona olaga pologa ma le faatauavaa, ma lona loto faamaoni e pipii atu ai i lona Atua i taimi uma, leni ua logologo ma avea ma tala leotele i le Tusi Paia, na sosolo mai ai le tala faasolopito, ma tupuga mai ai iā Tavita le Mesia e pei ona valoia e perofeta, na te faia le faaolataga tele mo tagata uma. O lona tāua mo i tatou; o se olaga e maulalo ma ta'ufaatauvaaina, ae a i ai le finau ma le ola tauivi e faalagolago i le Atua i taimi uma, e mautinoa e i'u i le faaeaina ma avea ma tala logologoā. 'Aua tatou te faamasani i se olaga fifilemu, a ia tigaina muamua ma usita'i i matua, ona mulimuli mai lea o faamanuiaga ma le ola faaeaina mai le Atua.

### **GALUEGA FAATINO: Faatalanoaga**

1. Faatalanoa le vasega i le olaga o Iosefa, ona tuu lea i ai o le fesili lea, "O ā ni mea e tai tutusa ai le talaaga o Iosefa ma le soifuaga o Iesu?"
2. Tuu le avanoa i le vasega e faasoa mai ai, a o mea nei ia: Ia manino le fanau mai o Iesu i le falepovi i totonu o Peteleema, ui mai i se olaga maulalo, auauna i so o se tagata, loto maulalo ma loto faamagalō, na oo lava ina upuia ma fasia, se ia maliu ma toetu mai le oti, ona tini ai lea o le faaolataga mo le lalolagi, afio o Ia ae fa'aauu e Lona Agaga.

O le olaga o Iosefa, le ulumatua a Rasela le pele a Iakopo, na inosia e ona uso moni, na oo ina faatau ese atu e aunoa ma se uiga faamaualuga, auaua faamaoni i tagata o Aikupito, fiu tagata e faaososo ae na mafuta pea ia i le Atua, e tumu i le potu mai le Atua i lana gagana, ua ia faamagalo i ona uso, ma i'u ai ina fai ma Faaola o Aikupito mai le oge, aemaise ai lava i lona nuu ma ona tagata.

3. Faamamafa loa e lau susuga i le faiaoga, o se olaga e ui mai i faigata ma puapuaga, ma sili ona mauualalo, e i'u i le faaeaina ma logologoā pe a onosai ma tumau i le Alii. Ona faatāua ai lea o sina vaaiga mai ia Iosefa, ma le atoaga mai i le soifuaga o lo tatou Alii o Iesu Keriso.

**PESE:** A tumau ia Iesu, tatou te filemu.

(When we walk with the Lord, in the light of his word)

**A'OA'OGA:**

1. Onosa'i e tigāina mo le Alii, mulimuli ane faaeaina i tatou e Ia.
2. E leotele ma anoa se olaga mauualalo e o faatasi ma le Alii.
3. Ia o tatou maua Keriso e ta'utā'ua ai o ta igoa i le lalolagi.

.....

**ASO SA:** 21 IUNI, 2015

**MATAUPU:** **TE'ENA FAUTUAGA ATAMAI** (Rejecting wise advice).

**SINI:** Ia a'oa'o le vasega ia iloa ona faamatala fautuaga atamai o i le Tusi Faitau poo ai na aumai ai, ma ta'u mai po o ai na fautuaina, ae aisea foi ua ia te'ena ai nei fautuaga.

**TUSI FAITAU:** 1Tupu 12:1-15

**FESOASOANI MO FAIAOGA:**

O Solomona, o le tupu lona tolu lea o le malo o Isaraelu ina ua mavae atu Saulo ma lona tamā o Tavita. O se tupu sili ona faamanuiaina i le tala faasolopito, i le potu ma le mafaufau, aemaise foi o le tamaoiga. Peita'i, e le i lelei ona taofiofi mamau e Solomona le Feagaiga a le Atua sa i ona lima, faatasi ma lona nuu o Isaraelu. Auā na fulitua o ia i le Atua ma faia le agasala, o lea na sasaeeseina ai loa e le Atua le malo mai ia te ia (Tup.11:11-13). Ma sa vaeluaina le malo o Isaraelu, na o nei lava ituaiga e lua sa totote mai, o Iuta ma Peniamina (Ierusalem), a o isi ituaiga e sefulu (Isaraelu), ua aveesea ma ia, ma pei ai ua lua ni faiga nuu eseese, o le malo o Isaraelu i luga, ma le malo o Iuta i lalo.

O la tatou mataupu la o lenei taeao, o le tulai mai o Reopoamo le atalii o Solomona o le a fai ma tupu o Isaraelu, i le taimi a o tasi Isaraelu, ae tino mai loa le finagalo na tuu e le Atua ia Solomona, e taunuu i lona atalii lenei. Fai mai ua sauni Isaraelu e fai Reopoamo ma tupu ia te i latou i Sekema, o le nuu e soso'o ma Samaria, ua faalogo mai ai foi Ierepoamo le atalii o le tagata e igoa ia Nepata mai Aikupito, ona sau lea o ia e faatasi ma le nuu, e tautala atu i lo latou tupu fou. Ona o latou o mai ai lea ma fai atu ia Reopoamo, na faamamafaina e lou tama la matou amo; o lenei ia e faamama le galuega tigā a lou tamā, ma lana amo mamafa na ia faaetia mai ia i matou, ona matou auaua ai lea ia te oe. O le alaga lea a tagata ia Reopoamo ma lo latou naunautuaina ina ia talia mai e ia lo latou mana'o.

Ona filifili lea o Reopoamo ma toeiaina e na auaua ia Solomona a o soifua o ia, ua fai atu Reopoamo ia i latou, se ā ea se mea tou te fai mai ou te tali atu ai i lenei nuu. Ona fautua mai ai lea o tamā o le nuu i fautuaga atamai ma le aogā mai le Atua; afai e te fai ma auaua i lenei nuu i le aso nei ma e auaua ia te i latou, ma e tali atu ia te i latou ma e tautala atu ia te i latou i upu lelei, ona fai ai lea o i latou mau auaua e faavavau. Ae peitai, ua le faalogo o ia, 'a ua ia toe faasoa atu i taulele'a latou te tupulaga pe se ā so latou manatu i le mana'o o le nuu na tuuina mai. O iina na aumai ai foi ma isi fautuaga fou, ua faapea mai taulele'a ia Repoamo e uiga i le mana'o o Isaraelu, fai atu ia ia i latou, o lo'u lima tama e tele lava lea i le sulugatiti o lo'u tama. Na faaetia e lo'u tamā le amo mamafa ia te outou, a o a'u ou te faaopoopoina atu i la outou amo;

na aoa'i atu lo'u tamā ia te outou i sasa, a o a'u, ou te aoa'i atu ia te outou i akarava. Na talia e le tupu nei fautuaga leaga mai i ona taulele'a, ae teena fautuaga atamai mai tamā o le nuu, auā mai le Alii lea mea ina ia faataunuu lana afioga na fetalai mai ai.

O le faapogai tonu lea o le taunuu o le malaia na afua mai ia Reopoamo, ona ua faalogo i fautuaga ma le leo leaga mai i ona taulele'a, ae ua na teena fautuaga aogā ma le atamai mai toeiina o le nuu, o le afioga lava lea a le Alii. Ona o ese ai lea o ituaiga e sefulu o Isaraelu mai le atalii o Solomona, ae toe na o ituaiga e lua ona o Tavita le auauna a le Atua, ina ia taunuu ai folafolaga a perofeta e auala mai i le aiga o Tavita. O lona uiga, ua a'oa'oina foi i tatou i lenei mataupu, ina ia o tatou faalogo ma le toto'a i le musumusuga a le Atua, pe se ā lona finagalo mo i tatou. Auā a oo ina fautuaina i tatou e tagata i ni mea e ao ina fai, a o la e manino la tatou vaai ma maua mafauauga lelei, i le faatasi mai o le Alii ia i tatou i taimi uma.

#### Uiga o Upu:

- i). sulugati - o le igoa lea e faaigoa ai puimanava o le tagata, auā e sulu ai le titi po o ie lavalava.
- ii). akarava - o le manu faapei o ni ula vai, ae taufeū, e taatele i toafa.

#### GALUEGA FAATINO: GALUEGA TULITULILOA.

*Faatalanoa le vasega i ituaiga fautuaga ia o lo o i le tala e toe faamanatu ai..*

#### Fautuaga atamai

#### FautuagaLeaga

\* ft. fai ia ma auauna ia i latou

\* ft. faamamafa le amo

**PESE:** 181 - Ia faalogologo atu, ua fesili mai Iesu.

#### A'OA'OGA:

1. Faalatalata i le Alii e fautuaina ai oe
2. Faalogo ma usitai i ē matutua

3. Mataala i leo eseese o le lalolagi, ae mata'itu le siufofoga mai le lagi.

.....  
**ASO SA: 28 IUNI, 2015**

**MATAUPU: SAVALI I LE ALA O LE FILEMU**  
(Walking In The Way Of Peace)

**SINI:** Ia a'oa'o le vasega ia iloa lelei faauiga le feau a Isaia o lo o aumaia i lana tusi lenei, ina ia toe foi i le Alii, auā e i ai le Mesia valoia, o lo o sau ma le filemu mo tagata uma.

**TUSI FAITAU:** Isaia 2:2-5

#### FESOASOANI MO FAIAOGA:

O le mataupu o lenei Aso Sa, o se feau taumolimoli o le tusi a Isaia i lona nuu ma ona tagata o Iuta, lea ua faapuupuu mai e le mataupu o lenei taeao, 'Savali i le ala o le filemu.'

O Isaia o se perofeta loto tele ma le le fefe. E 60 tausaga sa perofeta ai ia Iuta. Na alaga o ia ma le toa e ta'u i le nuu agasala le feau mai le Atua, a o lea ua amata le mataupu lona lua lenei i le valoaga o le malo o le Mesia. Ua iloa lelei e Isaia i ona mata faale-faatuatua, ua pa'u maualalo Ierusema ma ta'u faatauvaaina i le agasala, ua fulitua i lo latou Atua le toatele, ma ua galo le feagaiga ma le Atua. Ona malomaloā lea o ana faamamafa, e i ai le faamoemoe mo tagata uma, ia 'aia nei galo ia i latou, e i ai le faamoemoe mo tagata uma.

Ua na faatepa tagata i le tāua o le mauga o le Atua, o le tumutumu mauga o Siona, o lo latou talitonuga, o lo o afio tumau ai le Atua ma lona mamalu silisiliese. O iina e ao ina toe fo'i i ai le tagata salamō ma le faatuatua; e mafuta ma pipiii atu ai i lona Atua, ina ia faafouina ai le malosi ma le ola fou o tagata uma ma nuu uma o le lalolagi. O ai ea se tasi e maua mai ai le malamalama? O le ā ea se isi auala e maua ai le

filemu e tagata uma, aemaise i latou ua fiafia i le agasala? O le faamamafa a Isaia i le tusi lenei i tagata o Ierusalem, ina salamō ia ma toe foi mai i le mauga paia o le Alii i Siona, suia nei loa le ala e savali ai, ia savavali i le ala o le filemu. O le avea ma tagata o le filemu, e amata i lou lotoifale, talia lou Atua i lou loto ma le faamaoni, ona fua tele mai lea o le amio faale-Atua i ē latou te talia o Ia. Ia faalelei ma lou uso ma ou tagata, ona saga'i ane lea i le mauga paia, o i ai le filemu tonu ma le ola, o i ai le mamalu ma le faamoemoe i le lumanai. O iina e maua ai le Atua ma feiloai ai ma Ia. O le fa'aogaina o le mauga, o le faailoga o le tepa a'e ai i luga ma le loto naunau e fia faatasi ma le Atua, auā a oo i aso e gata ai, e tumau lea mauga, o i ai le fale o le Alii.

O le feau la a le perofeta, ona o le alofa tunoa o le Atua, o le a auina mai ai lona atalii e fai ma faaola i lona nuu ma ona tagata, aemaise le lalolagi atoa i lona filemu. E leai se isi ala e maua ai lea filemu, ua na o le salamō loa ma toe foi i le Atua ma le loto faamaoni. Auā o le a faamasino o ia i nuu ese, na te aoa'i tagata uma ma fa'aalia lona silisiliese i le lalolagi, ona mapuitiga lea o i latou uma latou te le talia o ia. O le manatu o Isaia ia Ierusalem, ia pipii i lo latou tofi na aumai e le Atua, ia tausolomua i latou ona savavali i ala o le filemu, ona gasolo mai ai lea o le lalolagi uma e mulimuli atu i ai latou. Auā se ā le aogā o le oo mai o le faaolataga tele ua saunia e le Mesia, ae maa'a pea loto ma fulitua pea i latou i le Atua?

Tamaiti, o se fesoasoani foi lea mo i tatou i lenei taeao, ia tatou savavali pea i ala o le filemu o le Atua, e mautinoa tatou te ola ai. Afai ua lolofi mai tu ma aga mai fafo ma aafia ai i tatou, o faafitauli eseese e aliali mai, o le poto ma le tamaoiga, o tuinanauga ma faaososoga eseese ua o tatou feagai pea i aso uma, ia outou mataala, 'aue ne'i vave faia ni ā ta faaiuga, a ia o tatou fesili pea i le Atua e fesoasoani mai, tatou pipii pea ia te Ia, o iina tatou te maua ai le ala o le filemu tatou te ola manuia ai. A tutupu vevesi, faafilemu e i tatou, a vaaia le mea e oti ai le isi, faufautua i ai, a oo foi ina iloa le mea e tataua ona fai, 'aue le toe faatali ae faatino loa. Ia tepa ae i Siona i le mauga paia o le Atua, ma savali i ona ala filemu, ona mautinoa lea lo tatou ola saogalemu ma le ola manuia.

### Uiga o Upu:

- i) Siona - o le mauga paia o le Atua o i Ierusalem.
- ii) suotosina - o le mea faigaluega e faamalū ai le palapala
- iii) polo - o le upu fa'aaloalo o le naifi.

### GALUEGA FAATINO : AVANOA FAATUTUMU

*Faitau ma suesue lisi eseese oi lalo, ona faatumu lea e oe o avanoa o totoe.*

#### **SIONA**

- savali i ala o le filemu po o ala o le Mesia
- salamō
- loto maulalo
- alofa
- faatuatua
- 
- ma isi
- 
- Savali i ala o le tiapolo
- loto maa'a
- fiamalosi
- faamaualuga
- ifo i tupua
- 
- ma isi

**PESE:** Sa ou alu atu ia satani, fao mai a'u mea totino.

### A'OA'OGA

1. Taumafai ia lagona le valaau mai o le Atua ia i tatou
2. Ia savali i ala o le filemu o le Alii i aso uma e manuia ai.
3. 'Aua le fia loto malosi auā e pa'ū lava le aogā.

.....

**ASO SA: 5 IULAI, 2015**

**MATAUPU: O Ē FAATUPUINA LE FILEMU**  
(Peacemakers).

**SINI:** Ia iloa e tamaiti le tāua o le avea o i latou ma ē faatupuina le filemu, i so o se sosaiete o i ai i le taimi nei atoa foi ma lona olaga i le lumanai.

**TUSI FAITAU:** Mataio 5:9 “Amuia e faatupuina le filemu, auā e tā’ua i latou o atalii o le Atua.

### **FESOASOANI MO LE FAIAOGA.**

Tele tagata o le lalolagi ua latou ausia faailoga ma tikeri mauululuga i tomā ma agavaa eseese. Tele foi o nisi ua tausiniō i tofiga ma tulaga mauululuga i le malo ma so o se sosaiete. Ae peitai, e tau leai ni tagata e tausiniō ma fiafia e faatupuina le filemu i le lalolagi.

A tatou vaai lelei ma maitau gasologa o le lalolagi i lenei vaitaimi, ua tupu le lalolagi i tagata faatupu faalavelave ma faatupu vevesi. Tagata ua le kea i le ola o isi a ua fai le pule malosia ona o le naunau i le paoa ma le tamaoaiga. Ua oo foi i totonu o aiga, o nuu, o aulotu ma malo tetele o le lalolagi ua tau le maua ni peacemakers po o tagata e faatupuina le filemu. Lea foi o lo o i ai a tatou leoleo o galulue ma tautasi le filemu i isi atunuu o le lalolagi i lalo o le polokalame a le Malo Afaatasi [UN]. Pe a tuu mai foi i ē tatou lava laufanua, ua tumu faamasinoga i le va o uso, o aiga ma nuu. Ua tau le maua nisi e faatupuina le filemu i so o se sosaiete. Manatua foi e le mafai ona tupu ma galue le filemu pe a leai nisi e faatupuina.

O le lauga lenei a Iesu, o lo o faamanino ai le MALO O LONA TAMĀ. [Kingdom of God]. Ma o lo o faailoa ai foi e Iesu i lona au so’o le mea e ao ona latou faia. E le o faatatau lea lauga i se toatasi, ae o lo o faasino mo le motu o tagata, o le au so’o, ma le ‘au faatutua uma i le lalolagi. O le mea o lo o faamamafa e Iesu i lenei lauga, e le o le tau ona ua lelei, pe

tauia foi le tagata ona ua faamalieina mea uma ua finagalo i ai Iesu, e leai. O le mea tāua o lo o tau faamanino mai i le lauga a Iesu o le ALOFA TUNOA o le Atua, e le mavae ae fesoasoani mai pea i le tagata i so o se faigata o feagai ai. Tele lava taimi e fetalai atu ai Iesu i lona au so’o - ‘Ia ia te outou le filemu o le Alii. Mo lona au so’o, ia le na o le mulimuli ia te Ia ma fai ma so’o, a ia galue i le valaauina faatasi ma le filemu o le Atua. E finagalo Iesu ina ia faatino e le au so’o ala o le filemu sa ia savalia mai i lana malaga, aua o lona Tamā o ia o le Alii o le filemu.

O le sūgata o tagata e faatupuina le filemu i le vaitaimi o Iesu, o le mafuaaga lea ua ia tā’ua ai lea mea i lana lauga i luga o le mauga. Aemaise lava mo taitai o le lotu Iutaia ma tagata lautele. Ua avea Iesu ma lana talaiga ma mea inosia mo i latou. E le o le upu filemu le mea tāua o lo o i ai i le Autu ae o le faamuamua i le finagalo o Iesu, o le Tagata na te faatupuina le filemu. Lona uiga e leai a se aogā o le filemu pe a taatiatia na o ia ae leai nisi e faatinoina. O le faatupuina o le filemu, e le o le ‘aua le pisa pe ‘aua foi le pa’o, a o le faatino o le filemu i totonu o le mea o lo o i ai le vevesi ma faafitauli.

Ua silafia lelei e Iesu tagata faatupu vevesi ma faatupu faalavelave o lo o siomia ai lana galuega i lea vaitau. O le au Faresaio ma le Au Tusiupu o i latou ia ua fai ma faasoesa i lana galuega faaola. O lea la ua ia fetalai tuu sao e tusa ma le fuaiupu sa tatou faitauina - Amuia ē faatupuina le filemu auā e tā’ua i latou o atalii o le Atua.

Ua fa’amuia le Alii i le tagata na te faatupu le filemu. Lona uiga ua ia faamanuia i ai atoa ai foi ma le tau na te maua ona o lea mea. Fai mai Iesu - E tā’ua i latou o atalii o le Atua po o fanau a le Atua. Ese le manaia o lea tau ua aumai e Iesu mo le tama ma le teine e faatupuina le filemu. O ai la se isi e le fia tā’ua o se fanau a le Atua ae inoino e ta’u o le fanau a Satani? O i tatou uma e fia avea ma fanau a le Atua, lona uiga pau lea o le auala e mafai ai ona agavaa e fai ma fanau a le Atua, pe a faatupu le filemu. O lona lea finagalo ia i tatou ia faia i so o se mea tatou te ē i ai.

**GALUEGA FAATINO:** Fesili mo le Faalauteleina o le mataupu.



1. E faapefea ona avea oe ma tamaititi e faatupuina le filemu i lau vasega ma lau aoga?

Tali: Ia lelei lau amio i lau vasega ma lau aoga, ia e fautua foi mo ni tamaiti o fai ma faafitauli i faiaoga i totonu o le aoga.

2. E faapefea ona avea oe ma tamaititi e faatupuina le filemu i lou aiga?

Tali: Ia e fautua lelei i ou uso po o ou tuafafine i ni mea o masani ona vevesi ai. 'Aua foi e te musu e fautua i ou matua i ni mea o pisa so'o ai i laua.

[Faataitaiga] - Tamā faamolemole tuu ia lou inu pia ma fasi so'o lo matou tinā. Tinā faamolemole sei tuu ia lou bingo auā ua lua vevesi so'o ai i tupe, ma ua le aia ai foi se tatou mealelei i lenei aso.

3. Aisea e tāua ai le avea o i tatou ma tagata e faatupuina le filemu?

Tali: Auā e tā'ua ai i tatou o fanau a le Atua.

4. Faauma mai e oe, -- O i latou te le faatupuina le filemu e tā'ua i latou o \_\_\_\_\_Satani.

#### **A'OA'OGA:**

1. Ia tatou faatupu le filemu i so o se mea tatou te i ai .

2. 'Aua le faatupu vevesi ma mitavale

3. Ia maua i tamaiti EFKS tagata e faatupuina le filemu i totonu o nuu.

4. O le malovale o le atalii o SATANI

.....

**ASO SA: 12 IULAI, 2015**

**MATAUPU: FEILOĀ'IGA PU'UPU'U, FAAILOGA O LE ATUA PAIA.** [Brief encounters: glimpses of the divine.]

**SINI:** Ia malamalama tamaiti i le uiga ma le faailoga ole fa'aalia o le Atua Paia.

**TUSI FAITAU:** Mareko 9:2-13

#### **FESOASOANI MO FAIAOGA:**

So o se mea matautia ma le ofoofogia, e ui ina faaemo ma vaaia i se taimi puupuu, ae le toe mafai ona galo i le loto ma le mafaufau o le tagata na vaai tino i lea mea. Ua mavae aso e ono, ona ave lea e Iesu o Peteru, o Ioane ma Iakopo i le mauga maualuga ua na o i latou lava. E le o matua faamanino mai e le au fai evagelia po o ai le igoa o le mauga lea, peitai e le o le mauga le mea e tāua, ae o le mea na tupu i luga o le mauga, o le mea sili lea ona tāua.

O le fa'aaliga i le liua o Iesu [transfiguration of Jesus] o lo o laugatasia ai Mataio, Mareko ma Luka i le faamauina o lea vaaiga Mat 17:1-13, Luk 9:28-36. O ō latou ofu ua papa'e ma pupula mai pei o le kiona, fai mai le tusitala o Mareko e leai foi se ta ofu e mafaia ona ta faapaepae faapea ō latou ofu. Lona uiga o se pupula uiga 'ese, fa'aaliga o le Atua Paia, Mamalu ma Silisiliese, e le latalata i ai le tagata.

O le vaaia e so'o e toatolu o Mose ma Elia o le fa'aaliga o le toe tepa i tua i le Feagaiga Tuai ma le faamoemoe i le Malo o le Atua. O Mose o le faamanatuina mai o tulafono, o ia foi o le perofeta, a o Elia e faatusa 'o le muamua'. O Iesu, o ia o le Feagaiga Fou, ma ua atoa i ai mea uma. Fai mai Mareko ua vaaia i latou o fetautalatalaa'i. O le faailoga o le fealofani ma le va lelei o le fanau a le Atua, e ui ina eseese o latou taimi. O le faamoemoe o le Atua sa fa'aalia i nei foi toa o le Feagaiga Tuai, lea ua oo mai ia Iesu.

O Peteru ua faatumuina i le Agaga o le Atua ua afua ai ona tautala atu – Rapi e [aoo], e lelei ona matou faia ni fale apitaga se tolu mo outou. Fai mai le au popoto, ua le oni upu mai ia Peteru, ao upu mai le Atua. Ua vave ona manatua e Peteru o le Atua na afio ifo i le mauga o Sinai ma fa'aali ai lona mamalu i totonu o le tapeneko po o le faleie. O le feiloaiga puupuu a Iesu ma nisi o perofeta iloga o le Feagaiga Tuai.

O upu ua fetalai mai ai le Atua sa faalogoina muamua foi i le taimi o le papatisoga o Iesu i le vai o Ioritana – ‘O lo’u atalii pele lene, ina faalogo ia ia te ia’. O le Tamā ua fa'aali tino mai lana molimau i lona atalii pele e toatasi. Ma le lapataiga malosi ia matuā faalogo tagata uma ia te ia. Faafuasei ona nimo ‘ese Mose ma Elia ae totoe ai na o Iesu. Ua ia fai atu foi i ona so’o ia ‘aue nei ta’u atu i se tasi se ia maea lona toetu mai le oti. Sa le malamalama i latou i ia upu, a o lo o faatatau lava upu a Iesu ia te ia lava.

Sa faaluafesasi le au so’o auā ua latou faalogo so o o faapea le au tusiupu e i ai le taimi e sau ai Elia. Peitai fai mai Iesu ua uma ona sau Elia, o ia e lina faatasi ma Ioane. O Ioane o le atoaga o le galuega a Elia mo le tapenaga o le afio mai o Iesu. Lona uiga, e le aogā ona tausii pea i talitonuga tuai ua lē toe aogā. Sa teena Ioane e tagata ma fasiotia o ia, e faapea foi Iesu sa teena e tagata ma i’u lava ina fasiotia o ia i lana galuega.

E ui ina puupuu le feiloaiga a Iesu o Mose ma Elia, ae ua avea ma ala ua matuā talitonu ai le au so’o i mea na latou vaai ma molimau tino i ai. E le tāua le umi o le taimi e feiloa’i ai ae leai ni mea tāua e tutupu ai.

#### **Uiga o upu & fuaitau:**

1. Rapi - o le aoo.
2. Tapeneko - o le faleie sa fai ma fale tapuai o Isaraelu.

#### **GALUEGA FAATINO: Fesili & Tali**

1. O le ā le uiga o le upu Rapi ?

Tali: O le a’oa’o po o le faiaoga o le Tusi Paia.

2. O ai e lina faatasi ma Ioane i le finagalo o Iesu?

Tali: O Elia.

3. Aisea na musu ai Iesu e ‘aue nei i tala’i atu e le au so’o, le vaaiga sa latou iloa?

Tali: Finagalo Iesu sei oo i le vaitaimi o lona toetu ona iloa ai lea e tagata.

4. “O lo’u atalii pele lene, ia outou faalogo ia te ia.” O ai e ona ia upu?

Tali: O upu mai le fofoga o le Atua.

5. O anafea foi sa faalogoina muamua ai le siufofoga lea o le Alii?

Tali: O le taimi o le Papatisoina o Iesu i le vai o Ioritana.

#### **A’OA’OGA:**

1. O le mauga o le nofoaga tatalo o Iesu, a o i tatou e mafai ona tatalo i so o se mea.
2. E matautia fa’aaliga po o faailoga o le Atua.
3. Ia tatou usita’i ma faalogo i le Atalii pele o le Atua.
4. Ia faaeteete i le toe foi i talitonuga tuai auā ua suia aso ma taimi.

.....

**ASO SA:** 19 IULAI, 2015

**MATAUPU:** O ALA E MAFAI AI ONA ULUFALE I LE MALO O LE ATUA (The possibility of entering the Kingdom of God).

**SINI:** Ia a’oa’oina tamaiti, e le mafaia ona tatou maua le manuia pe afai tatou te lē savavali i ala o le Atua.

**TUSI FAITAU:** Mareko 10: 23 – 31

**FESOASOANI MO FAIAOGA:**

E mafai mea uma i le Atua (All things are possible with God). E le mafai ona aveesea lo tatou ola faalagolago i mea faale-lalolagi nei e saili ai lo tatou manuia. O le vaaiga foi faaletagata, o le tele o le tamaoaiga, o le manuia lea. E mafai ai ona faamalieina le lotu i so o se mea e mana’o ai. Ae ‘a fua foi i mea fai e feagai ma i tatou i aso uma, e foliga mai ai e tau sa’o lea manatu, e pei o faalavelave faaleaiga, mea fai a le nuu ma le lotu, o le tausiga o fanau. E faalagolago le sologa lelei o ia mea i le tamaoaiga tatou te maua. A o le fesili, e mafai e le tele o le tamaoaiga ona maua ai le fiafia moni? (Can wealth bring true happiness?)

I le vaega o le Tusi na tatou faitauina, o lo o faamatala ai e Iesu le faigata ona sao atu o le tagata mauoa i le malo o le Atua. E le faapea e leaga le ave ma mauoa. Ae afai e tele le tamaoaiga, ae le mafai ona fa’aali le alofa i se mea itiiti e foa’i atu, o le ā lona aogā? Afai foi ua ave le oa ma ala ua faigata ona talia ai le Alii, o lona uiga e le aogā foi. Afai e vaapiapi le faitotoa e ulufale ai i le malo o le Atua, ae ua le mafai ona ulu atu i le faitotoa ona e le ofi, ona o le tele o le oa ua maua, e faapefea la ona fa’aaogā lena tamaoaiga?

O le uiga o fetalaiga a Iesu, o le oa sili e ao ona saili muamua e le tagata, o le Atua. Pau lava lea o le oa sili e mafai ai e le tagata ona maua le fiafia moni, ma ulufale atu ai i le manuia sili. O le maua e le tagata o le Atua, e mafai ai ona savali i ala o le amiotonu, ma faasoa atu lona tamaoaiga.

‘Aua le faamuamua mea faalelalolagi nei, ae ia mua’i saili le Atua, o lo tatou ala lea e mafai ai ona tatou ulufale i lona malo.

**GALUEGA FAATINO:** Finauga (Debate).

1. Autu: E mafai e le tele o tupe ona maua ai le fiafia moni? (Can wealth bring true happiness?).
2. Vaega I: E mafai ona maua le fiafia moni
3. Vaega II: E le mafai ona maua le fiafia moni
4. Ia lima (5) minute a le vaega e faasoa mai ai
5. Faamamafa – e faai’u ai le finauga: Ua na o le Atua ma ala o lona malo e mafai ai ona maua le fiafia moni: Faataitaiga, pe afai o oe o se tagata alofa ma agalelei, fai mea tonu ma sa’o e te maua le fiafia moni.

**PESE:** Saili muamua le Malo o le Atua

**AOAOGA:**

1. Saili muamua le malo o le Atua ona tāua lea o le oa e alofa ma agalelei ai i isi tagata
2. Ua fai le oa ma Atua i isi tagata ua faamamafa le oa
3. E faigata ona sao atu le mauoa i le malo o le Atua, auā ua leai se avanoa o le Alii ma lona finagalo ma ala o lona malo i lona lotu
4. E suamalie faaniu aati le lautele ma le matagofie o manaoga ma tuinanau e tosina ai i tatou e le oa.
5. E le faaolaina lou agaga i le oa, a o le lotu salamō ma le olaina o le finagalo faaola o le Alii

.....

**ASO SA:** 26 IULAI, 2015

**MATAUPU:** FAUSIAINA, FAATUMAUINA, FAAFOUINA

**SINI:** Ia malamalama tamaiti e ao ona vivii ma faafetai i le Atua ona o lana foafoaga matagofie. E le gata na ia fausia le lalolagi ae na ia faatumauina foi lona matagofie.

**TUSI FAITAU:** Salamo 104: 19 – 30

**FESOASOANI MO FAIAOGA:**

O le Salamo lenei e foliga mai o se aotelega o galuega na faia e le Atua e pei ona foafoa ai le lalolagi. O mea uma na faia e le Atua e pei ona faamatala mai e le fai-Salamo, o mafuaaga ia e ao ai ona vivii ma faafetai ai le tagata i lona Suafa.

O le lalolagi o lo o tumu i fesuiaiga o mea eseese o le ola, ma o lo o atagia ai le silisili ese, agalelei ma le poto sili o le Atua ma lona alofa mai. O laau, e tutupu ma fa'aaogaina, ae toe totogo a'e ona la, ma faafouina i ona fatu. O manu ma meaola, e fanafanau o le faailoga o le ola faafouina. Le tagata, le foafoaga sili a le Atua, ua ave i ai le poto, atamai, taleni ma agavaa, le suli vaaia o le Atua ua faatotogaina i meaalofoa t'ua mai le Atua. O le silisili ese o le Atua na ia fausia ai mea uma, o lo o faamatalaina i le salamo lenei o le malosi lea o le Atua ua ia pulea ai le lagi ma le lalolagi atoa.

Ua tele ona manatu ifo nisi, ua le toe manaomia le Atua. Ua malamalama i le faagasologa o mea o le ola nei. O le faauigaina o mea o le natura ma mea e tutupu. O le agasala foi, ua na o se mea e le amanaia e le Atua. Manatu ia ua sese ai le tagata, ua oo ai ina ia soona fai ma faaleaga le foafoaga matagofie a le Atua. Ma o le tagata foi ia, ua le gata ina ua oti faaletino, ae ua mate foi le ola faaleagaga ona o le agasala.

O le Atua na te toe fausiaina, faatumauina ma toe faafouina le tagata i lona alofa tunoa. E manao le Atua i le mea sili mo le tagata. E ao foi i le tagata ona saili ma le loto atoa, le finagalo moni o le Atua mo ia.

**GALUEGA FAATINO:** Fesili e tali

1. O ā mea na faia e le Atua i le aso muamua?
2. O ā mea na faia i le aso lua?
3. O ā ni meaalofoa t'ua na ave e le Atua i le tagata?
4. Aisea e ao ai ona vivii ma faafetai le tagata i le Atua?
5. E faapefea ona avea oe ma tagata ua faafouina?
6. O ā ni mea ua tatou vaai i nei aso, ua faaleagaina ai le siosiomaga?
7. Faamata e finagalo le Atua ina ia puapuagatia le tagata? Faamatala le uiga o lau tali pe afai e Leai pe Ioe foi.

**A'OA'OGA:**

1. Ia iloa ona vivii ma faafetai i le Atua.
2. Na fausiaina, faatumauina ma faafouina e le Atua le tagata ina ia ola manuia.

.....

**ASO SA:** 2 AOKUSO, 2015.

**MATAUPU:** FILEMU I LE NATURA O MEA (Paying attention to nature.)

**SINI:** Ia a'oa'o le fanau ia malamalama, e i ai le filemu o le Atua i mea uma o lana foafoaga.

**TUSI FAITAU:** Salamo 104: 5- 18.

**FESOASOANI MO FAIAOGA:**

O le foafoaina e le Atua o le lalolagi, na Ia matuā tuu mavaevae ma tuu matamaga mea uma. O le lalolagi, ua mausali lona faavae ina ia le gae'e e faavavau. Ua iloga mauga ma vanu. O alia foi ma ala ua iloga e fetafea'i i ai vai mai i ia alia. Ua iloga le tuaoi o le sami ma le laueleele. Ua iloa e le sami le mea e gata ai, ina nei toe foi mai ma lofia uma ai le laueleele Ua iloga ala o vaitafe ma agai atu ai i le sami.

E felagolagomai mea uma, o laau ma manu ma mea uma o le foafoaga. E le faanoia pe faatauina nofoaga, o meaai ma vaiinu. E le femisaa'i pe pisapisaō ona o tuaoi; pe misa foi ona o le aiū i meaai ma vai. Ai ona o le foafoaga ma lona faatulagaga, ma nofoaga na tuu i ai meaola; ua iloga ai vaega e nonofo ma ola fiafia ai.

O le mataupu la o lenei Aso Sa - **Filemu i le Natura o mea**. O se gagana vali ata. O lo o vali mai ai le natura o le foafoaga a le Atua. E toafilemu ma nofo lelei mea uma e tusa ma le finagalo paia o Le Atua. Auā o Ia lava na faavaeina le lalolagi, i luga o ona faavae e lē mafai ona maluelue e pei o mea e faia e tagata. Ua Ia faataoto le sami ma le vai i itu ma nofoaga e mau ai. O mauga foi ma vanu; ua Ia faia foi tuaoi ina nei fesopoa'i le foafoaga.

O vaipuna e fetafea'i i va o mauga ma vanu, e faasusu ai atumauga ma le laueleele. E feinu ai manu uma o le vao. E fai ma fiafiaga o manu felelei i la o laau o tutu latalata ane i ai.

Ua faatupuina foi e Le Atua le mutia i le laueleele mo manu vaefa, ma le tele o mea toto e aogā e maua ai le fua lelei mai le laueleele mo meaola. E le gata ina maua ai le meaai, ae maua mai ai foi ma le uaina lelei e faamalosi ai le tino o le tagata. O arasi o Lapanona na totoina e fai ai ofaga o manu iti. O oti o le vao ua fai mo latou mauga maualuluga, ma papa ua fai ma nofoaga o sefanaia.

O lona uiga, e lei soona faia fua e le Atua mea ua i le foafoaga. Ua Ia faataoto mea taitasi ma lona natura. O le faamoemoe, ia ola fiafia ma ola fetalia'i mea uma. E faamoemoe manu felelei ma manu o le laueleele i laau mo le ea latou te manavaina, ma fua o laau mo meaai. E faapena foi laau i manu. O laau foi, ua fai ma fale e nonofo ai manu felelei, ma faamalumu ai vaitafe ma alia mai le miti'ia e le la; e faalagolago foi i ai le laueleele, mo le taofiaina mai le tafia i le suavai pea oo ina tetele tafega.

O mea uma la, ua i ai o latou matafaioi tausī, ina ia ola felagolagoma'i ai mea uma o le foafoaga, ma maua ai le filemu. E le soona vevesi vale pei o le tagata, pe a maua i le popole ona ua le lava le faasoā. E i ai taimi e fiafia ai, o taimi e ita ai ma taimi e faanoanoa ai. A o le natura o le foafoaga ua uma ona faataatia e le Atua; e tumau pea lona filemu e oo i le faavavau. O lona uiga, o le mamalu ma le mana o le Atua, ua iloa i

mea ua ia faia; auā o le filemu o le foafoaga, ua iloa ai le finagalo paia o le Atua. Ia ola fiafia ma ola saoloto mea uma. E lē popole, e lē atuatuvaile; e lē ita pe faanoanoa foi; ae na o le ola fiafia auā ua talitonu ma faatuatua faamaoni i Le na faia le foafoaga.

### **GALUEGA FAATINO: Taliga Fesili**

Fetufaa'i ma le vasega i fesili o lo o i lalo, e fa'aalia ai lo latou malamalama i le mataupu o lenei Aso Sa.

#### **Fesili:**

1. O ai na foafoaina le lalolagi?

**Tali:** O le Atua Soifua.

2. O le ā le finagalo paia o Le Atua i mea uma o le foafoaga?

**Tali:** Ia ola felagolagoma'i ma ola fiafia mea uma o lana foafoaga.

3. O ā ni natura o le Atua o lo o iloa i lana foafoaga?

**Tali:** O Le Atua Foafoa. (Auā o Ia e toatasi na foafoaina ma faia mea uma o lo o i le lalolagi ma le lagi). O Le Atua Alofa. (O le finagalo o le Atua ia filemu mea uma o le foafoaga ina ia maua ai le fiafia).

#### **A'OA'OGA:**

1. E tumau pea le filemu o le Atua ia i tatou pe a tatou tumau i le faatuatua faamaoni ia te Ia.

2. O le finagalo o le Atua, ia tatou ola felagolagomai ma ola fiafia i mea uma o lana foafoaga.

3. Ia faatumauina e i tatou le matagofie o le foafoaga a le Atua.

.....

**ASO SA:** (Aso Sa o Tamā) 9 AOKUSO, 2015.

**MATAUPU:** **IA PESE MAI LE LAUPEPA O LE PESE**  
(Singing from the same hymn sheet.)

**SINI:** Ia a'oa'o tamaiti ia malamalama, so o se pese lava sa fatuina ma usuina e le e ona lea pese, e tatau lava ona tatou mulimulita'i i ai.

**TUSI FAITAU:** Salamo 136: 1- 9

### **FESOASOANI MO FAIAOGA:**

O pese ua fatuina e i latou ua i ai tomai ma agava'a faapitoa. E malie ma fia faafofoga i ai le au faalogologo, auā e le gata o se pese e fou i le faalogo lona fati, a o upu foi o fa'aaogaina, o lo o faigofie ai ona iloa le mea o lo o faatatau i ai lea pese.

E eseese lava fatuga e fiafia i ai le fatu pese ia, ma le mafuaaga e ala ai ona fatuina se pese. Peitai o nei pese e malie lava lona fati ma ona upu sa tusia ma fatiina ai e le na fatuina lea pese. Peitai i lenei talutalu fou ua tatou i ai, ua tele lava ina suia e isi fia fatu pese fati o pese a isi fatu pese, ina ia tusa ma lona mana'o. E le gata la o le a aveesea ai le agaga na fatiina ai lea pese, ae o le a aveesea ai ma le lagona na mafua ai ona tusia lea pese.

O le tatou mataupu la o lenei Aso Sa, 'Ia pese mai le laupepa o le Pese', o lo o aumai ai se uiga e mafaufau loloto i ai le tagata ia; Ia pese i upu o le pese sa tusia ai e lē e ana le pese. E le afaina po o o le ā le fati, a o le mea ia mautinoa, ia sa'o upu o lo o fa'aaogaina, o upu a lē na tusia le pese.

O le Salamo sa faitauina, ma lona faamoemoe, ia fai ma viiviiga o le Atua o Isaraelu. O se tasi lea o Salamo e masani ona fa'aaogaina i taimi o aso faamanatu o le nuu o le Atua. Pe a potopoto ma fai tausamiga ma osiga taulaga i le Atua soifua.

Fai mai le fai-salamo, 'Ia outou vivii atu i Le Alii, auā e lelei o Ia; auā e faavavau lava lona alofa'. Vivii atu outou i Le Atua o atua; auā e faavavau lava lona alofa. Vivii atu outou i le Alii o alii; auā e faavavau

lava lona alofa'. O le manatu o le fai-salamo, o le Atua lava lea na osi feagaiga ma auga tamā o Isaraelu i le amataga, o Ia lava lea e tatau i ai le faane'etaga. Auā o le Atua mai le amataga e oo i le faavavau. E ō mai tupulaga ma mavae atu, ae tumau lava le alofa ma le pule aoao a le Atua. O le uiga lea o le 'faavavau', e le iloa po o fea e gata mai ai, e le uma, e faifai pea lea alofa ma tumau lea pule, mo isi tupulaga o lo o mulimuli mai.

E le mafaia e nisi atua ma alii o le lalolagi ona faia ni vavega e pei ona faia e le Atua soifua. O le foafoaina o le lagi ma le lalolagi ma mea uma o i ai, na faia lava i le potu e tasi; o le potu lava o le Atua. Na ia tuuina foi le pule i le natura o le foafoaga, ina ia ola saoloto ma ola fiafia mea uma. O le la e pule i le ao ma le masina ma fetu e pule i le po. O lona uiga ua i ai le pule i mea uma o le foafoaga.

E tusa ai ma le tala a Kenese, o lo o manino mai ai, e le o i ai lava la se isi mea fou e ese mai mea na faia e le Atua. E le o i ai foi ni vavega na faia e atua ma alii o le lalolagi. Ua na o galuega lava a aao agalelei o le Atua.

O le ofoofogia lea ma le silisiliese o le Atua, e tulagaese ai i tagata ma atua o le lalolagi. Auā o le faataotoga e le Atua o lana foafoaga; e le na o le amataga ma tagata o lona vaiata; ae mo tupulaga foi o le lumanai. O le manatu lea na ala ai ona tusia lea pese, ina ia pepese ai foi ma tatou. Ina ia tuutaliga i isi tupulaga o mulimuli mai.

I le satauro o Keriso, ua atoa i ai lona pese faamaoni i le laupepa o le pese i lona fai ma Alo o le Atua ma Atalii o le tagata - o lona fai mona lea o le uiga o le pologa e ala i lona ola paia ofo atu atoa, o le taulaga ma le togiola mo ā tatou agasala. Ma o le alofa tunoa ma mutimuti vale lea o le Atua le Tamā e maua fua i le salamō ma le faatuatua i le suafa o Keriso Iesu le Alii ma le Faaola. Ia fai ma pese malie iō tatou ola le alofa ma le usitai o Keriso i le Atua. Ia fai ma pese malie iō tatou olaga lona ola auauna atu. Sa ia faagaogao o ia ina ia faatamaoia ai i tatou i lona mativa – ina ia tatou maua le ola fou ma le malosi fou faaleagaga e ola ai e tusa ma lona finagalo.

**GALUEGA FAATINO: Taliga Fesili:**

1. O le ā le faamoemoe o le Fai-Salamo na tusia ai lenei Salamo?

**Tali:** Ia fai ma viiviiga o le Atua ia Aso Faamanatu o Isaraelu; ma ia tu’u taliga i tupulaga fai mai, vavega na faia i le poto o le Atua, e tumau lona matagofie e oo i le faavavau.

2. O ā vavega tetele na faia e le Atua lea e tā’ua e Tavita?

**Tali:** O lo o talanoa le Fai-Salamo i le foafoaga paia a le Atua na faia lava i lona mataisau.

3. O le malamalama na faia e faailoa ai le ..... ma le ..... ma ..... i le po.

**Tali:** E faailoa i le ao, ma le masina, ma fetu.

4. O le ā le manatu o le Fai-Salamo i le foafoaga a le Atua?

**Tali:** Ia faatumauina lona matagofie i lea tupulaga ma lea tupulaga.

**PESE:** Fai ma sulu e mumu (380, Pese & Viiga EFKS).

**A’OA’OGA:**

1. O le viiga ma le faaneetaga, ua na o le Atua e tatau ai.

2. E leai lava se mea fou o faaopoopoina i le foafoaga a le Atua.

3. Ia fai le pese ua sauni ma pese e faatumauina ai le mamalu ma le silisiliese o le Atua soifua e faavavau.

4. Ia fai Keriso ma ā tatou pese tumau e ta’ita’i ai ō tatou ola i aso uma

.....

**ASO SA: 16 AOKUSO 2015**

**MATAUPU: UA SOLA ESE (The runaway).**

**SINI:** Ia a’oa’oina le fanau ia malamalama o le sola ese, o le lē usitai lava lea i se faatonuga. O le sola ‘ese o lo o faamamafa o le sola ese lea mai le mea sa’o ae alu fai le mea sese.

**TUSI FAITAU:** Iona 1:1-3

**FESOASOANI MO FAIAOGA:**

O Iona o le perofeta a le Atua na vaalau i ai le Atua e alu i le aai o Nineva. Na lē usita’i Iona i le faatonuga ona sola lea i le vaa e aga’i i Tasesa. O Nineva o se nuu e maoa’e lona tamaoiga, e toatele tagata atamamai o lo o nonofo ai. E lauiloa foi i lona malosi faafitafita. E valaau la le Atua iā Iona o lo o fai Nineva ma ō latou fili numera tasi ona sa le i mafai ona latou manumalo mai ai i le malosi o ana fitafita tau.

Ua sola Iona i le fefe i le oti, aemaise ai o le manao ia faaumatia pea Nineva e ala i le aao malosi o le Atua. E manatu o lagona ia na tutupu ane na mafua ai ona sola ese mai ai. Peitai, e lē o le finagalo lea o le Atua. O le alofa o le Atua e tutusa uma ai tagata uma, o le ata o lana faaolataga o lo o ala atu ia Isaraelu mo le lalolagi atoa. E le o le sola la, ae tāua le usita’i e fai le faatonuga. O le faatonuga ma le feau a le Atua, e le gata e iloa ai e Nineva lo latou ola agasala, ‘a ua tuu i ai ma le avanoa e salamō ai. E lē itiiti la le sao o Iona e tatau ona usita’i ma faia le feau ua poloai ai.

Na fetalai manino le Atua ia Iona –Ta’u ia Nineva ua o’o mai i ou luma lo latou ola agasala. A toe soso’o le poloai o lo o i ai ma le avanoa – Toe 40 po ona faaumatia lea. O Iona uiga, o lo o i ai pea le avanoa e faasaoina ai pe afai e salamō faamaoni. O le ata manino lea o le alofa tuuavanoa o le Atua.

Ua manino le tala e ui ina sola Iona ae sa toe saunia e le Atua le ala e toe oo ai i Nineva. Ae a manatu i le sola o Iona ma le silafaga ati a le Atua, ae le gata i lea o le Atua auai i so o se mea. (omnipresence). Ona iloa lea

o le sola e le o lilo i le Atua. O le upu *vaa* i lona faaliliuga mai le gagana Eperu ua mafai ona faapea – *o le puipui o le afioaga o le Atua*. O lona uiga o lea e toe sola Iona aga’i i le Atua. O le eseesea lea o le manatu o le tagata ma le silafaga ati a le Atua. E manatu le tagata e sola ina ia lafi ma lē fia faia ai se faatonuga. Peitai o lo o sisila fofoga o le Atua.

O se faamanatu foi lea mo tatou le fanau. O le silafaga a le Atua ua faapena foi le ata o matua. O matua foi o le sui vaaia lea o le Atua i totonu o aiga. E tatau ai ia i tatou le fanau ona faalogo ma usita’i i le faatonuga e aumai e matua. Ae ‘aua tatou te sosola ese ai, auā o le sola ese lava foi lea o le manuia mo tatou.

I le satauro o Keriso, ma lona toetu ua toe maua mai ai i tatou sa sola ese ona o le ola agasala ma le solitulafono - e ala i le loto salamō ma le faatuatua i lona suafa. Ioe, o le tagata sola ese o le tagata palaai ma alofa faapito ia te ia lava. O le faailoga foi o le le fia usita’i i le Alii ma lona finagalo paia.

#### **GALUEGA FAATINO: Faatino le tala**

Fautuaina le faia o se faatinoga puupuu o le tala ia Iona. O le faamoemoe ina ia manino auā o le sola lava ia ua o se vaaiga faaletino lea o le liliu ese mai le faatonuga ua faatonuina ai.

**PESE:** Ia faalogologo atu (181, Pese & Viiga EFKS).

\*\*\* (Usu le f.1 & f.5 mo le mataupu).

#### **A’OA’OGA:**

1. O le sola ‘ese o le lē usita’i lava lea.
2. E leai se mea e lilo i le silafaga ati a le Atua.
3. Faalogo ma usita’i ae lē o le sola ‘ese ona o le manatu faapito.

.....

**ASO SA:** 23 AOKUSO, 2015

**MATAUPU:** PESE O LE ALOFA (Song of Love).

**SINI:** Ia a’oa’oina le fanau ia malamalama o le pese o le isi lea auala e momoli ai lagona o le fiafia ma le alofa e lē o mafai ona iloa tino.

**TUSI FAITAU:** Pese a Solomona 1:12-14

#### **FESOASOANI MO FAIAOGA:**

O le Pese a Solomona o lo o tele ina faamauina ai nisi o fatuga po o pese. O lo o momoli ai lagona o le Tupu o Solomona. A o le isi lea faamoemoe o le fatuina o pese. E momoli mai ai ni lagona e pei o le fiafia, faanoanoa, faaseā, lapataiga, o le alofa ma nisi. O le pese a Solomona e pei ona faitauina ua mautinoa lava o lagona o le ALOFA.

O le alofa o lagona ia e mafanafana ai mafutaga, e pei ona i ai le alofa o le tinā i lana tama, o le tamā i lona atalii, o le uso ma le tuafafine. A ua faapea foi le alofa i le va o Solomona i lana uō.

O le alofa lea o lo o faatusa i ai le alofa o le Atua i lona nuu o Isaraelu. O le mafanafana o le va feso’otai o le Atua ma lona nuu. O le pese o le Tupu o Solomona ua naunau lona loto i lana uō, ua aumaia le ata o le naunau mai o le Atua i lona nuu o Isaraelu ina ia la mafuta pea i le agaga o le fealofani. O lona uiga ia matuā vava lalata ma sologa manuia le mafutaga a le Atua ma lona nuu o Isaraelu.

O le mea moni o le Atua lava ia o le Atua e faamaoni, o le Atua e le mavae lona alofa mai pea. Le ala lea o le lagiina o pese, ona o lagona ua le mafai ona taofiofi ma taotaomia i le fia saafi pea ona o le alofa. Peitai ua le tutusa le naunau mai o le Atua ma le mafuta atu o lona nuu. Ona e i ai taimi e le moni ai le alofa o le nuu i le Atua, a o le Atua lava ia e tumau lona alofa. O le pese la a le Fatu pese o lo o aumaia ai le ata o le atoatoa o lagona i se mafutaga o lo o fusia i le alofa faale-Atua.

O le feau mo tatou le fanau - alofa i ou matua ma so o se tagata. E iloa lea ina ua tatou usita’i ma ava i matua. O le pese ua na o se auala e



momoli ai le alofa, ae tāua le faatinoga o lo tatou alofa. O le poloaiga sili lea a Iesu – *Ia e alofa atu i le lua te tuaoi ia pei o oe lava ia te oe.*

I le satauro o Keriso ua fa'aalia ai le alofa silisliese o le Atua i tagata uma. Ua fai lona ola paia ma pese o le alofa e faafouina ai lo tatou malosi ma tatou maua ai le saolotoga moni nai le pule a le agasala ma le tiapolo. O ē sa lē alolofa ona o le tiapolo ma le ola agasala – ua mafai ona fai ō latou ola ma pese o le alofa i le Alii ma isi tagata e ala i le loto salamō ma le faatuatua i le Alii o Iesu Keriso.

#### **GALUEGA FAATINO:** Taliga Fesili:

1. O le ā le ituaiga tusitusiga e i ai le Tusi sa faitauina?  
Tali: O tusitusiga a le Poto (Writings/Wisdom Literature).
2. O le ā se tāua o le alofa i le va feso'otai ma tagata?  
Tali: Auā o le Atua na faia i tatou o le alofa lava ia
3. O ā nisi pese o 'e iloa o lo o faatatau i le alofa?  
Tali: Ta'u mai e le vasega
4. O le ā le so'otaga o le Tusi Faitau ma le Alofa o le Atua ia Isaraelu?  
Tali: O le alofa naunau ma tumau o le Atua i ona tagata filifilia

**PESE:** Matou te fia sauni nei (22, Pese & Viiga EFKS).

#### **A'OA'OGA:**

1. Ia fai lona ola ma pese o le alofa e viia ai le Atua
2. Ia pulunaunau lou alofa ia ola ai nisi o mafatia
3. Ia faamafanafana lou alofa i nai tagata faanoanoa
4. O le alofa moni e iloa i galuega alofa ae le na o upu

#### **TATALO:**

Le Atua alofa e, o lau Afio o le alofa ma le alofa mutimutivale uma lava. Vivii fai a'e o matou loto, aua ua matou molimauina pea lou alofa tausii mai i lo matou ola. Ua e tausii i matou i ou aao agalelei i aso uma o lo matou ola. Faafetai i le alofa ua fusia ai pea o matou aiga, ma le va fesootai ma uso a tagata. Faamagalalo i matou, auā ua matou iloa lou finagalalo alofa ua a'oa'o mai pea, a ua le tusa ai ma la matou tali atu i lau

Afio. Tatalo ia saga faamanatu mai pea ma tupu le alofa o lau Afio i o matou loto, matou maua ai pea o le fealofani sili e pei ona e poloai ai..E ala iā Iesu...Amene.

.....  
**ASO SA: 30 AOKUSO 2015**

**MATAUPU: FAAMANATUINA O LE ULUA'I FUA** (An early harvest festival)

**SINI:** Ia a'oa'oina le fanau ia malamalama e tataua lava ona ave le faafetai i le Atua e ala i se ulua'i fua ua maua o le faatoaga.

**TUSI FAITAU:** Teuteronome 26:1-15

#### **FESOASOANI MO FAIAOGA:**

O le faamoemoe maualuga o se fai faatoaga, ia faia le faatoaga ina ia fua mai i ni fua lelei, e tali ai le galala i le fia tausami. Ia po o nisi foi faamoemoe lelei e pei o le maua ai o le tupe. E galue la ma tulimata'i le taimi e fua mai ai. Peitai e tataua le fua mai ina ua faamaoni le galue a le faifaatoaga.

E toaga e tausii lelei e ala lea i le puipui mai i manu faalafuā, vele ese le vao leaga, faasūsū, ma ia mautinoa o lo o lelei le eleele o lo o faia ai le faatoaga. A oo la ina fua mai ona lagona lea o le fiafia, 'a ua masani foi le tagata faifaatoaga i le ofoina lea o le ulua'i fua mo le Atua. 'A le o le Faifeau po o nisi foi ua taualoa i totonu o sosaiete.

Ua faapena le tu a Isaraelu ina ua taunuu i le nuu na folafolaina. O lo o tā'ua le faapolopolo o fua – o lona uiga o ulua'i fua po o fua muamua lava ia o faatoaga a Isaraelu, 'a oo i lona ulua'i fua lelei ona tuu ese lea ma faapolopolo e i ai le taimi e ave ai i le au ositaulaga ma sa Levi mo le ofoina mo le Atua. O le faamoemoe o lea taulaga o le ofoina lea o le faafetai i le Atua, ona o lona aao taitai sa taitaia mai ai le nuu mai le vao, ma ua taunuu ai ana folafolaga i le nuu o lo tafe ai le suasusu ma le meli. O le taunuu la o le nuu i totonu o Kanana ma faato'a loa le laueleele mo

faatoaga, ona fua mai lea o faatoaga i ona ulua'i fua. O le tāua lea o lea tu ma le aga o le faamanatuina o le ulua'i fua i totonu o Isaraelu.

O le faamanatuina la o le ulua'i fua, e le gata o se aga e faamanatu ai le alofa o le Atua, 'a ua manatua ai foi e Isaraelu le amataga mai lava a o faapologaina i Aikupito seia taunuu mai i Kanana. O ia mea uma e faia ma le loto ua faatuatua atoatoa i le aao ta'ita'i o le Atua.

O se feau foi lea mo le fanau, o ā ni mea lelei ua tatou maua. Ia tatou manatua ona faafetaia le alofa ma le agalelei o le Atua. Ia ofoina e ala i le fua muamua o ā tatou faatoaga, o lona uiga – o mea e lelei ma atoatoa e ave mo le Alii. O se laasaga fou foi ua tatou oo i ai e ala i le soifua a'oa'oina ia manatua le alofa o le Atua.

I le satauro o Keriso, na tatou iloa ai le fai o lona soifua paia sasa'a atoa mai pei se ulua'i fua lelei atoatoa e lē ila ma lē pona, ina ia tatou maua le ola fou e ala i le salamō ma le faatuatua i lona suafa. I lea ola fou ua fai ai ō tatou ola ma taulaga ola (living sacrifice) pei o se ulua'i fua lelei ma faapolopolo a le Atua ma Keriso ua fa'aalia ai le finagalo paia o le Atua, ma viia ai lona suafa paia.

**GALUEGA FAATINO:** Fesili e tali:

1. Aiseā e tāua ai le ulua'i fua?
2. I le faatinoga o le momoliina o le ulua'i fua – O ai e masani ona ave i ai?
3. O ā ni auala e ola lelei ai ma fua mai ai faatoaga?
4. O ā ni faatoaga o taatele i nei vaitau?

**PESE:** E! le siufofoga alofa (42, Pese & Viiga EFKS).

**A'OA'OGA:**

1. Ave le mea lelei mo le Alii
2. 'Aua le fai taulaga leaga i le Alii
3. 'Aua le ola sisi'o ma alovao ina ua ta ane le taulaga e lei saunia se taulaga
4. Fai le ola ia Keriso ma taulaga mo le Atua ma ou matua

**TATALO:**

Faafetai lo matou Atua – ona o le alofa tausii o lau Afio ua e le tuuaunoaina ai lava lo matou ola. E ala i fua o le tino ua e foai mai. O fua o le laueleele o i'a ma figota o le sami, ma le tele naua o mea ua aoga i lo matou ola. Faafetai i lou siosiomaga matagofie ua siomia ai i matou. O taaviliga eseese o mea o le foafoaga ua ala mai ai lou tamaoia mo lo matou ola. Matou te faatoese ona ua matou le fa'aaoga ma le tatau o fua o le alofa o lau Afio, ua matou faagalo i lau Afio i taimi e solo lelei o matou ola i fua matou te maua. Faamanuia lau Afio i a matou faatoaga ma atina'e eseese aua lo matou ola, ua matou valaau e ala iā Iesu Keriso lo matou Alii... Amene.

**ASO SA:**

**(Aso Sa Talalelei) 6 SETEMA, 2015**

**MATAUPU:**

**FOAFOAGA A LE ATUA; O LE TATOU MATAFAIOL.** (God's handiwork; our responsibility)

**SINI:**

Ia a'oa'o le vasega ina ia malamalama lelei i le uiga o le mataupu, ina ia mafai ona maua mai ai ni a'oa'oga tāua mo i latou.

**TUSI FAITAU:**

Salamo 8

**FESOASOANI MO FAIAOGA:**

O le Tusi Faitau, o lo o faamatalaina ai e le fai-Salamo galuega ofoofogia na faia ma tapenaina e le mata'isau o le Atua. Na ia faia le masina ma fetu o le lagi, o manu fetolofi i le eleele ma manu felelei i le vanimonimo ma i'a o le sami, e leai lava se mea na faia e le'i faia e Ia. Na ia tu'u fo'i le pule i le tagata e tausia ai lana foafoaga, a o le ata va'aia lea o lana faaeaea i le tagata na ia faia.

O le faailoga o le Atua feso'ota'i mai i le tagata, o lona uiga o galuega na faia e le potu ma le atamai sili o le Atua na foafoaina ai, o galuega ina ia faatumauina ai pea le feso'otaiga o le tagata ma le Atua, ina ia mautu le

so'otaga o le tagata ma le Atua i taimi uma ma aso uma. Lea ua tatou manuia ma ola fiafia i le siosiomaga ma le foafoaga na faia e le Atua i le lalolagi. A o le ā se tali atu a le tagata, o le ā la tatou matafaioi ina ia tumau ai pea le so'otaga ma le Atua manatu mai?

O le ola vivi'i i le Atua, e pei ona vivi'i le fai Salamo i le Atua, e faapena la tatou matafaioi e tali atu ai i le alofa mai o le Atua. O iina e atagia ai le so'otaga o le tagata ma le Atua, o le tatou vivi'i ma vivi'i pea i le Atua e le aunoa. O ā lava mea uma na faia e le Atua, o mea lava ia e ao ona vivi'i i le Atua, o tama meamea ma tama fesusu, vivi'i i le Atua, aua o mea ua tatou maua, o galuega ia na faia e le Atua, ina ia tumau pea le ola vivi'i o le tagata i le Atua, a o le ata lea o le ola feso'otai mai o le Atua i le tagata e ala i lana foafoaga mamana na ia faia, ma faatumauina ai pea le so'otaga o le tagata ma le Atua manatu mai.

E ui lava ina le faamaoni le tagata i le tausiga o le foafoaga na faia e le potu ma le mataisau o le Atua, ma o'o ai ina leai se toe ola vivi'i o le tagata i le Atua, ae na saili mai pea le Atua e ala i le faaolataga na ia tapenaina i le soifua paia o Iesu Keriso. O lona satauro ma lona toetu ua tatou toe iloa ai le paia o mea na faia e le Alii mo le manuia lautele o tagata uma. Ioe, o le mafaufau ua faapaiaina e le alofa tunoa o le Atua ia Keriso Iesu na te iloa le paia o mea na faia e le Atua ma ia tausī ma faapelepele ma teuteu ia fua mai atili mo le viiga o le Atua.

**GALUEGA FA'ATINO:** Fetufaa'iga i fesili.

1. O le ā sa tatou tali atu i le alofa mai o le Atua ia i tatou?

Tali: E ao ona tatou ola vivi'i ia te ia ona o lona alofa tele ua tatou manuia ai.

2. Faapefea ona tumau lo tatou so'otaga ma le Atua?

Tali: Pe a fai tatou te tausī ma le faamaoni lana siosiomaga na faia mo tatou, ma ia o fa'atasi ma le ola vivi'o ia te ia, ona fa'atumauina lea o le so'otaga ma ia.

**PESE:** Vivii atu ia i lo tatou Alii (83, Pese ma Vi'iga)

### **A'OA'OGA:**

1. Ia tatou fiafia e ola vivi'i i le Atua.
2. O le tatou matafaioi, o le faafoi le vi'iga i le Atua.
3. O tatou o tausī mea a le Atua i lana foafoaga.

.....

**ASO SA:** 13 SETEMA, 2015

**MATAUPU:** IOSEFA, 'AUA LE TAUIMASUI.  
(Hey Joe, don't make it bad.)

**SINI :** Ia a'oa'o ina le vasega ina ia malamalama lelei i le uiga o le mataupu ma faasoa e ala i ni fesili e iloa ai ua malamalama.

**TUSI FAITAU:** Kenese 37: 2 – 14a

### **FESOASOANI MO FAIAOGA:**

E manino lava le tala na faitauina mai le Tusi Faitau, ina ua faamatalaina e Iosefa le uiga o ana miti i ona uso, fai mai ua latou fusifusi, fusi saito i le fanua, ona siosioina lea o lana fusi saito e fusi saito a ona uso ma latou ifo i ai. Ua toe faamatala e Iosefa i ona uso le isi ana miti na fai, o le atu lua lea, o le la ma le masina ma fetu e sefulu ma le tasi ua latou ifo mai ia te ia. Ona tupu tele ai lea o le inoino o ona uso ia Iosefa ma ua latou taupulepule e fasioti ia te ia, a o lona tamā ua a'oa'i ia te ia ma ua teu i lona loto le uiga o ana upu. O uso o Iosefa o lo o feagai ma le leoleoina o le lafu mamoe a lo latou tamā, ua mavae nai aso ona poloa'iina lea o Iosefa e lona tamā ina ia alu e asi ona uso po o ā mai, ona foi mai lea ma se tala. Ina ua taunu'u Iosefa i ona uso, o iina na tupu ai le fia fasioti o ona uso ia te ia, peitai na latou lafo ia Iosefa i lalo o le lua e le o i ai se vai, ae ua latou le fasioti ia te ia.

E iu lava i nei puapuaga na o'o ia Iosefa, ae lei mafai ona tu'ulafoaina e le Atua auā ua i ai le faamoemoe o le Atua mo Iosefa, o ia e fai ma faaola i lona aiga i taimi faigata. Na sui filifiliga a ona uso ia Iosefa, ma latou faatau atu loa i tagata Mitiana o lo o aga'i atu i Aikupito, ae ua toe

foi ona uso ma ta'u i lo latou tama - o Iosefa ua aina e manu feai, ona tupu tele ai lea o le faanoanoa i le toaina auā ua toesea lona atali'i e pele ia te ia. E le o iloa e uso o Iosefa, o lea ua aga'i atu o ia e faataunu'u le faamoemoe o le Atua na ia finagalo i ai. Le faamoemoe e le iloa e se tagata fuafuaga loloto a le Atua, auā o si mea na faatauva'a i le va'ai faale-tagata, ae ua tapenaina ma saunia e le Atua e fai ma mea ofoofogia e faailoa atu ai lona mamalu ma lana pule aoao.

O le va'ai mamao lea faa-le-Atua, lea ua o'o le oge i le nu'u o Kanana o lo o nonofo ai Iakopo ma lana fanau, a o lea ua toe sulufa'i i Aikupito mo se fesoasoani i mea'ai. Lea ua faaeaina Iosefa i Aikupito ona o miti a Farao na ia faamatalaina, ina ua le mafai e tagata popoto ma taulaitu o Aikupito ona faamatalaina, lea ua avea ma ali'i sili, e pule foi i le nu'u uma, ua na o le nofoali'i o Farao e sili ai ia Iosefa.

Le tofa faa-le-Atua e le o'o i ai le iloa o se tagata auā o lea ua faaeaina e le Atua Iosefa ma ua fai ma faaola i lona aiga. O le upu moni e le i tauimasui Iosefa i ona uso ona o le latou agaleaga ia te ia, auā o le tagata ua utufia e le Agaga o le Atua ua tupu ai le loto alofa. A o se faamanatu foi lea mo tatou uma, 'aia tatou te tauimasui i le agaleaga mai o nisi tagata, 'a ia tatou faamagalo atu i ai, auā e saunia e le Atua lo tatou faatauva'a tatou te faia ai mea sili e faaolaina ai nisi tagata, auā e faaeaina e le Atua le tagata loto maualalo i tofiga maualuluga ma aloaia, auā tatou te lē iloa le finagalo loloto o le Atua e fa'aaogaina i ai lo tatou ola mo ana feau. Toatele tupulaga talavou ua matauina le fiafia e tau ai le leaga i nisi fo'i talavou, ae ia manatua, o lona ua tapena oe e le Atua e fai ma lavea'i i nisi tagata o fia maua le fesoasoani, ae ia avea tatou ma talavou loto maualalo, e faataitai mai ai nisi tupulaga.

I le satauro o Keriso a o tautau mai ai, na faailoa atu ai pea e tagata le taupulea uiga tauimasui e ui ina ua faataunu'u lo latou mana'o fia fasioti ia Iesu. A o le i to lana manava maliu tiga ai, na ia valaau atu i lona Tama i le lagi, 'Ia e faamagalo atu auā ua latou le iloa le mea ua latou faia. O lona toetu ua faia ai se mafaufau fou faaleagaga e ala i le loto salamō ma le faatuatua i lona suafa. Ua tatou iloa tino ai e leaga le tauimasui ma le ola agaleaga i nisi o ō tatou uso. Ua na o le malaia ma le ola saisaitia e maua ai. Faamagalo atu iē fai i tatou ma ō latou fili ma faaleaga mai e ui ina leai se mafuaaga tatau

## **GALUEGA FA'ATINO:** Fesili & Tali

1. Aisea na le fiafia ai uso o Iosefa ia te ia?

Tali: Auā ua faamatala i ai e Iosefa le uiga o ana miti na fai, fai mai ua ifo ā latou fusi saito i le fusi saito a Iosefa.

2. O le ā se faamoemoe o le Atua na fa'aaoga ai Iosefa?

Tali: O le faamoemoe o le Atua mo Iosefa, ia fai ma faaola ma lavea'i mo lona aiga i taimi faigata e pei o le oge o le nu'u ua leai ni mea'ai.

**PESE:** 157 (Pese ma Viiga)

## **A'OA'OGA.**

1. 'Aua le ola tauimasui.

2. Ia tatou maua le loto maualalo i luma o le Atua.

3. E faaeaina e le Atua lo tatou faatauva'a.

**ASO SA:**

**20 SETEMA, 2015**

**MATAUPU:**

**FAAVAE I LUGA O LE ALOFA** (On the basis of love).

**SINI:**

Ia a'oa'oina le fanau ina ia malamalama i le uiga moni o le mataupu ina ia mautinoa ua malamalama le vasega.

**TUSI FAITAU:**

Filemoni 1 – 14.

## **FESOASOANI MO FAIAOGA:**

O Paulo, o le aposetolo ua noanoatia ona o le Talalelei ia Iesu Keriso, o lona uiga o ia o le tagata ua olaina le Talalelei, o le tagata ua faafouina lona olaga, ua masani ma puapuga, e le solomuli pe fefe e faailoa atu le toetu mai o le Keriso manumalo. Peita'i o lana tusi atu ia Filemoni, ina ia

talia mai lona atali'i faa-le-agaga o Onesemo ina ia la galulue faatasi. Lea ua faailoa e Paulo ia Filemoni o se tasi o ana uō i le Talalelei, o lē sa la galulue ma mafuta faatasi. Peitai o le aioi atu o Paulo ia Filemoni, e le o le faatauanauna o Filemoni ina ia agalelei mai, a o lo o faailoa atu le agalelei ia faia ma le loto, o le agalelei e faavae i luga o le alofa.

O le ala lea o le tusi atu o Paulo ia Filemoni, ina ia auina atu Onesemo ia la mafuta ma galulue faatasi i le Talalelei ma fesoasoani atu ia te ia i le galuega. A o le uiga o le aioi atu o Paulo, ina ia maua le agalelei e faavae i luga o le alofa, ae le o le agalelei ona o le mafutaga sa feagai ai i le galuega, o le auga tonu lea o le lagona o le aposetolo. O lo o atagia fo'i i le molimau a Paulo, e i ai nai aso na faaletonu ai Onesemo i le galuega faa-Aposetolo, a o lea ua toe a'oa'o ma faatonu e le aposetolo ina ia toe fo'i mai e galue i le galuega. O le uiga lea o ana upu, *o lo'u atali'i na ou fanaua, o lo'u tino lava o ia*. O lo o aumai ai se ata i le galuega a Paulo na ia faia ia Onesemo lea ua toe maua ai le mafutaga e galulue faatasi ai i le Talalelei ia Iesu Keriso. O le manatu o Paulo ina ia aumai Onesemo i totonu o le mafutaga latou te nutimea faatasi ina ia malosi le Talalelei, ma ia tupu ma ola i loto o tagata.

O se a'oa'oga tāua fo'i lea mo tatou le fanau, ia le gata ina tatou talia se talosaga mai mo se fesoasoani, 'a ia tatou talia ina ma le loto atoa ina ia mafai ona lavea'i mai lea uso i sau auaunaga e faasaoina ai o ia mai ona faafitauli o feagai ai, ae ia faatino le auaunaga ma le loto ua utufia e le musumusuga e le Agaga e tupu ai lagona alofa e faatino le galuega ma le loto i ai, ae le o le talia o le talosaga mai ona o se mafutaga ua leva, ae ia talia ona o le loto mama ma le fia fesoasoani moni i le uso ina ia maua le mafuta faatasi o fanau o Keriso.

I le satauro o Keriso ma lona toetu – o le alofa tunoa lea o le Atua le Tamā mo tagata uma. O le alofa e le i tauanauna, a o le alofa fua. O le alofa ua pa'i mai a o agasala pea i tatou. Ua le silasila le Alii i lo tatou tulaga leaga ma le mataga ma lo tatou mamao ese ma ia, 'a ua ia alofa mai i le alofa faaleAtua e faamaoni ma faavavau ma lē fuaina i so tatou leaga.

**GALUEGA FAATINO:** Tusiga solo.

Tusi sau solo e faatatau i le alofa o Iesu ia te oe. Po o le ā le galuega na ia faia mo tatou ma le lalolagi atoa? Ia tolu fuaiupu o le solo, ae ta'i fa laina i le fuaiupu e tasi.

**PESE:** E! le alofa o Iesu (73, Pese ma Viiga EFKS)

**A'OA'OGA:**

1. Ofo lau fesoasoani i so o se tagata.
2. Faavae lau auaunaga i lou loto malie.
3. O Iesu na ofo mai lona ola atoa e faaolaina ai i tatou.  
.....

**ASO SA:** 27 SETEMA, 2015

**MATAUPU:** O LE GAGANA O LE MALO (The kingdom's speech).

**SINI:** Ia a'oa'o le vasega ina ia malamalama, o le gagana o le malo o le Atua - e le na o upu a o le faailoa mai i lou olaga o le amio faa-Keriso

**TUSI FAITAU:** Iakopo 3:1-12

**FESOASOANI MO FAIAOGA**

O le mataupu, 'o le gagana o le malo', o lo o faasino i le gagana a le Kerisiano e tatau ona tautala ai. O upu a Samoa, e iloga lava alo o tamalii i ana aga faatamalii, o alo o tupu i aga faatupu. E le tau faailo ma tau faailoa e matilatila ma pupula mai ma iloa gofie. O le gagana la o le malo o lo o faasino iē ua fai ma so'o o Keriso po o Kerisiano, ma la latou gagana e gagana ai i le va ma isi Kerisiano aemaise lava tagata o le lalolagi. Ia paia le gagana i le va fesoatai ma isi auā o i latou o le fanau a le Atua. Amata mai i fanau i matua o matua foi i fanau faapea le va tapuia ma isi tagata. E faailoa mai e le gagana le ituaiga tagata, po o se

tagata e pulea e le Atua lona olaga e ala i faavae ma tulafono ma poloaiga a le Atua, pe leai. Ioe o malo o le lalolagi e ui ina i ai ona va tapuia, tu ma aganuu fa'aaloalo, ae ulutaafale ai ma le gagana faalata, ma taufaaleaga, faifai, lotoleaga, ma ola faufau i isi. O le gagana a le malo o le Atua – e amata mai i le loto momomo le loto salamō, ma le faatuatua. O le gagana ua paia pei ona faapaiaina e le alofa tunoa o le Atua le tagata tuai, ma ua foliga mai i le tagata fou ua foliga ia Iesu. O le gagana e tusaafia, e faatupu faamoemoe, e alofa ma agalelei, e tautala sa'o e le faaoleole. O le gagana ua taitaiina e faavae o le malo, le malo o le Atua.

I le Tusi Faitau, o lo o apoapoa'i ai le toeaina o Iakopo i le au Kerisiano i le amataga e uiga i le tāua o le gagana o le malo o le Atua. Ua aumai ai e Iakopo le tasi itutino o le tino o le tagata o le laulaufaiva lea ina ia pulea lelei ma le faautauta. Aisea, auā foi e ui ina itiiti ae e aogā tele. 'A leai se laulaufaiva pe i ai foi ae puupuu, e le mafai ona tautala le tagata. Ua ta'ua i le Tusi Paia le tagata gugu sa le mafai ona tautala sa faamalolo e Iesu. Na gugu foi Sakaria le tamā o Ioane le papatiso ana le fanau mai le tama ma faaigoia ia Ioane e le toe tautala. O le tagata ma'i i manaoga faapitoa le tagata ae gugu; e manaomia ona aoaoina i le gagana o faailoga, ina ia tatou malamalama i ona manaoga, ma mea e tatau ona ia faia.

O le laulaufaiva la, e aogā tele ae e ao ona pulea ma le faautauta. Aisea? Auā fai mai Iakopo, e pei o le faagutu o le solofanua, e pei foi o le foeli o le vaa, e pei foi o se afi itiiti.

Ua faatusa foi e Iakopo le laulaufaiva i le afi; o le faupuega o amioleaga ua tuuina iō tatou itu tino ua leaga ai le tino uma, ua faamuina ai le olaga nei uma lava – o le faamuina foi lena mai Kena. Aisea? Fai mai Iakopo, ua mafai e le poto o le tagata ona faalataina manu feai ma manu felelei o mea fetolofi ma meaola i le sami, ae le mafai ona faalataina e se tagata le laulaufaiva. Auā o le laulaufaiva e tasi e vivii ai i le Atua, o le laulaufaiva foi e tasi e fetuu ai i tagata ua faia e foliga i le Atua.

Ma i ff.10e-12 o lo o aumai ai e Iakopo le feau i le au Kerisiano i le amataga, ma tatou foi i nei aso. O le Kerisiano e le tatau ona vivii i le Atua, ae fetuu i lē ua ita mai. Ua aumai ai e Iakopo ata faatusa e tolu e faailoa mai ai le gagana ma le amio a ē ua tā'ua o Kerisiano. (i). O le

puna - e le mafai e le puna ona puna mai ai le vai suamalie faapea ma le vai oona; (ii). o le laau o le mati ma le laau o le vine - e le mafai foi e le mati ona fua mai i le olive, po o le vine e fua mai ai le mati; (iii). o le vai magalo - e le mafai ona maua mai i le vai māi. O lona uiga, o lē ua fai ma Kerisiano, e le mafai gagana mai i le vivii faatasi ma le fetuu. E le tatau ona foliga lua pei o le tagata o lo o fai se mata faapiipii.

E faapefea la ona tatou tumau i le gagana o le malo ma tatou pulea le faatusa o le laulaufaiva o le afi? Ioe, pe'ā tatou iloa lelei le tāua o lo tatou faataueseina mai le pule a le agasala e Keriso. Ua suia ai lo tatou tagata tuai i le tagata fou ua ola ia Keriso. Pei o upu a Paulo, 'ua le toe ola a'u, a o Keriso o lo o ola i totonu ia te a'u. O aso uma e oti ai i matou. O lona uiga – o le Kerisiano, o le tagata ua oti i le tagata tuai e ui ina ola pea i le tino. O le tagata ua taitai lona olaga atoa e le Agaga po o le tulafono a Keriso ua ta'ua foi o le tulafono i le faatuatua, ma ua gagana mai i aso uma o le ola i le gagana o le malo. I le satauro o Keriso, o le taulaga ma le togioala lea e faafouina ai lo tatou tagata tuai, e ala i le loto salamō ma le faatuatua i lona suafa, ma tatou gagana ai i le gagana o lona malo e faavavau ma viia ai lona suafa paia iō tatou ola.

### **GALUEGA FAATINO:** Faatalanoaga

Ia fetufaa'i ma le vasega i le mataupu ma lona tāua iō latou olaga

**PESE:** Ia susulu atu oi tatou (363, Pese & Viiga EFKS).

### **A'OA'OGA**

1. Ia tatou gagana i le gagana o le malo o le Atua
2. O le ola ia Keriso e mafai ai ona tatou gagana i le gagana o lona malo
3. Vivii i le Atua ma alofa i lou tuaoi ae 'aua le vivii i le Atua ma fetuu iē ita mai
4. E leaga le ola faafoliga ma mata pulepule
5. O le Kerisiano e le tatau ona foliga ma fua mai lona ola faatuatua i amio aē lē Kerisiano po o tagata faapaupau ma lē faatuatua

.....

**ASO SA:** 25 OKETOPA, 2013

**MATAUPU:** O VALOAGA A IESU (Jesus' Warning).

**SINI:** Ia malamalama tamaiti, i le uiga o saunoaga a Iesu ua ia folafola atu ai i ona so'o, e faatatau i mea o le a tutupu i le lumana'i.

**TUSI FAITAU:** Mareko 13: 1 – 8

### **FESOASOANI MO FAIAOGA:**

Ua uma ona a'oa'o atu Iesu i le motu o tagata i mataupu e tele, ona latou ulufafo lea ma ona so'o i le malumalu. O iina na fesili atu ai se tasi ona so'o i le Alii – “Le a'oa'o e, ina silasila ia i nei ma'a ua tetele lava, ma nei fale ua tetele lava!” Na tali atu Iesu ua faapea atu – “Ua e iloa ea nei fale tetele? E le tuua le tasi ma'a i luga o le tasi ma'a, ae uma lava ona soloia i lalo.”

O fale tetele o tā'ua iinei, o lo o faatatau i vaega uma o le malumalu matagofie e i Ierusalem. O lenei malumalu sa toe fausia e Herota le sili, i le tulaga lea na i ai muamua i le taimi o Esera (Esera 6: 14 – 15). Sa toe fausia e Herota le sili i se tulaga matagofie tele, e sili atu i fale uma i le aai atoa o Ierusalem. E le i fausia foi e Herota le sili lenei fale, e faailoa ai lona fa'aalologia o le Atua Soifua, peitai o se faatosina mo tagata Iutaia, ina ia tumau ai lo latou fiafia ma le talisapaia pea o lana taitaiga faatupu mo tagata Iutaia uma.

O le valoaga a Iesu i le lē toe tuua o le tasi ma'a i luga o le tasi ma'a, ae o le a soloia uma i lalo, lea lava na faataunuaina i le tausaga e T.A.70 (A.D 70), ina ua ulufale i Ierusalem le malosi o Roma, ma latou matuā faatama'ia atoatoa le malumalu, aemaise o le aai uma o Ierusalem. O le ata faa-Perofeta lea na tuu atu e Iesu o le a latou matamata moni i ai, e aofia ai foi ma isi mea tutupu i le lumanai. O isi mea o le a tutupu i le lumanai, o le a fesootai lea i lona toe afio mai i le lalolagi e faamasino i tagata uma. O le valoia e Iesu o mea tutupu ua lata mai ma mea tutupu e mamao le faataunuaina, e lei tuuina mai e le Alii i se faasologa mautu, i le aso ma le mea o le a tupu ai. Na silafia e Iesu, o le toatele lava o lona

au-so'o o le a soifua pea ma vaavaai i le faatafunaina o Ierusalem i le tausaga e T.A 70. Pe a latou vaai tino i lea taimi faigata, o le a latou talitonu ai foi, so o se mea lava e valoia e Iesu, pe lata mai pe mamao, e taunuu lava i le pule toatasi a le Atua.

O le valoia e Iesu o mea o le a tutupu i le lumana'i ia i latou ua mulimuli atu ia te Ia, o se faamanatu lea i lo latou ola i le taimi nei. O le tele o valoaga na faia e Iesu, pei ona molimau i ai Mareko i le mataupu atoa lenei (Mareko 13), e lei faataunuaina. Peitai, ua o se fafagu e fesoasoani ia i tatou, ina ia tatou tumau i le olaga faa-le-agaga ma sauniuni i taimi uma a o faatalitali atu i lona toe afio mai. O lona toe afio mai, ua na ona valoia e Sakaria 14: 4, o le mauga lava o Olive, ae na te le iloa le taimi e tusa ma le finagalo o le Alii.

O faailoga i le lata mai o le i'uga o mea uma pei ona fesiligia ai e le au so'o o Iesu, o taumatematega lava ia, o lo o feagai foi ma le lalolagi i le augatupulaga ma lea auga tupulaga, talu ona toetu le Alii ma afio a'e i le lagi. Sa valoia e nisi tagata popoto, o le tausaga lea ma le taimi tonu lea e afio mai ai le Alii. Peitai e leai ma se folafolaga na taunuu. O le toe afio mai o Iesu, ua na o le Atua i lana fuafuaga paia, ae le o i tatou. O le ala lena sa fautuaina ai e Iesu ona so'o ma le au faatuatua uma, ina ia 'aue nei faaseseina se tasi e i latou o ē ua ō mai ma faapea mai, 'o a'u o Ia (Iesu). O le fevataua'i foi o nuu ma malo i le sailia o le pule ma le ituaiga o tagata e malosi i le lalolagi, o mea lava ia e tutupu, e lē mafai ai lava ona iloa e le lalolagi, ua lata mai le gataaga. Ua oo lava i lotu i le lalolagi ua fevaevae'i ma fetaua'i. Ua malosi le faatupu faalavelave ma le ave faamalosi o tamaitai e faapei o ni oloa faatautu'i i feusuaiga faifaamalosi. A tuu ane foi i faalavelave tutupu faale-natura, e pei o faama'i pipisi, oge, lamala, lologa, mafuie ma afa malolosi, o puapuaga lava ia e tutupu pea. Peitai ua lē mafai ai lava ona iloa e le lalolagi ua lata mai le gataaga o mea uma, ma latalata le afio mai o le Alii. Mo i tatou le au Kerisiano i nei ona po, e finagalo Iesu ina ia tatou mataala ma saunia mo lona toe afio mai. O lona uiga e ao ina tatou auauna iā Iesu ma le faatuatua. Lafoa'i le agasala ma tuu atu atoatoa lou loto ma le ola, e saunia ai mo le toe afio mai o Keriso. 'Aua foi tatou te fefefe i tala o mea o le a tutupu i ia taimi. O lo tatou Alii e alofa mai.

**GALUEGA FAATINO: Tusiga palakalafa**

Tusi mai sau parakalafa (pe afa itula) e ootoo mai ai le uiga o valoaga a Iesu e uiga i le:-

1. oo mai o le gataaga
2. toe afio mai o le Alii
3. tapenaga a le Kerisiano pe a oo mai nei aso.

E mafai foi ona galulue i ni vaega, ma aumai ni faamatalaga tusitusia a vaega (group discussion) faataata i vaega e 3 o i luga.

**PESE: Ia tia’i ia le fefe (231, Pese ma Viiga EFKS)**

**A’OA’OGA:**

1. Ia ola faapaiaina i taimi uma.
2. E toe afio mai lava Iesu.
3. Ia mataala ma tatalo e le aunoa.

**TATALO:**

Lo matou Tamā faa-le-lagi e, ao matou vaavaai atu i le faatamaiaina o ma ofoofogia ua faia e le tagata i lenei lalolagi, ona tupu lea o lo matou popole. O tala foi o taua ma faalavelave matautia faa-le-natura i vaega eseese o le lalolagi, ua matou ofo ai lava ma palaa’ai ai. Ua matou ole atu i lau afio, sei e fesoasoani ia i matou, ina ia matou faalogo lelei i au valoaga o mea o le a tutupu, ma ia saunia foi i matou ma le faatuatua, e feiloai ma lau afio pe a e toe afio mai. E ala iā Iesu Keriso la matou tatalo. Amene.

.....

**ASO SA: 1 NOVEMA, 2015**

**MATAUPU: O LE TAGI AUĒ MA LE ALAGA FIAFIA, E Ō FAATASI** (Weeping and Rejoicing belongs together).

**SINI:** A’oa’o tamaiti ina ia latou iloa ma malamalama lelei, o le tagiauē ma le alaga fiafia, o i’uleo masani o lo o faailoa mai ai lagona o le faanoanoa ma le olioli o tagata o le Alii

**TUSI FAITAU:** Salamo 30: 1 -12

**FESOASOANI MO FAIAOGA:**

(i) E pogai mai fea le Salamo 30? – A silasila i le Tusi Paia i le lomiga-fou faa-Samoa o lo o faapea mai:-

1. O le uiga o le pese – O lo o vivii atu Tavita i le Alii aua ua faaolaina o ia.
2. O le ulutala o le pese – O le salamo, o le pese i le faaulufalega o le fale o Tavita.

O le Salamo lava ia o le viiga ma le faafetai a Tavita i le Atua; ae o le viiga e sautualua lagona e pei ona fai mai le Mataupu - O le tagi auē ma le alaga fiafia. E matele mafaufauga o tagata, o le salamo lenei, o le faaleoina lea o lagona o Tavita i le mea sa tupu o tusia i le 1 Nofoaiga Tupu 21: 1 – 22: 6, ma e tele lona fesootaiga ma lenei Salamo, pe a fua i lagona ma upu o faaleoina ai lagona o le Fatu pese. Peitai e le mafai foi ona aveesea ai le fesootai atu o lenei Salamo i se fale – auā, ‘o le mea e soli ai saito a Aruna’ e pei ona ta’ua i le tala, o iina na faia ai e Tavita le fata faitaulaga, lea na osi ai taulaga i le Atua, ma liliuina ai le toasā. Ae o le fesootaiga o fia faa-taua, fai mai isi, o le nofoaga tonu lea na tu ai le malumalu mulimuli ane. E mafuli lava la i le manatu, o le pogai tonu lea o le pese lenei, o le puapuaga na tupu i le nuu, ona o le agasala a Tavita, ae ua faamauina o le viiga ma le faafetai i le Atua, sa faailoa lava i



lagona sautualua o le olioli ma le faanoanoa, ma ofoina atu ai ma le laueleele mo le Atua, e ala i le malumalu mulimuli ane.

(ii) O le Salamo (Pese) – O ff.2-3, e mafai ona faasino i le puapuaga matautia na oo ia Tavita, pe faasino foi le mala, le faama'i tele na oti ai le faitau afe ma afe o le nuu. O lo o tautino lava iinei e Tavita; o le agasala lava na ia faia e tutusa lelei lava ma lona tanumia i le tuugamau ua oti. Peitai, o le alofa lava o le Atua e toatasi na o ia, na mafua ai ona le oti (f.3).

Sa lagonaina foi e Tavita lona le saogalemu, o le ala lea o lona le to'a ma lona atuavale tele, auā ua ia iloa tino mai le puapuaga ua liliuese fofoga o le Atua mai ia te ia. O lona puapuaga foi na ia lagonaina ai le matuiā o lana agasala (f.7), (II Samuelu 24:10).

O le f.11 e mafai ona faailoa mai lagona fiafia o Tavita, ina ua oo le atolaau a le Atua i Ierusalem, mai le fale o Opete-Etoma. O iina na matuā aveesea ai lona faanoanoa, ae ua ia matuā siva ai i lona fiafia, ua oo mai le atolaau i Ierusalem. Ae e le itiiti foi le sao o lena fuaiupu, pe a fua i le fiafia ma le olioli ua fusia ai nei Tavita, ina ua toe liliu le toasa o le Atua mai ia te ia, talu lona faamaualuga i lona malosi ma lona tamaoaiga o iloa i le tala.

ff.11-12:- O le liua o le tagitui i le siva, ma le talaeseina o le ie-talatala, ae fusia i le fiafia, o lagona lava nei sa falōina lona tagata, a o fetaia'i ma le finagalo mafatia o le Atua. Peitai, e pei o se tui maa'i ma maini mai le foma'i, ua faapena le le mafanafana o le Atua ma lona toasa, ua na o sina taimi ma toe mavae atu, a o lona lelei ma lona taunuuga filemu e alualu pea mo se taimi umi lava. Lea ua iloa tino e Tavita, ona ia tautino lea i le fuaiupu mulimuli o lana pese, o le a ia ta'uta'u pea le mamalu o le Atua e faavavau, ma vivii ia te ia e le aunoa, po o le solo lelei po o le puapuaga foi. Auā o le loto olioli moni i le Alii, e afua mai le loto mafatia loloto, ua na iloa lona faatauvaa i luma o le Alii.

### **Uiga o Upu ma Fuaitau:**

i) ie talatala (f.11) - E faasino i le lavalava e fa'aaogā e fai ma faailoga o le faavavau.

### **GALUEGA FAATINO: Tusiga tala/Fetufaaiga i ni fesili**

1. Tusi i le faiaoga, pe faamatala i ai, se mea e te iloa ma talitonuina, e mafai ona iloa ai lagona ia e lua, o le faanoanoa ma le
2. Fai lava e outou ni fesili e talafeagai ma le mataupu, e fetufaa'i ma faasoa ai.

**PESE:** Le Alii e, ia malulu mai (143, Pese & Viiga EFKS).

### **A'OA'OGA:**

1. Tumau i le Atua e manuia ai.
2. E leaga lou faalagolago i lou lava malosi.
3. Ia alofa i isi tagata.

### **TATALO:**

Le Alii e, lo matou Atua, a'oa'o mai ina ia matou tagiauē ma alalaga fiafia, ma o matou loto faamaoni atoatoa oi iā te oe, ua na o oe lava e aunoa ma matou.

.....

**ASO SA:** 8 NOVEMA, 2015

**MATAUPU:** MEALOFA O LOIMATA (Gift of tears).

**SINI:** Ia a'oa'o le vasega ia malamalama - o fa'aamuia a Iesu i tagata, o mealofo o loimata.

**TUSI FAITAU:** Mataio 5: 1 – 6

### **FESOASOANI MO FAIAOGA:**

Ua lē na o tiga ma faanoanoaga e oo mai, e tagi ai le tagata, ae tagi foi le tagata ina ua faaofuina i manuia na tauivi ma tautiga ai.

O le lauga a Iesu i le mauga e pei ona faamauina e Mataio, o lo o amata lava i manuia e maua i ituaiga tagata faapea, e feagai ma puapuaga, mafatiaga, ma le ola tigaina, ae onosai pea ma tauivi ina ia manumalo. E tauivi ma le tagi, ae a oo mai foi manuia e maligi foi loimata o le tagi. E ala ona maligi loimata, ona o le olioli ma le filemu ua aumai e manuia mo ia. Ua silafia lelei e Iesu le olaga o lo o ola ai tagata i le lalolagi nei. O tagata ua ola i le saili o le tamaoiga ma tulaga maualuga, ua pologa ma sauaina ai tagata. Ua leai foi lava se taimi e maumauina e fesoasoani i nai tagata vaivai ma puapugatia. Ua faapito lava mea ua latou maua mo i latou lava.

O fa'aamuia ua filifilia e fai ma matua, e tutusa lava ma isi fa'aamuia o mulimuli mai. O le mavita i le agaga (poor in spirit), e faatatau i tagata e leai ni ala manuia latou te maua i lenei lalolagi. E fetuleia'i solo ma taotaomia ma soona fai e tagata. E leai lava se fesoasoani e maua mai i nisi tagata. O le leai o so latou malosi ma se faamoemoe i le lalolagi, o lea e tu'u atu atoa ai o latou loto, ma faatuatua ma le faalagolago atoa i le Atua. O le moemoe ola lea o o latou tagata atoa. Ua latou iloa lo latou le mafaia o se mea e tasi, e tu'u atoa ai loto ma agaga i le Aua. E pei ona fai mai le Salamo 42: 2; *“Ua fia inu lo'u agaga i le Atua, o le Atua Soifua.”*

O ē faanoanoa (those who mourn) i le gagana Eleni e loloto tele. O le lagona mafatia ma nutimomoia, ona o mea tiga ma le ogaoga e fai mai e isi tagata ia i latou. E le gata i lea, o lagona nuti momoia ona ua aveesea faafuasei ē pele i loto ona o le oti. E liusuavai ai le loto. E tagi, e le mafai ona taofia le maligi ifo faavai o loimata. E pei o le toaina o Iakopo, ina ua talitonu o Iosefa lona atalii ua oti.

E ui i ia mafatiaga e feagai ma i latou nei, ae atili ai ona faalagolago ma faatuatua i le Atua, e maua ai pea le malosi e galue tauivi ai mo lona manuia. O ē agamalu (the meek) o tagata e le iloa faatino ma faataunuu le ita. E faapalepale, e onosai ma pulea lelei o latou lagona tutupu a'e. O lona uiga o tagata ua pulea e le filemu ma le alofa o le Atua. Ua masani i le faamagalalo, ma le loto faagalalo ma le faamagalalo. E latou te le manatua ai mea leaga ma le faaleaga mai, ae na o le alofa e avatu i ai.

O le upu 'amuia' i le gagana Eleni, o le upu e faamatalaina ai atua. O le talitonuga o le 'Au Kerisiano, e tasi lava le Atua Soifua. O le amuia la, e pa'u mai i fofoga o le Atua, ma ua na o Ia lava e patino i ai le amuia. O le amuia o le manuia - o le meaalofa e avatu e le Atua i tagata e galulue ma ola ma tauivi ma le tagi ona o puapuaga latou te feagai, ae tumau pea le faamoemoe i le Atua. A oo ina ulufale le amuia a le Atua i totonu o tagata tauivi ma puapuaga ona fanau mai ai lea o le olioli o le Atua i totonu o o latou loto, e leai foi se isi malosi na te mafai ona aveesea. Pei ona fai mai le Fa'aaliga 7: 46. O i latou ia o ē o mai nai le puapuaga tele, ua ta foi o latou ofu, ma ua faasinatina o latou ofu i le toto e le Tamai Mamoe. O le Amuia la, o Iesu Keriso lava lea, o le Upu ma le meaalofa o loimata mo ē tigaina ma puapugaina. E maligi loimata ina ua pa'i mai faamanuiga a le Alii Faaola a o feagai pea ma puapuaga ona o le tumau ia Iesu. Ioe, tatou te maua meaalofa o le malo o le Atua, pe a tatou iloa e tatou lava, le leai o se mea tatou te mafaia, ona tuu atu atoa lea o le faatuatua ma le faamoemoe ma le faalagolago i le Atua.

I le satauro o Keriso ma lona toetu, ua tatou maua ai le faamagaloina o agasala e ala i le loto salamō ma le faatuatua i lona suafa. Ma e maligi loimata i le tele o le alofa faamagalalo o le Atua ia i tatou e ala ia Keriso Iesu. I totonu o puapuaga ma faaososoga o le ola faatuatua, e maligi loimata, a o loimata o le fiafia ma le olioli auā ua talitonu ma mautinoa atoatoa i le fa'aamuia a Iesu i ē tumau ia te ia. E liua loimata o le faanoanoa i loimata o le olioli pe a tatou salamo faamaoni i mea leaga sa tatou fai.

### **GALUEGA FAATINO: Tusiga Tala**

Tusi sau tala i se mea na e oo i ai i se taimi faanoanoa.

**PESE:** Ou te tagi, lo'u Tamā e, 134 (Pese ma Viiga EFKS).

### **A'OA'OGA:**

1. Tu'u atoa i le Atua lou loto e maua ai manuia.
2. E leai se mea e maua ma le filemu.
3. E tauia e le Atua lou faalagolago atu ia te Ia.
4. E tagi le tagata ua salamō ma maulalo le loto

**ASO SA:** 15 NOVEMA, 2015.

**MATAUPU:** **TALIA MA LE LOTO FAAFETAI.** (Gratitude unto delight)

**TUSI FAITAU:** Teuteronomie 12:5-12.

**SINI:** Ia a’oa’oina le vasega ina ia iloa ona ola vivii ma faafetai i le Atua, i mea ua Ia foa’ifuaina mo soo se tagata i aso uma, aemaise lava i mea sili ona lelei, e faitaulaga ai i le Atua.

**TUSI FAITAU:** Teuteronomie 12:5-12.

#### **FESOASOANI I LE FAIAOGA:**

O le i ai o le fanauga a Isaraelu i le vao, ina ua o ese mai Aikupito, o se faiga na fuafuaina e le Atua, e tapena ai agaga o le nuu atoa, ina ia iloa ona o latou usiusita’i i mea ua faatonuina ai i latou, e tusa ma le feagaiga ua mae’a ona o latou osia ma le Atua.

O lea ua lata i taimi mulimuli o le toeaina o Mose, e ala i lana taitaiga o le nuu, e aga’i atu i le nuu po o le nofoaga ua filifilia e le Atua mo i latou. O lo o silafia lelei e le Atua le tulaga o Kanana o lo o i ai, aemaise lava ia latou tapuaiga ma a latou amio i aso fai soo. O le ala lea o lona saunia o nisi o poloaiga ma tulafono mo lona nuu, e ao ona faatinoina auā lava lo latou ulufale atu i Kanana, aemaise lo latou aumau ai. O le faamoemoe o le Atua, ina ia iloa ma manino le Isaraelu, i mea sili ona lelei e tatau ona o latou faitaulaga atu ai ia te Ia.

O le mataupu o lenei Aso Sa, o lo o faamamafaina ai le loto faafetai (gratitude) o aiga uma o Isaraelu, e ao ona faatinoina mo le Atua, e fa’aaogaina ai meaalofofa ua faamanuiaina ai o latou lima, aemaise o o latou aiga. O a mea ua faamanuiaina ai aiga uma o Isaraelu? O mea ua faamanuiaina ai i latou e le Atua, o fua ia o lo latou tautiga e ala ia latou faatoaga ma lafu manu. O se tagata e i ai sana faatoaga ma sana lafu manu i lea vaiata i totonu o le sosaiete, o se tagata mauoloa lea i le vaai a

isi tagata. O lona uiga, o tagata manu ia. A fua foi i le manatu faa-Feagaiga Tuai, i le tagata e maua mea e pei o lafu manu ma faatoaga, fai mai i latou, o tagata po o aiga ia ua faamanuiaina e le Atua. E pei la o mea ua maua e aiga o ituaiga uma e sefulu lua (12) o Isaraelu i lea vaiata. O manu ia ua o latou maua, e ala i lo latou ola galulue ma le faamaoni ma toaaga e tausi a latou faatoaga ma lafu manu.

O le ala lea ua finagalo ai le Atua, ina ia aumai ma le loto atoa ulua’i tama pepeti o a latou lafu manu, e faatino ai lo latou soifua faitaulaga i le Atua, ona o ia meaalofofa ua Ia foa’i mo i latou a o i ai i le vao mo tausaga e fasefulu. O le faamoemoe e tapena ai le ola faitaulaga o so o se Isaraelu i le Atua. E le gata i lea, ae o se faiga foi e faatinoina ai le ola vivii i le Atua ma foa’i mea silisili ona lelei, mo taulaga i le Atua, o le na o latou osi feagaiga.

I le satauro o Keriso ma lona toetu, ua tatou maua ai le agaga faafetai i le Atua i meaalofofa uma ua tatou maua, ae maise le meaalofofa silisili o le soifua paia o lona Alo Pele e toatasi – ina ia susulu mai lona soifua paia i o tatou ola ua fai ma taulaga ola (living sacrifice) e viia ma faafetaia ai lona suafa paia.

#### **GALUEGA FAATINO: Fetufaā’iga**

1. Faatalatalanoa le mataupu e uiga i meaalofofa ua faamanuiaina ai so o se tagata e le Atua. (f.t), fanau, galuega/valaauina, faatoaga/lafu manu, ma isi.
2. E lelei foi le faatusatusa o faiga po o sauniga o faigataulaga a Isaraelu e pei ona i ai le mataupu, ma faiga o taulaga a le Ekalesia, e pei ona masani ai i tausaga uma.
3. Aisea la e mafua ai ona fai taulaga? Aisea foi e alagata ai i so o se tagata ona faia se taulaga mo le Alii?

**PESE:** Vivii atu ia (183, Pese ma Viiga)

**A’OA’OGA:**

- 1. ‘Aua nei galo le alofa o le Atua i aso uma o le ola, e ala i so o se tamaoaiga ua Ia faasoa mai mo i tatou
  - 2. Fai lou ola mata’u i le Atua – e faafetaia ai le alofa faaola ma faamanuiaga a le Alii mo oe
  - 3. Ia le na o upu ma tala e faafetai ai, ae ia iloa foi i le ola ia Keriso
- .....

**ASO SA: 22 NOVEMA, 2015**

**MATAUPU: FEILOA’IGA (MEETING)**

**SINI:** Ia a’oa’oina tamaiti, o le nofoaga e valaauina ai tatou e le Atua e maua ai le fiafia moni.

**TUSI FAITAU:** Luka 10: 17 – 20

**FESOASOANI MO FAIAOGA:**

O le Tusi Faitau, o le tala i le toe foi mai o le to’a fitu sefulu. O le to’a 70 lea na auina atu e Iesu e tala’i atu i nuu uma le afio mai o le Mesia, lea ua toe foi mai. E le o ta’ua po o le ā le mamao na malaga atu ai ae i ai le manatu, na oo atu i aai o Ieriko. O lo latou oo mai ma le tala fiafia, ua mafai ona latou tutuli ai temoni i le suafa o le Faaola, na mafua ai ona lapata’i Iesu, ia ‘aua nei mitamita ona o galuega ma mea ua latou mafai ona fai, ae ia latou mautinoa le faaolataga ia Keriso ma le nofoaga ua saunia e le Atua mo i tatou i le lagi. ‘Le auauna lelei e, ma le faamaoni, ulufale mai i le fiafia o lou Alii’.

E lei se nofoaga sa faamautu ai le galuega a Iesu. Sa faimalaga solo, ma sa agalelei ia te ia ma ona so’o le tele o tagata (Mataio 10: 11; Luka 8: 3). E lei manatu le Alii i le oa ma le tamaoaiga ma mea matagofie o le ola nei. Auā ana faapea e manatu le faaola i mea ia, e tele lona tamaoaiga e maua mai i le tele o galuega lelei na ia faia e aunoa ma se totogi. E le i faatāua tele e Iesu ia mea, auā foi o mea uma na ia manao ai mo lana galuega ua uma ona tapena e le Atua. Ua mae’a ona faatumu o ia e lona

Tamā ma ua atoatoa ai lona ola ofo atu. Ma o le tau i foi lea o so o se Kerisiano faamaoni ma le lelei, o le ulufale i le nofoaga ua valaau mai ai lona matai mo ia, o le lagi, e maua ai le fiafia moni.

I le satauro o Iesu ma lona toetu ua tatou toe feiloa’i ai ma le Atua i le loto salamō ma le faatuatua i lona suafa. Ma tatou te feiloa’i pea ma ia i aso uma e ala i lo tatou faia o lona finagalo paia. Ua tatou le mitamita i le mana ma le alofa tunoa ua ia i tatou, ae ua tau lava o le satauro o Keriso. O lona uiga, ua oti lo tatou tagata tuai loto fefete ma ola mimita ma faalialia vale, ae ua taitaiina i tatou e Keriso ma lona Agaga. Pei o Paulo, e ui ina ola i la le tino, ae peiseai ua oti i le la le tino, ae ua ola i le agaga faatasi ma Keriso. Tatou te feiloa’i pea la ma Keriso i aso uma e ala iō tatou ola ua faia ma iloa tino ai le finagalo paia o le Atua le Tamā.

**GALUEGA FAATINO: Fetufaaiga**

Ia fetufaa i le vasega i le fesili lea: E faapefea ona tatou feiloa’i ma mafuta ma Atua e ala ia Keriso i aso uma?

O nai manatu e fesoasoani:

- 1. E ala i le ola ia Keriso
- 2. Alofa i matua i le faamaoni i feau ma le aoga
- 3. Tatalo e le aunoa
- 4. Fai mea tonu ma sa’o
- 5. Le ola mimita ma faalialiavale
- 6. Mitamita i le satauro o Keriso

**PESE:** Ia susulu atu oi tatou

**A’OA’OGA:**

- 1. Ua uma ona saunia e le Atua mea uma mo lo tatou ola.
  - 2. O le Atua e maua ai le fiafia moni.
  - 3. O lo o faatali mai le Alii tatou te feiloa’i ma ia e ala i le loto salamō ma faatuatua i lona suafa
- .....

**ASO SA:** (Aso Sa Afio Mai /Ateveni) 29 NOVEMA, 2015

**MATAUPU:** MAFAUFAU FETĀLA'I (Enquiring mind).

**SINI:** Ia aoao le vasega ina ia malamalama, o le mafaufau fetāla'i o le mafaufau mata'u ma faatuatua ua taitaina e Keriso ma lona Agaga

**TUSI FAITAU:** Luka 1: 1 - 4

### **FESOASOANI MO FAIAOGA**

O le 'Mafaufau fetala'i', o le mafaufau faatuatua e tāua le taimi tuanai, le taimi nei faapea le lumana'i. O taimi na maua ai le faatuatua, o le tuufaasolo mai o lea faatuatua se ia oo mai nei, faapea le faamausaliina o faavae faale-faatuatua mo le oo atu i le lumana'i. E faapena le mafaufau o Luka le foma'i o le fai-Evagelia foi ma le Tusitala o le Tusi o Galuega a le 'Au Aposetolo. Ina ua ia faatuatua, na ia su'esu'e i le amataga o le faatuatua, ma lona faataunuina faapea lona fa'aatoatoaina.

I le Tusi Faitau o lo o mua'i faailoa ai e Luka i ē o lo o ia tusi atu i ai le toatele o tagata ua taumafai ona tusi faasolo le tala i mea ua mae'a ona faia iō latou luma. Ma e foliga mai i le manatu o Luka o mea ia ua mae'a ona tuuina mai ia te i latou e ulua'i soo o Iesu po o ē na matamata i lona soifua mai, se ia oo lava i lona maliu ma lona toetu, lona afio a'e i le lagi, faapea le auina ifo o le Agaga Paia. O lona uiga, e tāua le faalogo i le tala moni, ma e foliga mai e i ai nisi faiaoga pepelo ua taumafai e sui le tala e tusa ma ā latou foi faauigagaga. O se faamanatu foi i le alii o Teofilo i le moni ma le faamaoni o le Evagelia po o le Talalelei ua ia tusia o le Evagelia lea a Luka. O lenei Tusi ua faailoa atu ai e Luka ia Teofilo le moni o mea ua ia tusia ai pei ona ia matuā su'e i mea uma lava talu le amataga.

O le tā'ua o le alii o Teofilo i le amataga o le Tusi e tāua tele. Auā o ia o se tagata maualuga ma aloaia ma taualoa. E tele le avanoa o tala uma i ona luma, ma o ia foi e aumai ai le faamaoniga o le tala moni ma le tala sese pe a ia manino i le eseese o tusi. Ma o le mafuaaga lea o le taumafai o Luka e faailoa ia Teofilo le moni o le Talalelei ua ia tusia ia

Iesu Keriso. O le tala e i ai vaega o Tusi aloaia na muamua tusi o lo o ia fa'aaogaina, pei o le Evagelia a Mareko, ma le Tusi ua ta'ua o le 'Q'. Ma e i ai foi ma le faamamafa a Luka lava ia e pei ona le maua i ia Tusi e pei, ft. o le saeluaina o le ie pupuni o le mea e sili ona paia o le malumalu ina ua maliu Iesu i le satauro.

O le mafaufau fetāla'i lea o le alii fomai o Luka. E fetāla'i ina ia tusa mea ua ia tusia ma le Talalelei ia Iesu Keriso ua molimau i ai Paulo, ma ulua'i Aposetolo sa fai ma so'o o le Alii Faaola. E le gata i lea a o nisi foi o Tusitusiga pei o le Evagelia a Mareko ma le 'Q' ma nisi sa ia maua mai ai tala moni i le Talalelei ia Iesu Keriso. O le meaalofo sili lea - ia 'aua lava ne i mate ma tofatumoanaina o le faatuatua i le suafa o Iesu Keriso. Auā o le taulogologo o le talalelei mai lea tupulaga i lea tupulaga e tupu ai le faatuatua. O le meaalofo e le mafai e puapuaga uma o le olaga faapea le oti ona faaumatia. E tupu la le faatuatua i le mafaufau fetāla'i pei o Luka le fai-Evagelia. Na te iloa faafesoota'i le Talalelei ma faafitauli o lo o aafia ai tagata o lo o ia tusi i ai. E le gata i lea, a o lona mataala foi i le faailoa atu ia Teofilo o le talalelei moni ia Iesu Keriso ina ia tasi lava le Talalelei, ae aogā uma i taimi uma ma aso uma ma faafitauli uma o le ola faale-faatuatua.

I le satauro o Keriso na fa'aalia ai le alofa fua o le Atua lona Tama ina ia tatou maua le mafaufau fetāla'i e ala i le loto salamō ma le faatuatua i lona suafa. O lona toetu ua foaiina ai ia i tatou le Agaga e faatupu le saili ma su'esu'e ma le faautauta ina ia tatou manino i le Alofa Tunoa o le Atua ia Keriso ma tatou ola faatatau i ai, tainane se tali ma se faamafanafana i faafitauli o nei aso, faapea se feau manino o le Talalelei e tupu ai pea le faatuatua o le Ekalesia ae le o le liulotu ma solomuli i le ifo i tupua ma nisi tapuaiga faapaupau o le lalolagi.

### **GALUEGA FAATINO: Fetufaā'iga**

Ia fetufaai ma le vasega i le mataupu, ma ia fai mataupu (issues) o lo o matua aafia ai olaga o tupulaga ma fanau i nei aso ia fa'aaoga i ai le mafaufau fetāla'i e faavae i le ola ia Keriso ina ia laveaiina ai i latou mai mailei a le fili.

**PESE:** Tala'i le tala moni (Pese & Viiga EFKS).

## AOAOGA

1. Fetāla`i le mafaufau ae le o le ola pogisa
  2. O le ola ia Keriso ma le faatuatua e fetāla`i ai le mafaufau
  3. Suesue lelei ma ia manino i le Talalelei ae `aia le sasa faaloulemagā le tautala i le Talalelei
  4. `Aua le fua le Talalelei i mea e mana`o ai ae ia fua la tatou amio i le Talalelei
  5. Faautauta i faiaoga sese ua latou faauiga sese ma molimau pepelo i le Talalelei
- .....

**ASO SA:**               **6 TESEMA, 2015**

**MATAUPU:**           **UA FAAIGOAINA AE LĒ I FAIA SONA IGOA** (Naming without being named).

**SINI:**                 Ia iloa ma malamalama tamaiti i le mafuaaga o le faaigoaina o le tama ua fanau mai ia Sakaria ma Elisapeta o Ioane

**TUSI FAITAU:**       Luka 1:67-80.

## FESOASOANI MO FAIAOGA:

So o se pepe ma so o se tamaititi e fanau mai, e tele lava ina talatalanoa matua i se igoa o le pepe. E oo foi i nisi o le aiga e nauau ma taumafai e tau mai le igoa a le tagata ia e manao e ui e lei fanau le pepe. O nisi foi aiga i aso nei e ui lava i se igoa ua tasi iai matua, ae alu atu loa le faifeau e fai le lotu o le alalafaga i le pepe ma le faillele e sui ai lava i ina le igoa o le pepe. A le faaigoa i le faifeau, po o lona faletua, po o se igoa foi e manao ai le faifeau aemaise i tagata lelei o le Tusi Paia.

O le tala i le ulugalii o Sakaria ma Elisapeta ma le la pepe. E fanau mai la le pepe ua matutua lava lenei ulugalii ma ua tele o la tausaga. O Elisapeta sa taua o ia o le fafine e pa, lona uiga e le fanau. O Sakaria o ia

o le ositaulaga, na te faamu mea manogi mo taulaga a tagata i luma o le Atua. E iva masina na gugu ai Sakaria ona o le le talitonu i le faaaliga mai le agelu o le a fanaua e Elisapeta se tama tane. Ana le fanau mai lava le pepe e le toe matala lona laulaufaiva ma tautala i lona aiga. Ua oo ina fanau mai Elisapeta, e lei talanoa lava i le toeaina i se igoa o le tama. Auā foi ua faigata ona fesootai ua gūgū Sakaria.

O le valu la o aso o le pepe na ō a`e ai lona aiga e fai le sauniga o le peritomeina na manatu i latou e tataua ona faaigoa ia Sakaria lona tama. Peitai o le Agaga o le Atua na musuia le lotu o Elisapeta ma ia faapea atu e leai; o le tama e faaigoa ia Ioane. Na toe fesili le aiga ia Sakaria le tama po o ai le igoa o le pepe, na tusi e le toeaina le igoa o IOANE i le laupapa ma mautinoa ai e le aiga lona igoa. O le igoa o Ioane o lona uiga `o le muamua po o le teuteu ala`

O le fuaiupu na faitauina o le pese a Sakaria ina ua matala lona laulaufaiva mai i masina e iva na gūgū ai. Ua valoia foi e Sakaria le Faaola e afio mai e togiola le lalolagi. O le fanau mai la o le tama o Ioane le Papatiso, po o Ioane le Teuteu ala, na faaigoa e le Atua a o lei fanau mai. O le tama na faaigoaina ae lei faia sona igoa. O le mea ofoofogia lea. O le tama sa faaigoa e le Atua a o lei faia e ona matua ma lona aiga sona igoa. E lei fetufuai matua i se igoa o le tama, a o le Agaga o le Atua ua faailoa ia i laua le mea e tataua ona fai. Tamaiti e ofoofogia mea e faia e le Atua i lo tatou ola. Ua faaigoa muamua e le Atua ona o le tagata e i ai lona faamoemoe mo ia. O le tagata ua ia silafia o le a faaaogaina mo lana feau. Faapei foi o le Perofeta o Ieremia na tofia e le Atua ao lei fanau mai.

E le o toe maua i aso nei se tagata e faaigoa muamua mai e le Atua pei ona i ai ia aso, peitai e mafai foi ona ui mai le finagalo o le Atua i le igoa ua faia e ou matua. O le ā lava le igoa ua faaigoa ai oe e ou matua, e fa`aoga lava oe e le Atua i so o se ala. Pau le mea o lau amio ia lelei ma ia savali i ala o Iesu.

I le satauro o Keriso ma lona toetu, ua faapei ai i tatou o Ioane le papatiso e ala i le lotu salamō ma le faatuatua i lona suafa. Ua fai ai lo tatou ola ia Keriso ma molimau ma teuteu ala mo Iesu le pepe o le a fanau mai.

**GALUEGA FAATINO: Tusiga solo**

Tusi mai sau solo e faataatau ia Ioane ma lona aiga. Lua fuaiupu fa laina i le fuaiupu e tasi.

**A’OA’OGA:**

1. E leai se mea faigata i le Atua
  2. ‘Aua le masalosalo i le Atua auā na te faasala ai i tatou.
  3. E le o tagata uma e faaigoa ma filifilia e le Atua.
  4. Ia i ai lou igoa ma ia i ai foi sou aogā mo le Atua ma lana talalelei.
  5. E ta’u mai e le igoa lou ituaiga tagata
- .....

**ASO SA: 13 TESEMA, 2015.**

**MATAUPU: O LE PAPATISOINA O IESU** (The baptism of Jesus).

**SINI:** Ia a’oa’o le vasega ina ia malamalama, o le papatisoina o Iesu na ia tatalo ai, ona fa’aavanoaina lea o le lagi, ona afio ifo lea o le Agaga Paia i ona luga peiseai se lupe, ma ua oo mai le siufofoga mai le lagi ia te ia, ‘O lo’u Atalii pele oe, ua ou fiafia lava ia te oe’”.

**TUSI FAITAU:** Luka: 3: 21- 38

**FESOASOANI MO FAIAOGA:**

O le papatisoga, o lona uiga – o le faatofu ifo ma toe ea a’e. O le autu – ina ia faamamaina ma faapaiaina. Pe a fai i le tagata, o le faamoemoe ina ia faamama le leaga ae toe ea a’e i luga ua lelei. I le avea ai o Iesu ma tagata, na le mana’o Ioane e faia ia te ia le papatisoga, ae na faia lava ia Iesu, auā i lona finagalo, e ao ona tatou faataunuuina o mea tonu uma (Mataio 3:14-15). Pe afai o Iesu e leai sana agasala, aisea ua papatisoina ai? Auā foi i lona fai ai ma tagata e ui e leai sana agasala, a o le mea tonu

lea e tusa ma lona finagalo. Auā ina ua afio a’e Iesu nai le vai, ona fa’aavanoaina lea o le lagi ia te ia, ua ia iloa atu le Agaga o le Atua ua afio ifo pei se lupe ua oo i ona luga. O le ā le uiga o le faataunuu ia Iesu o le papatisoga a Ioane, ma le afio ifo o le Agaga Paia? Tatou te maua le tali i upu a Ioane le papatiso pei ona faamauina e le Evagelia a Ioane (Ioane 1:32-33). Fai mai Ioane le papatiso, o ia (Iesu) na auina mai o ia e papatiso i le vai. O ia foi na fetalai ia te ia, ‘o lē e te iloa le Agaga ua afio ifo i ai, ma nofo i luga ia te ia, o ia lava lea na te papatiso i le Agaga Paia’. Ua ia molimau foi o ia lava o le Alo o le Atua. I le molimau a Luka i ff.23-38, o Iesu i lona tupuaga (origin) ma lona amataga (beginning), o ia foi o le Atalii o le Atua.

O le papatisoga la o Iesu, ma le afio ifo o le Agaga Paia i ona luga – o le uiga lea o lona papatisoina e Ioane. Ia faailoa mai ai lana galuega faaola – o lona papatisoina oi tatou i le Agaga Paia. O ia o le Alo ma le Atalii e toatasi o le Atua.

E faapefea ona iloaitino le papatisoina oi tatou i le Agaga Paia? Ina ua tatou talia Iesu e fai ma ō tatou Alii ma Faaola e ala i le loto salamō ma le faatuatua. O le Agaga Paia i lona faamatalaina i le amio a Kerisiano – o le siufofoga o le Atua ua lagona iō tatou loto. ‘A le salamō le loto, e le o papatisoina oe i le Agaga Paia. E te le o talia le papatisoga a Iesu, ma e le o ola Keriso i totonu ia te oe.

I le aga atu i le Kerisimasi, na o le pau lea o le ala tatou te maua ai le fiafia moni ma ofo atu ai ō tatou ola o le taulaga ola (living sacrifice) peiseai o atalii pele o le Atua ua ia fiafia i ai, o se meaalofa sili foi mo le pepe o le kirisimasi ma ou matua – o le talia o le Agaga Paia i le loto salamō, ma le ola ia Keriso. Ma o lo tatou savavali lava lea i le Agaga ma fa’aalia iō tatou ola fua o le Agaga ua papatisoina ai i tatou.

I le maliu o Iesu ma lona toetu, ua mafai ona papatisoina ai i tatou e le Agaga Paia ma viia ai le Atua iō tatou ola.

**GALUEGA FAATINO:** Fetufaa’iga

1. Ia fetufaa’i ma le vasega i le tāua o le mataupu, faapea lona fesootaiga ma o latou ola ua ofo atu mo Iesu

**PESE:** Afio mai oe le Agaga Sa e, (109, Pese & Viiga EFKS).

**A'OA'OGA:**

1. O i tatou ua uma ona papatisoina i le suafa manumalo o Iesu Keriso; ina ia ō tatou tumau ai i le amiotonu ma le faatuatua faamaoni ia te Ia.
2. O le papatisoga ua papatisoina ai i tatou, o le finagalo alofa o le Atua ina ia ola faapaiaina tagata uma i lona alofa tunoa.
3. E tāua le ola mafuta i le Atua e ala i le tatalo.

.....

*Ia manuia le Kirisimasi & Tausaga Fou 2016*

